

ORE I MEXŨ GA CUÁŨ ÜMATÜXŨ

Tupana Nane rü duũxũãcü nangox

¹ Naxũpa ga guxũma, rü marü nayexma ga Tupana Nane. Rü Tupanamaã nayexma rü woetama Tupana nixĩ ga númax. Nũma rü Tupanaãrü Ore nixĩ i naega erü tamaã nüxũ nixu i Tupanachiga. ² Rü naxũpa ga guxũma rü nüma ga Tupana Nane rü naxũtawatama nayexma. ³ Rü guma Nanexũ nixĩ ga namuxũ ga Tupana na naxüãxũcèx ga guxũma. Rü nataxuma i tacü i ñuxma ngẽxmaxũ i tama nüma naxüxũ. ⁴ Rü Nanewa nixĩ i nangexmaxũ i maxũ. Rü ngema maxũ rü guxũ i duũxũgüarü ngóonexẽëruũ nixĩ. ⁵ Rü yima Nane rü woo chixexũ íporaxũwa rü duũxũgüxũ nüxũ nacuèxẽë i Tupanachiga. Rü ngẽma chixexũ rü taxucü-rüwama ngẽma mexũxũ narüyexera. ⁶⁻⁷ Rü nayexma ga wüxi ga yatü ga CuáŨ ga baiũxẽëruũgu ãegacü. Rü guma nixĩ ga Tupana núma namucü na nüxũ yaxuxücèx ga nachiga ga guma ngóonexẽëruũ na yemaãcü guxãma nüxũ yaxõgüxũcèx. ⁸ Rü nüma ga CuáŨ rü tama Tupana Nane ya duũxũgüarü ngóonexẽëruũ nixĩ. Natürü nüma nixĩ ga Tupana núma namuxũ na nüxũ yaxuxücèx ga nachiga ga guma ngóonexẽëruũ. ⁹ Rü ñoma ga naãnewa nangu ya yima aixcuma Tupana Nane ixĩcü i guxũma i duũxũgüxũ ngóonetanüxẽëcü. ¹⁰ Rü nüma ga guma Nane ga Tupanaãrü Ore ixĩcü rü ñoma ga naãnewa nayexma. Rü woo nagagu nixĩ ga naxüãxũ ga guxũma ga ñoma ga naãne, natürü ñoma ga naãne-cũãx ga duũxũgü rü tama nüxũ nacuèxgü na texe yĩxũ. ¹¹ Nuã norü naãnewatama nangu, natürü norü

duïxũgü ga Yudíugü rü tama nanayauxgü. ¹² Natürü guxema nayauxgüxe rü nüxú yaxõgüxe rü tüxú nanatauxchaxêê na Tupanaxácügü tixígüxü. ¹³ Rü ñuxma rü Tupanaxácügü tixígü ga guxema yaxõgüxe. Natürü tama noxri tabuexügagu nixí i ngêma rü tama tümanatügüarü ngúchaügagu nixí. Natürü i ñuxma rü Tupanaxácügü tixígü ga guxema yaxõgüxe yerü nümatama ga Tupana rü naxácügüxü tüxü nixígüxêê. ¹⁴ Rü nüma ya yima Nane ya Tupanaärü ore ixícü rü duïxüácü nangox. Rü totanüwa nayexma rü poraácü toxü nangechaü rü aixcüma nixí ga norü ore. Rü toma nüxü tadaugü ga ñuxácü na naxüünexü. Rü Nanatüxütawa nanayaxu ga yema üüne yerü nügümaã nüxú nawüxicèx ga nüma. ¹⁵ Rü gumachigaxü nixí ga yaxuxü ga Cuáü ga yexguma ñaxgu: —Daa nixí ga guma pemaã nüxü chixuchigacü ga yexguma ñachaxgu:

“Rü yima choweama ne ücü rü choxü rüyexeracü nixí, yerü woetama marü nayexma ga tauta chabuxgu ga chomax”, ñanagürü ga Cuáü. ¹⁶ Rü yima Tupana Nane rü namecümáxüchi rü naxmêxwa nangêxma i guxüma. Rü naxütawa nixí i nayauxgüxü i guxüma i ngüxêêgü. ¹⁷ Rü Moïchéxü nixí ga namuxü ga Tupana na tüxü nangúexêêxücèx ga yema norü mugü. Natürü Ngechuchu ya Cristuxü nixí ga namuxü na tüxü nangúexêêxücèx na yígü ingechaügüxü rü nagu imaxêxücèx i ore i aixcüma ixíxü. ¹⁸ Taguma texé ñuxgu nüxü tadau ga Tupana. Natürü Nane ya nügümaã nüxú wüxicacü nixí ya tüxü nüxü cuèxêécü. Rü yima Nane rü Tupanaxüchi nixí, rü Nanatümaã wüxiwa nangêxmagü.

Cuáü ga baiüxêêruü rü nüxü nixu ga Ngechuchu ya

Cristuchiga

(Mt 3.11-12; Mr 1.7-8; Lc 3.15-17)

¹⁹ Rü yema Yudíugüarü ãëxgacügü ga Yerucharéücũãx rü CuáŨ ga baiũxêêruũxõtawa nanamugü ga paigü rü Lebítanüxügü na nüxna yacagüexücèx na texe yiixũ. ²⁰ Rü nüma ga CuáŨ rü meãma nügü nixu, rü ñanagürü: —Tama nixĩ i Cristu chiixũ i chomax —ñanagürü. ²¹ Rü wenaxärü nüxna nacagü rü ñanagürügü: —¿Texé éxna quixĩ? ¿Éxna cuma ga nuxcümaũcü ga Tupanaärü orearü uruũ ga Ería quiixũ? —ñanagürügü. Rü CuáŨ nanangãxũ rü ñanagürü: —Tama Ería chixĩ —ñanagürü. Rü nümagü rü wenaxärü nüxna nacagüe rü ñanagürügü: —¿Éxna cuma quiixũ ya yima orearü uruũ ga Moïché nüxũ ixucü ga ínguxchaũcü? —ñanagürügü. Rü CuáŨ nanangãxũ rü ñanagürü: —Tama yima chixĩ —ñanagürü. ²² Rü yexguma ñanagürügüama: —¿Éxna texé quiixũ? Erü tanaxwèxe i ngẽma núma toxũ mugüxũxõtawa tanange i curü ngãxüga. ¿Rü ñuxũ ñacuxũ i ñuxma na texé quiixũ? —ñanagürügü. ²³ Rü CuáŨ nanangãxũ rü ñanagürü nüxũ: —Choma nixĩ i ngẽma duũxũ i dauxchitawa i ngextá taxúema íxãpataxüwa tagaãcü ñachaxũ:

“¿Rü nüxũ perüxoe i pecüma i chixexũ rü ipeyanawéxãchixêëx i perü maxũ naxcèx ya Cori ya Tupana!” ñachaxũ, guma nuxcümaũcü ga orearü uruũ ga Ichaxía nüxũ ixuxürüũ —ñanagürü. ²⁴⁻²⁵ Rü yexguma ga yema paigü rü Parichéugü yéma mugüxũ ga CuáŨmaã na yanadexagüxücèx rü wenaxärü nüxna nacagüe, rü ñanagürügü: —Rü ngëxguma tama Cristu quixĩgu, rü tama Ería quixĩgu, rü tama yima orearü uruũ ya ínguxchaũcü quixĩgu, ¿rü tüxcüũ i duũxügüxũ

ícbaiũxêẽxũ i ñuxmax? —ñanagürügü nüxũ. ²⁶⁻²⁷ Rü Cuáũ nanangãxũ rü ñanagürü: —Choma rü dexáwamare íchanabaiũxêẽ i duũxũgü. Natürü petanüwa nangêxma ya yima tama nüxũ pecuácü ya choweama ne ücü. Rü choma rü napéxewa rü taxuwama chame, rü bai i norü chapatucunügüarü wêgüwa chame —ñanagürü ga Cuáũ. ²⁸ Rü yema nachica ga Betániägu ägaxũwa nixĩ ga Cuáũ ga nüxũ yaxuxũ ga yema ore. Rü natü ga Yudáũrü tocutüwa nixĩ ga yema nachica ga ngextá Cuáũ duũxũgüxũ íbaiũxêẽxũwa.

Ngechuchu nixĩ ga Tupana núma namucü na duũxũgüarü pecaducèx nayuxüçèx

²⁹ Rü moxũãcü ga Cuáũ rü Ngechuchuxũ nadau ga naxcèx na yaxũxũ. Rü ñanagürü ga Cuáũ: —¡Rü dücax! Daa nixĩ ya yima Tupana núma namucü na nayuxüçèx na ñoma i nañecũãx i duũxũgüarü pecaduxũ iyanaxoxêẽxüçèx. ³⁰ —Rü choma rü daa Ngechuchuchi-gaxũ nixĩ ga chixuxũ ga yexguma ñachagu:

“Rü choweama ne naxü ya wüxi ya chorü yexeracü, yerü núma rü woetama nayexma ga tauta chabuxgu ga chomax”, ñachagu. ³¹ —Rü chomatama ga noxri rü tama nüxũ chacuèx ga texe na yĩxũ ga nümax. Natürü núma chaxũ na dexáwamare duũxũgüxũ íchibaiũxêẽtanüxüçèx na tatanüxũ i Yudíugü nüxũ cuèxgüxüçèx na texé yĩxũ —ñanagürü. ³² Rü ñanagürü ta ga Cuáũ: —Rü chomatama nüxũ chadau ga Tupanaã ga Üünexũ ga yexguma wüxi ga muxtucurüũ daxüwa ínaxexeegu rü Ngechuchuxũnegu yanawèxgux. ³³ —Choma rü noxri tama nüxũ chacuèx ga texe na yĩxũ ga nümax. Natürü ga Tupana ga choxũ

mucü na dexáwamare duũxũgũxũ íchabaiũxẽẽxũcèx, rü ñanagürü choxũ:

“Rü yima nüxũ cudaucü ya chauãẽ i Üünexũ naetügu íruxexeecü, rü yima tá nixĩ ya chauãẽ i Üünexũ duũxũgũna nguxẽẽcü”, ñanagürü choxũ. ³⁴ —Choma rü marü yima Ngechuchuxũ chadau rü pemaã nüxũ chixu na nüma rü aixcüma Tupana Nane yĩxũ —ñanagürü.

Nüxĩraũxũ ga norü ngúexũgü ga Ngechuchu

³⁵ Moxũãcü rü wenaxãrü Cuáũmaã yema nachicawa tayexmagü ga toma ga taxre ga norü ngúexũgü. ³⁶ Rü yexguma Ngechuchuxũ nadèuxgu ga yéma na naxüpetüxũ, rü Cuáũ rü ñanagürü toxũ: —¡Dücèx! Yima nixĩ ya Tupana núma namucü na pecaducèx nayuxũcèx —ñanagürü. ³⁷ Rü toma ga Cuáũãrü ngúexũgü rü nüxũ taxĩnüẽ ga yexguma yema ñaxgu. Rü Ngechuchuwe tarüxĩ. ³⁸ Rü nügü ínidau ga Ngechuchu, rü toxũ nadau ga nawe na tarüxĩxũ. Rü toxna naca rü ñanagürü toxũ: —¿Tacücèx pedau? —ñanagürü. Rü tomagü rü ñatarügügü: —Pa Ngúexẽẽruũx, ¿ngexta nixĩ i cupexũ? —ñatarügügü. ³⁹ Rü Ngechuchu toxũ nangãxũ, rü ñanagürü toxũ: —¡Nuã chowe perüxĩ rü ípeyadèux! —ñanagürü. Rü nawe tarüxĩ, rü nüxũ tadaugü ga na ngexta napexũ. Rü yexguma yéma tangugügu, rü marü ägümücüaru orawa nangu ga na nayáuanexũ. Rü yexma naxũtagu tarücho rü ñuxmata nachüta. ⁴⁰ Rü choma chixĩ ga noxri Cuáũ ga baiũxẽẽruũxũ chaxĩnüxũ ga yixcama Ngechuchuwe charüxũxũ. Rü chomücü rü Aũdré nixĩ. Rü nüma rü Pedru ga Chimáũẽneẽ nixĩ. ⁴¹ Rü yexgumatama ga Aũdré, rü naẽneẽ ga Chimáũcèx nayadau. Rü ñanagürü nüxũ: —Rü marü nüxũ itayangau ya yima Cristu ga nuxcüma

Tupana nüxũ unetacũ —ñanagürũ. ⁴² Rũ yemawena, rũ Ngechuchu íyexmaxũwa Chimáũxũ naga ga Aũdré. Rũ yexguma Ngechuchu Chimáũxũ deũxgu, rũ ñanagürũ nüxũ: —Cuma nixĩ i Chimáũ i Cuáũ nane quiixũ. Natürũ i ñuxmawena rũ Nuta tá nixĩ i cuéga —ñanagürũ. Rũ ngẽma naega rũ Pedru ñaxũchiga nixĩ.

Ngechuchu rũ naxcèx naca ga Piripi rũ Natanae

⁴³ Rũ moxũãcũ ga Ngechuchu rũ nügũ namexẽẽ na Gariréaanewa naxũxúcèx. Rũ Piripixũ inayangau rũ ñanagürũ nüxũ: —¡Chowe ruxũ! —ñanagürũ. ⁴⁴ Rũ nüma ga Piripi rũ ñãne ga Bechaídacũãx nixĩ. Rũ yémacũãx ta nixĩ ga Aũdré rũ Pedru. ⁴⁵ Rũ Piripi rũ Natanaeçèx nayadau, rũ ñanagürũ nüxũ: —Marũ nüxũ itayangau ya yima Cristu ga Moĩché nachiga naxümatücũ ga mugüarũ poperawa, rũ nuxcũmaũgũxũ ga Tupanaãrũ orearũ uruũgũ ta nachiga naxümatügücũ. Yima nixĩ ya Yúche nane ya Ngechuchu ya Nacharétucũãx —ñanagürũ. ⁴⁶ Rũ ñanagürũ ga Natanae: —¿Ñuxãcũ i tacũ rũ mexũ i Nacharétuwa ne naxũxũ? —ñanagürũ. Rũ Piripi nanangãxũ, rũ ñanagürũ nüxũ: —¡Dücèx, ngĩxã rũ ítayadau! —ñanagürũ. ⁴⁷ Rũ yexguma Ngechuchu Natanaeçũ deũxgu ga naxcèx na yaxũxũ, rũ ñanagürũ: —¡Dücèx! Yéa ne naxũ i wüxi i yatũ i aixcũma Yudfu ixĩxũ i aixcũma ngearũ chixexũáxũ —ñanagürũ. ⁴⁸ Rũ yexguma ga Natanae rũ Ngechuchuna naca, rũ ñanagürũ nüxũ: —¿Ñuxãcũ i choxũ cucuáxũ? —ñanagürũ. Rũ Ngechuchu nanangãxũ rũ ñanagürũ nüxũ: —Naxũpa ga Piripi cuçcèx na yaçaxũ, rũ choma rũ cuçxũ chadau ga yexguma orix ga igueratũũgu curũãũxgux —ñanagürũ. ⁴⁹ Rũ Natanae nanangãxũ rũ ñanagürũ nüxũ: —Pa

Ngúexẽeruũx, cuma rü Tupana Nane quixĩ. Rü cuma nixĩ i guxũma i Yudfugüarü Ñẽxgacü quiũxũ —ñanagürü. ⁵⁰ Rü Ngechuchu nanangãxũ, rü ñanagürü nüxũ: —Cuma rü choxũ cuyaxõ erü cumaã nüxũ chixu na igueratũũwa cuxũ na chadauxũ. Rü ngẽmacèxicatama nixĩ i cuyaxõxũ. Natürü ngẽma ñuxma nüxũ cudauxũärü yexera tá nixĩ i nüxũ cudauxũ i yixcúra —ñanagürü. ⁵¹ Rü ñanagürü ta ga Ngechuchu: —Rü aixcuma pemaã nüxũ chixu rü tá nüxũ pedaugü na yawãxnaxũ i daxüguxũ i naãne. Rü tá nüxũ pedaugü i Tupanaärü orearü ngeruũgü i daxücũãx i ngema daxũ ãgũxũ rü írũxĩgũxũ i naetüwa ya Tupana Nane ya duũxũxũ ixĩcü —ñanagürü.

2

Ngĩarü peta ga ãne ga Canáwa üxũ ga Gariréaanewa

¹ Rü yexguma marü tomaẽxpũx ga ngunexũ Gariréaanearü ãane ga Canáwa nayexmagu ga Ngechuchu, rü nayexma ga wüxi ga ngĩarü peta. Rü yemawa ngxina naxugü ga naẽ ga Ngechuchu. ² Rü Ngechuchuna rü toxna rü ta naxugüe na yéma taxĩxũcèx. ³ Rü nagux ga norü axexũ ga binu. Rü Ngechuchu naẽ ngĩgürügü nüxũ ga Ngechuchu: —Marü nagúarü binuãxgü —ngĩgürügü. ⁴ Natürü Ngechuchu ngĩxũ nangãxũ, rü ñanagürü: —Pa Mamax, ¿tũxcũũ chomaã nüxũ quixu i ngẽma? Erü tauta nawa nangu na chanaxüxcèx i tacü rü mexũ i Tupanaärü poramaã üxũ —ñanagürü. ⁵ Natürü ga ngĩma ga naẽ rü ngĩgürügü nüxũ ga yema baegũxũ namaã ga binuchiü: —jPenaxũx i guxũma i ngẽma nüma pemaã nüxũ yaxuxũ! —ngĩgürügü. ⁶ Rü yéma iyexma ga 6 ga tũxũ ga nutagüngĩxcèx. Rü wüxichigü ga yema tũxũwa rü maneca yexma name ga 50 rü éxna 70 litrugü ga dexá. Rü

yema tũxũgũ iyixĩ ga yema Yudũgũ ngĩxũ ixũgũãcugũcũ ga yexguma dexámaã nũgũ yayauxmẽxgũchaũgu na Tupanacèx nũgũ yamexẽẽgũxũcèx. ⁷ Rũ Ngechuchu rũ yema baegũxũxũ namu, rũ ñanagũrũ: —¡Dexámaã ngĩxũ pixũgũãcu i ñaã tũxũgũ! —ñanagũrũ. Rũ nũmagũ ga yema baegũxũ rũ meãma ngĩxũ nixũgũãcu. ⁸ Rũ Ngechuchu ñanagũrũ nũxũ: —Rũ ñuxma chanaxwèxe i íraxũ peyaxu, rũ petaarũ yoraxũtawa penange —ñanagũrũ. Rũ yemaãcũ nanaxũgũ ga yema baegũxũ. ⁹ Rũ yema petaarũ yora nũxũ naxaxneta ga yema dexá ga binuxũ nacèxichixũ. Natũrũ tama nũxũ nacuèx ga ngextá na nayauxgũãxũ. Rũ yema baegũxũxĩcatama nixĩ ga nũxũ cuèxgũxũ ga dexámare na yĩxũ ga noxrix. Rũ yexgumatama ga yema petaarũ yora rũ yema yatũ ga ingĩxũcèx naca. ¹⁰ Rũ ñanagũrũ nũxũ: —Guxũ i naãnewa rũ duũxũgũ rũ noxri rũ namaã nabae ya mecũ ya binu. Rũ ngẽxguma marũ meãma guxũma axegũgu i ngẽma nũxna naxuxũ, rũ ngẽmawena rũ nũxna nanaxã ya ngexcũrũũcũmare ya binu. Natũrũ i cuma rũ marũ nagũxchaũgu i peta, rũ mexèchicũ ya binumaãtama cuyaxaxegũxẽẽ i duũxũgũ —ñanagũrũ. ¹¹ Rũ guma Gariréaanewa yexmane ga ñãne ga Canáwa nixĩ ga yema naxũxũ ga Ngechuchu. Rũ yema nixĩ ga nũxĩraũxũ ga cuèxruũ ga Tupanaãrũ poramaã ũxũ ga nawa nũgũ inawéxũ ga Tupana Nane na yĩxũ. Rũ toma ga norũ ngúexũgũ rũ nũxũ tayaxõgũ. ¹² Rũ yemawena rũ Capernáũ ga ñãnewa naxũ ga Ngechuchu. Rũ naẽ rũ naẽneẽgũ rũ toma ga norũ ngúexũgũ rũ ta ítayaxũmũcũgũ. Rũ yema guma ñãnewa tayexmagũ ga ñuxre ga gunexũ.

Ngechuchu rũ tupauca ga taxũnewa ínanawoxũ ga yema

duïxũgü ga yéma taxegüxũ

(Mt 21.12-13; Mr 11.15-18; Lc 19.45-46)

¹³ Rü toma ga Yudíugü rü marü ningaica ga torü peta ga Üpetüchiga. Rü yemacèx ga Ngechuchu rü Yerucharéüwa naxũ. ¹⁴ Rü yexma tupauca ga taxũnegu nüxũ nayangau ga duïxũgü ga yéma norü wocagümaã rü carnerugümaã rü muxtucugümaã taxegüxũ. Rü yéma nüxũ nadau ta ga duïxũgü ga norü taxechicawa rütogüxũ rü Tupanaarü ämarewa mexũ ga dïerumaã yéma taxegüxũ. ¹⁵ Rü yexguma yemaxũ nadèuxgu ga Ngechuchu, rü nanaxü ga wüxi ga cüaixruũ ga naxchèxmünaxcèx. Rü yemamaã tupauca ga taxũnewa ínanawoxũ ga yema duïxũgü guxũma ga norü carnerugümaã rü wocagümaã. Rü yema dïerucèx taxegüxũärü dïeru rü ngïxũ narüwoũ ñaxtüanegu. Rü norü mechagü rü ta nüxũ nawoneta. ¹⁶ Rü yema muxtucugümaã taxegüxũxũ ñanagürü: —¡Ípeyana i ngëma perü muxtucugü i nuã! Tama name i taxepataũxũ peyaxixëë ya daa Chaunatüpata —ñanagürü. ¹⁷ Rü yexguma ga toma ga norü ngúexũgü rü nüxna tacuèxãchie ga nuxcümaũxũ ga ümatüxũ ga ñaxũ:

“Duïxũgü rü tá chauxchi naxaie erü chanachuxu i tacü i chixexũ na naxügüxũ i Tupanapatawa”,

ñaxũ. ¹⁸ Rü yexguma ga yema äëxgacügü rü Ngechuchuna nacagü, rü ñanagürügü: —¡Tacü rü cuèxruũxũ toxũ cud-auxëë na nawa nüxũ tacuáxũcèx na aixcüma Tupana yiixũ ya cuxũ mucü na ícunawoxũxũcèx i ñaã duïxũgü i nuã? —ñanagürügü. ¹⁹ Rü Ngechuchu nanangãxũ, rü ñanagürü: —¡Nagu pepogüe ya daa tupauca ya taxũne! Rü choma rü tomaëxpüx i ngunexügu rü tá wena íchanadaxëë —ñanagürü. ²⁰ Rü yexguma ga yema äëxgacügü rü nanangãxũgü, rü ñanagürügü: —Rü 46 ga taunecü nawa

napuracüe ga duïxügü na naxügüäxücèx ga daa tupauca ya taxüne. ¿Rü ñuxacü tá i cuma i tomaëxpüx i ngunexü tátama wena ícunadaxëëxü? —ñanagürügü. ²¹ Natürü guma Tupanapata ga Ngechuchu nachiga idexane rü naxünehigatama nixĩ. ²² Rü yemacèx ga toma ga norü ngúexügü, rü yexguma Ngechuchu yuwa írüdaxgu, rü nüxna tacuèxãchie ga yema ore ga Ngechuchu nüxü ixuxü. Rü aixcüma tayaxögü ga yema ore ga nüxü yaxuxü rü yema Tupanaärü ore ga nuxcümaügüxü ga orearü uruügü Ngechuchuchigagu ümatügüxü.

Ngechuchu rü nüxü nacuèx i guxüma i duïxügü

²³ Rü yexguma Ngechuchu Üpetüchigaarü petacèx Yerucharéüwa yexmagu, rü muxüma ga duïxügü rü nüxü nayaxögü, yerü nüxü nadaugü ga yema taxü ga mexügü ga Tupanaärü poramaã naxüxü. ²⁴ Natürü ga nüma ga Ngechuchu rü tama yema duïxügüméxëwa nügü nayexmaxëëchaü, yerü woetama marü nüxü nacuèx ga ñacügu na naxĩnüëxü ga guxüma ga yema duïxügü. ²⁵ Rü yemacèx ga nüma rü taxucèxma texé namaã nüxü tixu na ñacügu naxĩnüëxü ga yema duïxügü. Yerü nümatama marü nüxü nacuèx ga ñacügu na naxĩnüëxü ga naãëwa ga wüxichigü.

3

Ngechuchuxütagu nanaxüãne ga Nicodému

¹ Nayexma ga wüxi ga Parichéu ga Nicodémugu ãëgacü. Rü nüma rü wüxi ga ãëxgacü ga nüxü nangechaügücü nixĩ ga Yudfugütanüwa. ² Rü guma Nicodému rü Ngechuchuxütagu nanaxüãne ga chütacü. Rü ñanagürü Ngechuchuxü: —Pa Ngúexëëruüx, toma

nüxũ tacuèx na aixcüma Tupana núma cuxũ muxũ na toxũ cungúexëëxũcèx. Erü taxucürüwa texé cuxrũũ tanaxü i ngëma taxũ i mexũgü i Tupanaãrũ poramaã üxũ, ega tama Tupana tümaxütawa ngëxmagu —ñanagürü. ³ Rũ Ngechuchu nanangãxũ rü ñanagürü nüxũ: —Aixcüma cumaã nüxũ chixu, rü yíxema tama wenaxãrũ buxe rü taxucürüwama Tupana ãëxgacü íxixũwa tangu —ñanagürü. ⁴ Rũ Nicodému rü Ngechuchuna naca, rü ñanagürü nüxũ: —¿Natürü ñuxãcü i wüxi i yatü i marü yaxũ i wena nabuxũ? ¿Éxna wena naëñnügu naxücuxũ rü ngëmaãcü wena nabuxũ? —ñanagürü. ⁵ Rũ Ngechuchu nanangãxũ rü ñanagürü: —Rü aixcüma cumaã nüxũ chixu rü yíxema tama nüxũ rüxoxe i tümaãrũ pecadu rü tama Tupanaã i Üünexũwa nayaxúxe i maxũ i ngexwacaxũxũ, rü taxucürüwama Tupana ãëxgacü íxixũwa tichocu ⁶ —Yíxema duũxũwa buxe rü duũxũtama tixĩ. Natürü yíxema Naãe i Üünexũwa nayaxúxe i maxũ i ngexwacaxũxũ, rü Tupanaxãcü tixĩ. ⁷ —¿Tãütáma cubaixãchiãe na cumaã nüxũ chixuxũ na Tupana naxwèxexũ na guxũma i duũxũgü rü wena nabuexũ! ⁸ —Ya buanecü rü nüma ínanaxwèxexũwa nabu. Rũ nüxũ cuxĩnü i naga, natürü tama nüxũ cucuèx na ngextáama ne naxũxũ rü ngextáama na naxũxũ. Rũ ngëxgumarũũ ta tixĩgü ya guxãma ya yíxema Naãe i Üünexũwa nayaxúxe i maxũ i ngexwacaxũxũ —ñanagürü. ⁹ Rũ Nicodému wenaxãrũ Ngechuchuna naca, rü ñanagürü: —¿Natürü ñuxãcü nixĩ i ngëma? —ñanagürü. ¹⁰ Rũ Ngechuchu nanangãxũ, rü ñanagürü nüxũ: —Cuma rü Yudügüarü ngúexëëruũ i nüxũ cuáxũ quixĩ. ¿Rü ñuxãcü chi i cuma i tama nüxũ cucuáxũ i ngëma? ¹¹ —Aixcüma cumaã nüxũ chixu rü

toma rü namaã tidexagü i ngẽma nüxũ tacuáxũ. Rü norü uruũ tixĩgü i ngẽma nüxũ tadaugüxũ. Natürü pema rü tama toxũ peyaxõgü i ngẽma pemaã nüxũ tixuxũ. ¹² —Rü ñuxma na tama choxũ peyaxõgüxũ i ngẽma pemaã nüxũ chixuxũ i ñoma i naãneärü ngẽmaxũchiga, rü ¿ñuxácü tá peyaxõgüxũ ega pemaã nüxũ chixuxgu i daxüguxũ i naãneärü ngẽmaxũchiga? ¹³ —Taguma texé daxüguxũ i naãnewa taxü. Natürü i choma i Tupana Nane na duũxũxũ chiixũ, rü chaxicatama nixĩ i ngema ne chaxũxũ rü ngema tá chaxũxũ. ¹⁴⁻¹⁵ —Pema nüxũ pecuèx ga ñuxácü nuxcũmaxũchima yema nachica ga ngextá taxúema íxã-pataxũwa, rü Moíché wüxi ga naĩgu nanaxünagü ga yema äxtape ga dñerumünaxcèx. Rü ngëxgumarüũ tá ta i choma i Tupana Nane i duũxũxũ chiixũ, rü wüxi i naĩgu tá choxũ naxünagügü i duũxũgü na guxãma ya texé ya choxũ yaxõgüxe rü tüxũ nangëxmaxüçèx i maxũ i taguma gúxũ.

Tupana rü poraãcü nüxũ nangechaũ i ñoma i naãnecũãx

¹⁶ —Rü Tupana rü poraãcü nüxũ nangechaũ i ñoma i naãnecũãx i duũxũgü. Rü yemacèx inanamu ga Nane ga nügümaã wüxicacü na guxãma ya texé ya nüxũ yaxõgüxe rü tama itarütauxexüçèx rü tüxũ nangëxmaxüçèx i maxũ i taguma gúxũ. ¹⁷ —Yerü ga Tupana rü tama ñoma ga naãnewa nanamu ga Nane na duũxũgümaã naxueguãxüçèx na napoxcuexũ. Natürü núma nanamu na namaxëxëãxüçèx i duũxũgü. ¹⁸ —Rü yíxema Tupana Naneãxũ yaxóxë, rü Tupana rü tama tümamaã nanaxuegu na tapoxcuxũ. Natürü yíxema tama nüxũ yaxóxë, rü marü tümamaã nanaxuegu na tapoxcuxũ, erü tama nüxũ

tayaxõ ya yima Tupana Nane ya nügümaã wüxicacü. ¹⁹ —Rü yíxema tama nüxü yaxõgüxe, rü Tupana rü marü tü-mamaã nanaxuegu na tapoxcuexü. Yerü yexguma ñoma ga naãnewa nanguxgu ga Tupana Nane ya duïxügiarü ngóonexëeruü, rü tama nawe tarüxixchaü. Natürü yexera tümaärü me nixí ga ëänexüwaama na tayexmagüxü, yerü chixexü taxügi. ²⁰ —Guxāma ya yíxema chixexü ügüxe rü naxchi taxaie i ngóonexü. Rü tama nüxna tangaicamagüchaü erü tama tanaxwëxe na nangóxü i ngëma chixexü i itaxügi. ²¹ —Natürü yíxema aixcüma Tupanaärü ore nüxü ixuxüácüma meã maxëxë rü nüxna tangaicama i ngëma ngóonexü. Rü ngëmaäcü tanaxü na meã nangóxücèx na Tupanaärü ngüchaüácüma na yíixü i guxüma i ngëma taxügi —ñanagürü.

Cuáü ga baiüxëeruü rü wenaxärü nüxü nixu ga Ngechuchuchiga

²² Rü yemawena rü tomaã Yudéaanewa naxü ga Ngechuchu. Rü ñuxre ga ngunexü tomaã yéma nayexma rü yéma duïxügi. ²³ Rü Cuáü ga baiüxëeruü rü Enóärü iãnewa ga Charíarü ngaicamana rü ínanabaiüxë ta ga duïxügi yerü yéma nayexma ga taxü ga dexá. Rü yema yéma íngugüetanüxü ga duïxügi, rü Cuáü ínayabaiüxëetanü. ²⁴ Rü yemaäcü nangupetü naxüpa ga na poxcupataügu yatëxcuchixü ga Cuáü. ²⁵ Rü yexguma rü ñuxre ga norü ngüexügi ga Cuáü, rü wüxi ga Yudíumaã niporagatanücü nachiga ga nacümagü na ñuxäcü namexü na Tupanacèx nügi yamexëgi. ²⁶ Rü Cuáümaã nüxü nayarüxugü, rü ñanagürügi: —Pa Ngüexëeruüx, dücax guma yatü ga tomaã nüxü quixücü rü cumaã yexmacü ga natü

i Yudáŭrũ tocutuwa, rü yima rü ñuxma rü duũxũgũxũ ínabaiũxẽẽ, rü guxũma i duũxũgũ rü nawe narũxĩ — ñanagürügũ. ²⁷ Rü Cuáŭ nanangãxũ rü ñanagürü nüxũ: —Taxúema tacü tüxũ nangẽxma ega Tupana tama tüxna naxãxgu. ²⁸ —Pematama rü marü choxũ pexĩnüẽ ga yexguma ñachagu:

“Choma rü tama Cřistu chixĩ. Natürü choma chixĩ i Tupana yima Cristupẽxegu choxũ imuxũ na nüxũ chix-uxũcèx i nachiga”, ñachagu. ²⁹ —Rü wüxi i ngĩgüwa rü yima yatü ya ingĩcü rü naxmèxãrũ yora nixĩ. Rü yima yatümücü i naxũtawa ngẽxmaxũ rü nüxũ inarũxĩnü i norü ore. Rü nataãẽ i ngẽxguma nüxũ naxĩnügu i ngẽma na yadexaxũ. Rü ngẽxgumarũũ i choma rü aixcũma Cristumaã chataãẽxũchi i ñuxmax. ³⁰ —Nũma rü tá nixĩnagũchigü na ãẽxgacü yĩxũ, natürü i choma rü tá ícharũxĩchigü.

Yima daxũwa ne ũxcũchiga

³¹ —Rü yima Cřistu ya daxũwa ne ũxcü rü guxãetüwa nangẽxma. Natürü i choma rü ñoma i naãnewa changẽxma, rü ñoma i naãnecũãx chixĩ, rü ngẽma ñoma i naãnewa ngẽxmaxũchigaxũ chixu. Natürü i nüma ya Cřistu ya daxũwa ne ũxcü, rü guxãetüwa nangẽxma. ³² —Rü nüma rü tamaã nüxũ nixuchiga ga yema nüxũ nadauxũ rü nüxũ naxĩnüxũ. Natürü noxretama nüxũ nayaxõgü i ngẽma nüxũ yaxuxũ. ³³ —Natürü ngẽxguma texé nüxũ yaxõxgu i norü ore, rü ngẽmaãcü tanangõxẽẽ na aixcũma yĩxũ i ngẽma Tupana nüxũ ixuxũ. ³⁴ —Rü yima Tupana núma namücü, rü Tupanaãrũ orexũ nixu. Erü Tupana rü nüxna nanamu i Naãẽ i Üünexũ na guxũguma naxũtawa nangẽxmaxũcèx. ³⁵ —Rü Tanatü ya Tupana

rü Nanexũ nangechaũ. Rü ngẽmacèx marü naxmèxwa nanangẽxmaxẽẽ i guxũma i ÷acü i ngẽxmaxũ. ³⁶—Rü yíx-ema Tupana Naneãxũ yaxóxẽ rü tüxũ nangẽxma i maxũ i taguma gúxũ. Natürü yíxema tama nüxũ yaxóxchaũxẽ ya Tupana Nane, rü täütáma tüxũ nangẽxma i ngẽma maxũ i taguma gúxũ. Natürü tá tanayaxu i ngẽma ãücümaxũ i poxcu i Tupana tá namaã tüxũ poxcuxũ —ñanagürü ga Cuáũ ga baiũxẽẽruũ.

4

Ngechuchu rü Chamáriaanecũãx ga ngecü

¹ Rü Parichéugü rü nüxũ nacuáchigagü ga Ngechuchu rü Cuáũãrü yexera nüxũ na nayexmaxũ ga norü ngúexũgü, rü norü yexera duũxũgüxũ na ínabaiũxẽẽxũ. ² Natürü tama Ngechuchu nixĩ ga ínabaiũxẽẽcü ga duũxũgü. Rü toma ga norü ngúexũgü tixĩ ga tanaxüxũ ga yema. ³ Rü yexguma Ngechuchu nüxũ ñnügu ga Parichéugü rü nachigagu na yadexagüxũ, rü yéma Yudéaanewa ítachoxũ na Gariréaanecèx tawoeguxũ. ⁴ Natürü ga yema nama ga nagu tawoeguxũ rü Chamáriaanewa nadapetü. ⁵ Rü yemacèx ga toma rü nawa tangugü ga wüxi ga Chamáriaaneãrü ñãne ga Chicaru. Rü guma ñãneãrü ngaicamana nayexma ga yema naãne ga nuxcümaũcü ga Acobuaxũ yexmaxũ rü yixcama rü nane ga Yúchena naxãxũ. ⁶ Rü yéma nayexma ga wüxi ga puchu ga duũxũgü dexácèx ixaixmaũgücü ga Acobuarü Puchugu ãegacü. Rü poraãcü nipa ga Ngechuchu ga namagu na yaxüxũ. Rü yemacèx guma puchuxütawa nayarütoõchi. Rü tocuchiwa nanguxchaũ ga yexguma. ⁷⁻⁸ Rü toma ga norü ngúexũgü rü guma ñãnewa taxĩ na

torü ðnacèx tayataxegüxcèx. Rü towena yéma ingu ga wüxi ga ngecü ga Chamáriaanecũãx ga guma puchuwa dexáwa ücü. Rü Ngechuchu rü ñanagürü ngĩxũ: —Íraxũ i dexá choxna naxã! —ñanagürü. ⁹ Natürü ga yema nge rü ibaixãchiãe yerü ga Yudíugü rü Chamáriaanecũãxgümaã nügüchi naxaie rü yemacèx ga yema nge rü inangãxũ rü ngĩgürügü nüxũ: —¿Ñuxãcü i cuma na Yudú quiĩxũ i dexácèx choxna cuçaxũ i choma na Chamáriaanecũãx chiĩxũ? —ngĩgürügü. ¹⁰ Rü Ngechuchu ngĩxũ nangãxũ, rü ñanagürü: —Ngëxguma chi nüxũ cucuèxgu i ngëma mexũ i Tupana cuxna ãxchaũxũ, rü chi nüxũ cucuèxgu na texé yĩxũ ya yima dexá cuxna taçacü, rü cuma rü chi nüxnata cuca i dexá i maxũ nawa ngëxmaxũ rü nüma rü chi cuxna nanaxã i ngëma dexá —ñanagürü. ¹¹ Rü yema ngecü inangãxũ, rü ngĩgürügü nüxũ: —Pa Corix, ¿ñuxãcü tá i dexáta cuyaxu? Erü daa puchu rü namátamaxüchi rü cuxũ nataxuma na tacümaã cunayaxuxüçèx i dexá. ¿Rü ngextá tá i cunayaxuxũ i ngëma dexá i maxũ nawa ngëxmaxũ na choxna cunaxãxüçèx? ¹² —Nuxcümaücü ga tórü oxí ga Acobu toxçèx núma Chamáriaanewa nanatèx ga daa puchu. Rü gumawa nixĩ ga naxaxexũ ga nüma rü nanegü rü norü wocagü. ¿Rü ñuxãcü chi i cuma i norü yexera quiĩxũ? —ngĩgürügü. ¹³ Rü Ngechuchu ngĩxũ nangãxũ, rü ñanagürü: —Rü guxãma ya texé ya daa pucharü dexáwa axexe, rü wena táxarü tiçawae. ¹⁴ —Natürü texé ya yíxema choma tüxna chaxãxũ i dexáwa axexe, rü tagutáma wena tiçawa. Erü ngëma dexá i choma tüxna chaxãxũ rü wüxi ya puchu ya guxüguma ibalbecürüũ tá nixĩ i tümawa, erü ngëma dexáwa nangëxma i maxũ i taguma gúxũ —ñanagürü. ¹⁵ Rü ngĩma ga yema nge rü inangãxũ rü ngĩgürügü:

—Pa Corix, ¡choxna naxã i ngẽma dexá na taguma wena chitawaxũcèx, rü taguma wena daa puchuwa dexáwa chaxũxũcèx! —ngĩgürügü. ¹⁶ Rü Ngechuchu ñanagürü ngĩxũ: —¡Íyadau ya cute, rü naxcèx yaca, rü nuã pexĩ! —ñanagürü. ¹⁷ Rü yema ngecü rü inangãxũ, rü ngĩgürügü nüxũ: —Nataxuma ya chaute —ngĩgürügü. Rü Ngechuchu ñanagürü ngĩxũ: —Aixcüma nixĩ i ngẽma nüxũ quixuxũ na nataxuũma ya cute. ¹⁸ —Yerü wüximéẽxpüxchiréx nixĩ ga cute, rü yima ñuxma cuxütawa ngẽxmacü rü tama aixcüma cutexüchi nixĩ. Rü ngẽmacèx aixcüma nixĩ i curü ore i chomaã nüxũ quixuxũ —ñanagürü. ¹⁹ Rü yexguma yemaxũ naxĩnügu ga yema ngecü, rü ngĩgürügü: —Pa Corix, nüxũ chicuèxãchi rü cuma rü wüxi i Tupanaãrü orearü uruũ quixĩ. ²⁰ —Nuxcümaũgüxũ ga torü oxigü ga Chamáriaanecũãxgü rü daa mèxpúne ga Garachĩüwa Tupanaxũ nicuèxüũgü. Natürü i pema i Yudügü rü ñaperügügü:

“Rü Yerucharéü nixĩ i nachica i mexũ i ngextá Tupanaxũ ticuèxüũgü”, ñaperügügü. ²¹⁻²² Rü Ngechuchu ngĩxũ nangãxũ rü ñanagürü: —Pema i Chamáriaanecũãxgü rü tama aixcüma nüxũ pecuèxgü ya yima nüxũ picuèxüũgücü. Natürü toma i Yudügü rü aixcüma nüxũ tacuèx ya yima nüxũ ticuèxüũgücü, erü Yudügügagu nixĩ i Tupana namaxèxèxũ i guxüma i duũxũgü. ¡Choxũ yaxõ, Pa Ngecüx! Rü aixcüma ínangu tá i ngunexũ na tãütáma daa mèxpúnewa rü éxna Yerucharéüwa tá nüxũ na picuèxüũgüxũ ya Tanatü ya Tupana. ²³ —Erü yíxema aixcüma Tupanaxũ icuèxüũgüxe rü nüetama nixĩ i ngèxürüüxümare i nachicawa Tupanaxũ ticuèxüũgü. Erü ñuxma rü ngẽma

Naãe i Üünexũ naxwèxexũ nixĩ na guxũma i tümaãẽmaã rü tümaãrü maxũmaã aixcũma Tupanaxũ ticuèxũũgũxũ. Rü ngẽmaãcü nixĩ i nanaxwèxexũ ya Tanatü na nüxũ ticuèxũũgũxũ. ²⁴ —Erü Tupana rü wüxi i Naãe nixĩ. Rü ngẽmacèx yíxema texé ya nüxũ icuèxũũgũxe rü tanaxwèxe i guxũma i tümaãẽmaã rü tümaãrü maxũmaã na aixcũma nüxũ ticuèxũũgũxũ, ngẽma Naãe i Üünexũ naxwèxexũãcüma —ñanagürü. ²⁵ Rü yema ngecü inangãxũ rü ngĩgürügü: —Choma nüxũ chacuèx rü tá ñoma i naãnewa nangu ya yima Cristu ya Tupana nüxũ unetacü. Rü ngëxguma yima núma üxgu rü tá tamaã nanangoxèẽ i guxũma i Tupanachiga —ngĩgürügü. ²⁶ Rü Ngechuchu rü ñanagürü ngĩxũ: —Choma na cumaã chidexaxũ, rü yima chixĩ —ñanagürü. ²⁷ Rü yexguma íyadexayane rü ítangugü ga toma ga norü ngúexũgü. Rü tabaixãchiãẽgü yerü ga Ngechuchu rü wüxi ga ngecümaã ínidexa. Natürü taxúema ga toma rü togü taporaxèẽ ga nüxna na tacagũxũ ga tacü ngĩmaã na nanaxwèxexũ rü tacüchiga yiixũ ga ngĩmaã na íyadexaxũ. ²⁸ Rü yexguma ga yema ngecü rü yéma ngĩxũ itèx ga ngĩrü tũxũ. Rü ñãnewa ixü na duũxũgũmaã nüxũ yanaxuxücèx. ²⁹ Rü ngĩgürügü: —¡Ngĩxã rü ítayadaugü i wüxi i yatü i chomaã nüxũ ixuxũ ga guxũma ga tacü ga chaxũxũ! ¿Taux éxna yima yiixũ ya Cristu? —ngĩgürügü. ³⁰ Rü inaxĩachi ga yema ñãnecũãx, rü Ngechuchu íyexmaxüwa naxĩ. ³¹ Rü yoxni ga toma ga norü ngúexũgü rü Ngechuchuxũ tachixewegü na nachibüxücèx. ³² Natürü ga nüma rü ñanagürü toxũ: —Choma rü choxũ nangëxma i chowemü i pema tama nüxũ pecuáxũ —ñanagürü. ³³ Rü yexguma ga toma ga norü ngúexũgü rü togüna tacagüe,

rü ñatarügügü: —Bexmana marü ¿texé nuã tanange i nawemü? —ñatarügügü. ³⁴ Natürü ga Ngechuchu rü ñanagürü toxü: —Ngëma õna i choxü poraxëxü nixĩ na chanaxüxü i norü ngúchaũ ya yima nuã choxü mucü ya Chaunatü, rü na chayanguxëxü i norü puracü. ³⁵ —Rü pema rü ñaperügügü:

“Rü ägümücü ya tauemacü nataxu na yabuxgüxü i trigu”, ñaperügügü. Natürü i choma rü ñacharügü pexü:

“¡Düçèx, rü meã penangugü i duüxügü! Erü marü ínamegü na Tupanaxü nayauxgüxcèx, ngëxgumarüü i wüxi i trigunecü i marü nawa nanguxü na yabuxgüxü erü marü nidau”. ³⁶ —Rü yíxema Tupanacèx nadexe i duüxügü rü tá tanayaxu i túmaärü natanü. Rü guxüma i ngëma duüxügü i tüxü irüxĩnüëxü rü tá nanayauxgü i maxü i taguma gúxü. Rü ngëmaäcü rü wüxigu tá tataäëgü ya yíxema tüxira ngëma duüxügümaã Tupanaärü orexü ixuxe rü yíxema yixcama ngëma duüxügüxü Tupanacèx dexe. ³⁷ —Rü aixcüma nixĩ i ngëma ore i ñaxü:

“Wüxie tixĩ ya namaã toexe i trigu rü togue tixĩ ya yíxema yabuxgüxe i norü o”, ñaxü. [Rü ngëxgumarüü rü wüxie tixĩ ya tüxira duüxügümaã nüxü ixuxe i Tupanaärü ore, rü togue tixĩ ya yixcama ngëma duüxügüxü dexe Tupanacèx.] ³⁸ —Rü noxri rü togü nixĩ ga duüxügümaã nüxü ixuxü ga Tupanaärü ore, natürü ga duüxügü rü tama nayaxögü ga yexguma. Rü yemawena rü pexü chamu na yema duüxügümaã nüxü pixuxücèx ga yema ore. Rü pema nixĩ ga yema duüxügüxü pedexü Tupanacèx, yerü nayaxögü ga yexguma namaã nüxü pixuxgu ga yema ore. Rü yemaäcü ga pema rü marü peyoxnië nawa ga togüarü puracü —ñanagürü. ³⁹ Rü muxüma ga guma

Chamáriaanewa yexmane ga ãñecũãx rü Ngechuchuaxũ nayaxõgü, yerü nüxũ nayaxõgü ga yema ore ga yema ngecü namaã nüxũ ixuxũ ga yexguma ngĩxgu:

“Guxũma ga tacü ga ũpa chaxũxũ rü chomaã nüxũ nixu” ngĩxgu. ⁴⁰ Rü yemacèx ga yema Chamáriaanecũãxgü rü yexguma Ngechuchuxũtawa nangugügu rü nüxũ nacèxügü ga yexma natanügu na naxãũxücèx. Rü taxre ga ngunexũ yexma natanügu narũãũx ga Ngechuchu. ⁴¹ Rü muxũma ga togüamachigü ga Chamáriaanecũãxgü rü Ngechuchuaxũ nayaxõgü ga yexguma nüxũ naxĩnüègu ga yema norü ore ga nümatama nüxũ yaxuxũ. ⁴² Rü yexguma ga yema duũxügü rü ñanagürügü ngĩxü ga yema ngecü: —Ñuxma waxi nixĩ i aixcũma nüxũ tayaxõgüxũ erü tomatama nüxũ taxĩnüè i ngẽma norü ore i tomaã nüxũ yaxuxũ. Rü ngẽmawa nüxũ tacuèx na aixcũma yima yĩxũ ya Cristu ya ñoma i naãñecũãx i duũxügüarü maxèxèruũ. Rü tama ngẽma cuma tomaã nüxũ quixuxücèxicatama tayaxõgü —ñanagürügü.

Ngechuchu rü nanamexèè ga wüxi ga ãèxgacü nane

⁴³ Rü taxre ga ngunexũguwena ga Ngechuchu rü tomaã inaxũãchi ga Chamáriaanewa na Gariréaanewa naxũxücèx. ⁴⁴ Rü nümatama ga Ngechuchu ga ũpacü rü ñanagürü: —Wüxi i Tupanaãrü orearü uruũ, rü norü naãnewatama i duũxügü rü tama meã nanayauxgü —ñanagürü. ⁴⁵ Natürü yexguma Gariréaanewa tangugügu, rü yema naãñecũãx ga duũxügü rü meãma nanayauxgü. Yerü nümagü ga yema naãñecũãxgü rü Yerucharéüwa naxĩ ta naxcèx ga Üpetüchigaarü peta, rü yéma nüxũ nadaugü ga yema taxũ ga mexügü ga Tupanaãrü poramaã naxũxü ga Ngechuchu ga yexguma. ⁴⁶ Rü ga Ngechuchu

rü tomaã nataegu naxcèx ga guma ããne ga Caná ga Gariréanewa yexmane. Rü guma ããnewa nixĩ ga binuxũ nanguxuchixêãxũ ga dexá. Rü ããne ga Capernáüwa nayexma ga wüxi ga tacü ga ãëxgacü, rü nidaawe ga wüxi ga nane. ⁴⁷ Rü yexguma guma ãëxgacü nüxũ cuáchigagu ga Ngechuchu rü Gariréanewa na nanguxũ ga Yudeaanewa na ne naxũxũ, rü naxütawa naxũ. Rü nüxũ nayacèèxũ na napatawa naxũxũcèx, rü naxcèx na yanataanexêãxũcèx ga guma nane ga marü turaxüchicü. ⁴⁸ Rü Ngechuchu nanangãxũ, rü ñanagürü nüxũ: —Pema rü tama peyaxögü ega tama nüxũ pedauxiragu i taxũ i cuèxruügü i Tupanaãrü poramaã üxũ —ñanagürü. ⁴⁹ Natürü ga guma ãëxgacü rü ñanagürü nüxũ: —Pa Corix, ¡paxa chowe rüxü naxũpa na nayuxũ ya chaune! —ñanagürü. ⁵⁰ Rü Ngechuchu nanangãxũ rü ñanagürü nüxũ: —¡Nataegu i cupatawa! Erü cune rü marü naxcèx nitaane —ñanagürü. Rü guma yatü rü nayaxõ ga yema ore ga Ngechuchu namaã nüxũ ixuxũ. Rü napatacèx nataegu. ⁵¹ Rü yexguma napatawa nanguxchaũgu ga guma ãëxgacü, rü norü duũxũgü napéxegu nayayi, rü ñanagürügü nüxũ: —Cune rü marü naxcèx nitaane —ñanagürügü. ⁵² Rü yexguma rü norü duũxũgüna naca, rü ñanagürü nüxũ: —¡Tacü rü oragu inaxügüxũ na naxcèx yataanexũ? —ñanagürü. Rü yema norü duũxũgü nanangãxũ rü ñanagürügü: —Ñe tocuchiguwena nixĩ ga nüxũ nangupetüxũ ga na yaxaxünexũ —ñanagürügü. ⁵³ Rü guma bucü nanatü rü nüxna nacuxãchi ga yema oragu na yĩxũ ga Ngechuchu ga ñaxũ nüxũ:

“Cune rü marü naxcèx niãane” ñaxũ. Rü nüma ga guma ãëxgacü rü guxũma ga napatacũãx rü

Ngechuchuaxŭ́ nayaxōgü. ⁵⁴ Rŭ yexguma Yudéaanewa ne naxŭxgu ga Ngechuchu, rŭ yema nixí ga norŭ taxre ga cuèxruŭ́ ga taxŭ́ ga Tupanaārŭ́ poramaã duŭxŭgŭxŭ́ nawéxŭ́ ga Gariréaanewa.

5

*Ngechuchu rŭ nanamex*ēē ga wŭxi ga yatŭ ga idaawexŭ́ ga Betechawa yexmaxŭ́

¹ Rŭ ñuxre ga ngunexŭgŭ́ ngupetŭguwena rŭ nayexma ga wŭxi ga peta ga Yudŭgŭ́ aurgŭxŭ́ na yemaäcŭ́ Tupanaxŭ́ yacuèxŭŭgŭxŭ́cèx. Rŭ yemacèx ga Ngechuchu rŭ Yerucharéŭ́cèx nataegu. ² Rŭ guma ããneārŭ́ poxeguxŭ́ rŭ nüxŭ́ nayexma ga wŭxi ga ããx ga Carneruarŭ́ Choxŭ́chicagu äegaxŭ́. Rŭ yema ããxārŭ́ ngaicamana nayexma ga wŭxi ga puchu ga Yudŭgŭgawa Betechagu äegaxŭ́. Rŭ guma puchuanacŭwa nayexma ga wŭximéēxpŭx ga chopetŭchica ga äxpataŭetŭgŭxŭ́. ³ Rŭ yema chopetŭchicagu nacagŭ́ ga muxŭma ga duŭxŭgŭ́ ga idaaweexŭ́. Rŭ nümaxŭ́ rŭ nangexetŭgŭ́, rŭ togŭ́ rŭ nachixeparagŭ́, rŭ togŭ́ rŭ nanawãixächigŭ́. Rŭ yema idaaweexŭ́ rŭ yéma nananguxēēgŭ́ ga guma puchu ga na naxãxächichiŭxŭ́cèx. ⁴ Yerŭ ñuxguacŭ́ rŭ guma puchugu ínarŭxŭxŭ́ ga wŭxi ga daxŭcŭ́ãx ga Tupanaārŭ́ orearŭ́ ngeruŭ́, rŭ nayaxãxchiŭcŭŭxŭ́cèx. Rŭ guxema tŭxira tŭgŭ́ yéma táexe nachiŭwa ga guma puchu ga yexguma yaxãxchiŭcŭŭgu, rŭ tŭmacèx nitaane woo ga ngëxŭrŭŭmare ga daawe tŭxŭ́ yexmaxē. ⁵ Rŭ yéma natanŭwa nayexma ga wŭxi ga yatŭ ga marŭ́ 38 ga taunecŭ́ idaawecŭ́. ⁶ Rŭ yexguma Ngechuchu nüxŭ́ dèuxgu ga guma yatŭ ga yexma na nacaxŭ́, rŭ nüxŭ́ nacuáchiga ga marŭ́ mucŭma ga taunecŭ́ na

yadaawexũ. Rũ yemacèx nüxna naca rũ ñanagürü nüxũ: —¿Cunaxwèxexũ i cuxcèx na yataanexũ? — ñanagürü. ⁷Rũ Ngechuchuxũ nangãxũ ga guma idaawecü, rũ ñanagürü: —Pa Corix, tataxuma ya texé ya choxũ rüngũxèxè na ngema choxũ tataéxücèx i ngëxguma naxĩãxãchichiügu ya daa puchu. Rũ guxüguma i ngëxguma ngema chaugü chatáechaügu, rũ yoxni i togü rũ marü nüxira nügü ngema natáegü —ñanagürü. ⁸ Rũ Ngechuchu rũ ñanagürü nüxũ: —¿Inachi, rũ nayaxu i curü caruũ, rũ íxũ! —ñanagürü. ⁹⁻¹⁰ Rũ yexgumatama naxcèx nitaane ga guma yatü. Rũ nanayaxu ga norü caruũ, rũ ínixũ. Natürü ga yema ngunexũ rũ ngũxchigaarü ngunexũ nixĩ. Rũ yemacèx ga yémacũãxgü ga Yudúgüarü ãëxgacügü rũ ñanagürügü nüxũ ga guma yatü ga naxcèx itaanecü: —Ñoma nixĩ i ngũxchigaarü ngunexũ. Rũ ngëmacèx nachuxu nixĩ na cuyangexũ i curü caruũ erü yemaãcü tamaã nüxũ nixu ga Moïché —ñanagürügü. ¹¹ Natürü ga guma yatü rũ yema Yudúgüarü ãëxgacügüxũ nangãxũ, rũ ñanagürü: —Yima choxũ rümexèècü rũ ñanagürü choxũ:

“¿Nayaxu i curü caruũ rũ íxũ!” ñanagürü. ¹² Rũ yexguma ga yema ãëxgacügü rũ nüxna nacagü, rũ ñanagürügü: —¿Texé ngëma ñatarügü cuxũ:

“¿Nayaxu i curü caruũ rũ íxũ!” ñatarügü cuxũ? — ñanagürügü. ¹³ Natürü ga guma yatü rũ tama nüxũ nacuèx ga texé naxcèx na yataanexèèxũ, yerü namuxüchi ga duũxügü ga yéma, rũ yexma nayarütaxu ga Ngechuchu. ¹⁴ Natürü yixcama ga Ngechuchu rũ tupauca ga taxũnegu nüxũ nayangau ga guma yatü, rũ ñanagürü nüxũ: —¿Dücèx i ñuxma marü cuxcèx na yataanexũ,

rü tãütáma wena chixexũ cuxü na tama quidaawexũcèx namaã i wüxi i ðaawe i ngẽma marü cuxũ ngupetüxũãrũ yexera ixĩxũ! —ñanagürü. ¹⁵ Rü ínixü ga guma yatü, rü Yudíugüarü ãëxgacügümaã nüxũ nayarüxu ga Ngechuchu na yĩxũ ga guma namexẽcũ. ¹⁶ Rü yemacèx nixĩ ga yema ãëxgacügü ga Ngechuchucèx nadaugüxũ na yamèxgüãxũcèx, yerü ngüxchigaarü ngunexügu napuracü. ¹⁷ Natürü ga Ngechuchu rü ñanagürü nüxũ: — Chaunatü ya Tupana rü guxũ i ngunexügu napuracü rü mexũ naxü. Rü ngẽmacèx i choma rü ta naxrüũ chapuracü —ñanagürü. ¹⁸ Rü yemacèx ga yema Yudíugüarü ãëxgacügü rü yexeraãcü Ngechuchuxũ nimèxgüchaũ. Yerü tama naxrüũ nanaxaure ga ngüxchigaarü ngunexü rü ñuxüchi nüxũ nixu ga Nanatüxüchi na yĩxũ ga Tupana, rü yemaãcü nügü nixu ga Nanatü ga Tupanamaã na nawüxiguxũ.

Nüma ga Tupanatama nixĩ ga Nanena naxããxũ ga pora

¹⁹ Rü yexguma ga Ngechuchu rü ñanagürü nüxũ ga yema ãëxgacügü: —Aixcüma pemaã nüxũ chixu rü choma i Tupana Nane rü tama chorü poramaã chanaxü i ðacü rü puracü i mexũ. Natürü ngẽma nüxũ chadauxũ i Chaunatü üxũxĩcatama nixĩ ichaxüxũ. Rü guxũma i ngẽma Chaunatü üxũ, rü choma ya Nane rü ta chanaxü. ²⁰ — Chaunatü ya Tupana rü choxũ nangechaũ, rü ngẽmacèx choxũ nüxũ nadauxẽẽ i guxũma i ðacü i nüma naxüxũ. Rü ngẽma ñuxma choxũ nüxũ nadauxẽẽxũãrũ yexera tá choxũ nüxũ nadauxẽẽ i yixcüra. Rü ngëxguma i pema ega ngẽmaxũ pedaugügu, rü tá peþaixãchiãëgü namaã. ²¹ — Rü Chaunatü rü ínanadagüxẽẽ i yuexügü rü wena nana-maxẽxẽẽ. Rü ngëxguma-rüũ ta i choma i Nane rü tüxna

chanaxã i maxũ ya yixema chatumawexexe na tuxna chanaxãxũ. ²²⁻²³ —Rũ tama Chaunatu nixĩ ya duũxũgũxũ icagũcũ i norũ maxũchiga. Natũrũ choxũ nixĩ i namuxũ na chanaxũxcèx i ngẽma, na choxũ yacuèxũũgũxũcèx i duũxũgũ, ngẽma Chaunatũxũ na yacuèxũũgũxũrũũ. Rũ yixema tama choxũ icuèxũxũxẽ, rũ tama nũxũ ticuèxũũ ta ya Chaunatu ya choxũ nuã mucũ. ²⁴ —Aixcũma pemaã nũxũ chixu rũ yixema texé ya choxũ irũxĩnũxẽ i chorũ ore, rũ nũxũ yaxóxẽ ya yima Chaunatu ya núma choxũ mucũ, rũ tũxũ nangẽxma i maxũ i taguma gũxũ. Rũ Chaunatu rũ tãũtãma tũmamaã nanaxuegu na tapoxcuxũ erũ marũ nawa ítanguxuchi na tayuxũ, rũ tũxũ nangẽxma i maxũ i taguma gũxũ. ²⁵ —Rũ aixcũma pemaã nũxũ chixu rũ marũ nawa tá nangu i ngunexũ rũ ñuxmatama nixĩ i chauga naxĩnũèxũ tá i ngẽma duũxũgũ i norũ pecadugu yuexũ rũ iyarũtauxexũ. Rũ texé ya chauga ñnũèxẽ rũ tá tamaxẽ. ²⁶ —Nũma ya Chaunatu rũ nũxũ nangẽxma i pora na namaxẽxẽãxũcèx i duũxũgũ. Rũ ngẽma pora rũ choxna nanaxã ya Chaunatu na choma rũ ta duũxũgũxũ chamaxẽxẽãxũcèx. ²⁷ —Rũ Chaunatu ya Tupana choxũ namu na duũxũgũna chaçaxũcèx naxcèx i norũ maxũchiga, erũ choma nixĩ i Nane i duũxũxũ chiĩxũ. ²⁸ —jTãxũ i pebaixãchiãègũxũ namaã i ñãã ore i pemaã nũxũ chixuxũ! Erũ tá ínangu i ngẽma ngunexũ i nagu guxũma i duũxũgũ i yuexũ rũ tá na nũxũ naxĩnũèxũ i chauga. ²⁹ —Rũ naxmaũgũwa tá ínachoxũ. Rũ ngẽma meã maxẽxũ, rũ tá ínarũdagũ na nayauxgũãxũcèx i maxũ i taguma gũxũ. Natũrũ ngẽma chixexũ ùgũxũ, rũ tá ínarũdagũ na napoxcuexũcèx.

Nawa nüxũ icuáxũ na Tupana yĩxũ ga Ngechuchuna naxãcü ga pora

³⁰ —Choma rü taxucürüwa tacü chaxü chauechamatama ega tama choxũ naxüxëãgu ya Chaunatü. Rü Chaunatü chomaã nüxũ ixuxüãcüma nixĩ i nüxna chaçaxũ i duũxügü i norü maxüchiga. Rü ngëxguma nüxna chacaxgu rü aixcüma meãma chanangugü i duũxügü. Erü tama choxrütama ngúchaũ nixĩ i ngëma chaxüxũ, natürü Chaunatü ya nuã choxũ mucüarü ngúchaũ nixĩ i ngëma chaxüxũ.

³¹ —Rü ngëxguma chi chauchigaxütama chixuxgu rü taxuwama name i ngëma. ³² —Natürü nangëxma i to i chauchigaxũ ixuxũ. Rü nüxũ chacuèx rü aixcüma nixĩ i norü ore i pemaã nüxũ yaxuxũ. ³³ Pema rü Cuáũ ya baiüxëãruüxütawa penamugü ga perü duũxügü na nüxũ pecuáxücèx ga ore ga aixcüma ixixũ ga chauchiga. Rü yema ore ga Cuáũ pexũ namaã ngãxüxũ rü aixcüma nixĩ. ³⁴ —Natürü i choma rü tama chanaxwèx i tacü rü yatü chauétüwa nachogü, erü choma tátama chaugüna chadau. Natürü pemaã nüxũ chixu i ngëma Cuáũãrü ore na choxũ peyaxögüxücèx rü na penayauxgüxücèx i maxũ i taguma gúxũ. ³⁵ —Cuáũ rü wüxi ga omü ga iyauracüüxü rü pexũ baxixũ-rüũ nixĩ ga pexcèx. Rü pema rü paxaãchi namaã petaãëgü. ³⁶ —Natürü nangëxma i tacü i Cuáũãrü orearü yexera chauétüwa íchogüxũ. Rü ngëma nixĩ ga yema taxügü ga cuèxruügü ga Chaunatü choxũ muxũ na norü poramaã chanaxüxücèx. Rü yemawa pexũ nüxũ chadauxëã na aixcüma Chaunatü ya Tupana yĩxũ ga núma choxũ mucü. ³⁷ —Rü ngëxgumarüũ ta ya Chaunatü ga guma núma choxũ mucü, rü marü chauétüwa ínachogü, woo taguma nüxũ pexĩnüë ga naga

rü taguma nüxü pedau. ³⁸ —Rü ngẽma Chaunatüarü ore rü ta tama peãẽwa nixücu, erü tama choxú peyaxõgü woo Chaunatü núma choxü na muxü. ³⁹⁻⁴⁰ —Pema meãma nawa pengúe i Tupanaãrü ore i ümatüxü, erü nagu perüxĩnüe rü ngẽmawa tá nüxü ipeyangau i perü maxü i taguma gúxü. Natürü woo ngẽmatama Tupanaãrü ore i ümatüxüwa rü chauchiga meã na yadexaxü, natürü i pema rü tama choxú peyaxõgüchaü na ngẽmaãcü penayauxgüxücèx i ngẽma maxü. ⁴¹⁻⁴² —Rü choma rü tama chanaxwèxe na choxü picuèxüüügüxü erü meãma pexü chacuèx, rü nüxü chacuèx na tama aixcüma Tupanaxü pengechaüügüxü. ⁴³ —Chaunatü ya Tupana nixĩ ga núma choxü mucü, natürü i pema rü tama choxü peyauxgüchaü. Natürü ngẽxguma chi tomare i yatü nagagutama núma üxgu, rü ngẽma chi nixĩ i taãẽcüma peyauxgüxü. ⁴⁴ —¿Rü ñuxãcü chi choxú peyaxõgü ega penaxwèxegu na pemücügütama pemaã taãèxü rü tama naxcèx pedaugügu na Tupanaxüchi pemaã taãèxü? ⁴⁵ —¡Tãxú i nagu perüxĩnüèxü na choma tá yĩxü na pexü chixugüxü i Chaunatüxütawa! Erü Moïché ga guma perü maxücèx nüxü peyaxõgücü tátama nixĩ ya yima pexü ixugücü i Chaunatüxütawa. ⁴⁶ —Rü ngẽxguma chi peyaxõgügu i ngẽma ore ga Moïché ümatüxü, rü choxü rü chi ta peyaxõgü. Yerü ga Moïché rü chauchigagu nixĩ ga naxümatüãxü ga norü poperawa. ⁴⁷ —Natürü ngẽxguma tama peyaxõgügu i ngẽma Moïché ümatüxü i ore, ¿rü ñuxãcü tá peyaxõgü i ngẽma choma pemaã nüxü chixuxü? —ñanagürü ga Ngechuchu.

6

*Ngechuchu rü nanachibüexêẽ ga 5000 ga yatügu
(Mt 14.13-21; Mr 6.30-44; Lc 9.10-17)*

¹ Rü yemawena ga Ngechuchu rü nextaxa ga Gariréagu ãeganearütocutüwa tomaã naxü. Rü norü toéga ga guma nextaxa rü Tibéria nixĩ. ² Rü muxüma ga duüxügü rü nawe narüxĩ. Yerü üpaacü rü marü nüxü nadaugü ga ñuxäcü Ngechuchu na naxüxü ga taxü ga mexügü ga Tupanaärü poramaã üxü ga yexguma duüxügü ga idaaweegüxücèx yataanexêẽgüägu. ³ Rü yexguma ga Ngechuchu rü wüxi ga mèxpúnewa tomaã ínaxüãchi. Rü wüxigu tomaã yéma narüto. ⁴ Rü marü ningaica ga yema Yudügüarü peta ga Üpetüchiga. ⁵ Rü yexguma Ngechuchu nüxü dawenügu rü nüxü nadau ga muxüma ga duüxügü ga nawe rüxixü. Rü yemacèx Piripina naca, rü ñanagürü: —¿Rü ngextá tá naxcèx tataxe i nawemü i ñaã duüxügü na nachibüexêẽxücèx? —ñanagürü. ⁶ Rü nümatama ga Ngechuchu rü marü nüxü nacüèx ga tacü tá na naxüxü. Natürü yema ñanagürü Piripixü, yerü nüxü nacüáxchaü ga tacümaã tá na nangäxüãxü. ⁷ Rü yexguma Ngechuchuxü nangäxü ga Piripi, rü ñanagürü: —Woo chi naxcèx itaxegügu i 200 i dīeru naguxü i pãü, rü tãü chima nüxü ningu ega woo wüxichigüna íraxü ixächigügu —ñanagürü. ⁸⁻⁹ Rü yexguma ga Aüdré ga Ngechuchuarü ngüexü ga Pedru ga Chimáü naêneẽ, rü ñanagürü: —Nuã nangëxma i wüxi i buxü rü nüxü nangëxma i 5 i pãü i chebadanaxcèx rü taxre ta i choxni. ¿Natürü tacüwa name i ngëma naxcèx i ñaã muxüchixü i duüxügü? —ñanagürü. ¹⁰ Rü yexguma ga Ngechuchu rü ñanagürü toxü: —¿Ëcü, namaã nüxü pixu i duüxügü

na ínatogüxücè! —ñanagürü. Rû yema nachicawa rû nametéxeane ga guma maxê. Rû gumatéxewa narütogü ga duïxügü. Rû maneca 5000 wa nangu ga yexguma yatügüxica ixugügu. ¹¹ Rû yexguma ga Ngechuchu rû nanade ga yema pãügü, rû Tupanana moxê naxã. Rû yemawena rû toxü nayanu na yema duïxügü ga yéma rütogüxüxü tayanuxücè. Rû yexgumarüü ta ga choxni rû nüxü toxü nayanuxêê, ñuxmata meãma nachibüe ga guxüma ga yema duïxügü. ¹² Rû yexguma marü meã nachibüegu ga guxüma, rû Ngechuchu toxü namu rû ñanagürü toxü: —¡Penade i ngêma naxchipéxegü i íyaxügüxü na tama inaxaiyèxüxücè! —ñanagürü. ¹³ Rû tanade ga yema naxchipéxegü ga yema 5 ga pãüwa íyaxüxü, rû 12 ga pexchi namaã tanaxüãcugü. ¹⁴ Rû yexguma yema duïxügü nüxü daugügu ga yema mexü ga taxü ga Tupanaärü poramaã naxüxü ga Ngechuchu, rû ñanagürügü: —Aixcümáxüchi daa nixí ya Tupanaärü ore-arü uruü ga guma ínanguxêécü —ñanagürügü. ¹⁵ Natürü ga Ngechuchu rû nüxü nicuèxãchi ga duïxügü rû na norü ãëxgacüxü yangu-cuchixêëgüchaüãxü. Rû yemacèx nüxna nixügachi rû yéamaxüra naxü nawa ga guma mèxpúne na nüxícatama nayexmaxücè.

Dexátügu nixü ga Ngechuchu

(Mt 14.22-27; Mr 6.45-52)

¹⁶ Rû yexguma marü nachütagu, rû toma ga Ngechuchuarü ngüexügü rû wenaxärü naxtaacutüwa taxí. ¹⁷ Rû poraãcü naxêãne. Rû tama ínangu ga Ngechuchu. Rû yemacèx wüxi ga ngue ga taxünegu tichoü, rû itaxíãchi ga na tocutüwa taxíxü ga Capernáüärü ñãnewa na tangugüxücè. ¹⁸ Rû yexguma tixãüyane rû

inaxügü ga na poraãcü yabuaxũ. Rü yemagagu rü poraãcü nayuape. ¹⁹ Rü yexguma marü 5 ga kilómetru tixãũgu, rü Ngechuchuxũ tadaugü ga na dexáchiiétügu yaxũxũ. Rü toma ga norü ngúexũgü rü poraãcü tamuũê. ²⁰ Natürü nüma ga Ngechuchu rü ñanagürü toxũ: —Choma chixĩ. ¡Rü tãxú i pemuũêxũ! —ñanagürü. ²¹ Rü yexguma ga toma ga norü ngúexũgü rü taãêácüma tanayauxgüchaũ ga toweüwa. Rü yexgumatama ítangugü ga yema ítaxĩxüwa.

Ngechuchucèx nadaugü ga duũxũgü

²² Rü moxũãcü ga yema duũxũgü ga naxtaxaarü tocutügu rüchoxũ, rü nüxũ nicuèxãchitanü ga toma ga Ngechuchuarü ngúexũgü ga marü nagu na taxĩxũ ga guma ngue ga taxũne ga nügümaã wüxicane. Rü nüxũ nacuèxgü ta ga Ngechuchu rü tama towe na naxũxũ. ²³ Rü yexguma yemagu ínaxĩnüéyane, rü yoxocüne ínangugü ga náigü ga ngue ga itaxũne ga Tibériaarü ñãnewa ne íxũne. Rü norü ngaicamana nangugü ga yema nachica ga ngextá Ngechuchu ínachibüexêèxũwa ga yema muxüma ga duũxũgü ga yexguma moxê inaxãxgu naxcèx ga yema pãũ. ²⁴ Rü yexguma yema duũxũgü nüxũ daugügu ga guma nguewa na Ngechuchu rü toma ga na tatauxexüma rü yexma guma nguegügu nichoũ na Ngechuchucèx yadaugüxũ Capernáũãrü ñãnegu.

Ngechuchu nixĩ i pãũ i maxũ tüxna ãxũ

²⁵ Rü yexguma guma naxtaxaarü tocutüwa nangugügu ga yema duũxũgü, rü Ngechuchuxũ yexma nayangaugü. Rü nüxna nacagüe, rü ñanagürügü: —Pa Ngúexêèruũx, ¿ñuxgu nixĩ i nuã cunguxũ? —ñanagürügü. ²⁶ Rü Ngechuchu nanangãxũ, rü ñanagürü nüxũ: —Aixcüma

pemaã nüxũ chixu rü tama yema nüxũ na picuèxã-chitanüxũcèx ga yema mexũgü ga Tupanaarü poramaa chaxüxũ nixĩ i chauxcèx pedaugüxũ. Natürü chauxcèx pedaugü yerü meãma pechibüe nawa ga yema õna ga pexna chaxãxũ.. ²⁷ —¡Tãxú i naxcèx pepuracüexũ i õna i paxama gúxũ! Rü narümemaẽ nixĩ i naxcèx pepuracüe i ngema maxũ i aixcüma ixĩxũ i taguma gúxũ. Rü ngẽma nixĩ i maxũ i choma i Tupana Nane ya duũxũxũ chixĩcü tá pexna chaxãxũ, erü Chaunatü ya Tupana rü marü nanangõxẽẽ na aixcüma Nane chiĩxũ —ñanagürü. ²⁸ Rü yexguma ga nümagü rü nüxna nacagü, rü ñanagürügü: —¡Tacü tá taxüe na tayanguxẽẽxũcèx i ngẽma Tupana toxũ naxwèxexũ? —ñanagürügü. ²⁹ Rü Ngechuchu nanangãxũ rü ñanagürü nüxũ: —Rü Tupana rü núma choxũ namu. Rü ngẽma nüma pexũ nanaxwèxexũ nixĩ na choxũ peyaxõgüxũ —ñanagürü. ³⁰ Rü yexguma ga nümagü rü nüxna nacagü, rü ñanagürügü nüxũ: —¡Tacü rü cuèxruũxũ tá toxũ cudauxẽẽ na cuxũ tayaxõgüxũcèx na aixcüma Cristu quiĩxũ? ¡Rü tacü i to i mexũ tá toxcèx cuxüxũ i ñuxmax? ³¹ Yerü nuxcümaũgüxũ ga tórü õxigü, rü nanangõxgü ga yema pãu ga Tupana nüxna ãxũ ga chianexüwa ga ngextá taxúema íxãpataxüwa. Rü Tupanaarü ore i úmatüxüwa rü ñanagürü:

“Tupana rü daxüçũãx ga pãumaã nanachibüexẽẽ ga duũxũgü”,

ñanagürü i ngẽma orewa. ³² Rü Ngechuchu nanangãxũ rü ñanagürü nüxũ: —Aixcüma pemaã nüxũ chixu rü tama nixĩ ga Moĩché yĩxũ ga nüxna naxãxũ ga yema pãu ga daxũ- çũãx, natürü Chaunatü ga Tupana nixĩ ga nüxna naxãcü. Rü nüma nixĩ i ñuxma i pexna naxããxũ

i pãu i aixcũma ixĩxũ i daxũwa ne ũxũ. ³³ —Eri ngẽma pãu i Tupana ixãxũ, rũ daxũguxũ i naãnewa ne naxũ rũ nanamaxẽxẽ i ñoma i naãnecũãx i duũxũgũ —ñanagürũ. ³⁴ Rũ nũmagũ rũ naxcèx ínacagũ, rũ ñanagürügũ nüxũ: —Pa Corix, jguxũguma toxna naxãẽcha i ngẽma pãu! — ñanagürügũ. ³⁵ Rũ Ngechuchu ñanagürũ nüxũ: —Choma nixĩ i ngẽma pãu i maxẽxẽruũ chiĩxũ. Rũ yixema texé ya chauxũtawã ũxẽ rũ tagutãma tataiya. Rũ texé ya choxũ yaxõxẽ rũ tagutãma tiṭawã. ³⁶ —Natürũ marũ pemaã nüxũ chixu rũ woo na choxũ pedaugũxũ rũ tama choxũ peyaxõgũ i pemax. ³⁷ —Rũ guxãma ya yixema duũxẽgũ ya Chaunatũ choxna tüxũ mugũxe rũ chorũ duũxũgũ tixĩgũ. Rũ texé ya choxũ yaxõgũxe rũ tãũtãma tüxũ chaxoox. ³⁸ —Yerũ tama choxrũtama ngũchaũ na chaxũxũcèx nixĩ ga daxũguxũ ga naãnewa ne chaxũxũ. Natürũ núma chaxũ na chanaxũxũcèx i norũ ngũchaũ ya Chaunatũ ya núma choxũ mucũ. ³⁹ —Rũ ngẽma norũ ngũchaũ ya Chaunatũ ya Tupana ya núma choxũ mucũ nixĩ i na taxúexũma ichayarũtauxẽxũ ya yixema choxna tüxũ namugũxe. Erũ núma ya Chaunatũ nanaxwãe na tüxũ yuwa ícharũdagũxẽxũ i naãneãrũ guxgu. ⁴⁰ —Choma nixĩ i Tupana Nane chiĩxũ. Rũ ngẽma norũ ngũchaũ ya Chaunatũ ya Tupana ya núma choxũ mucũ nixĩ na tüxũ nangẽxmaxũ i maxũ i taguma gũxũ ya guxãma ya texé ya choxũ daugũxe rũ choxũ yaxõgũxe. Erũ choma tá nixĩ i tüxũ ícharũdagũxẽxũ i naãneãrũ guxgu —ñanagürũ. ⁴¹ Rũ yexguma yema orexũ naxĩnüẽgu ga yema Yudĩgũ, rũ inanaxũgũe ga Ngechuchuchiga na yadexagũxũ. Yerũ ñanagürũ ga Ngechuchu: —Choma nixĩ i pãu i daxũguxũ

i naãnewa ne chaxũxũ —ñanagürü. ⁴² Rü ñanagürügü: —¿Taux éxna ñaã yĩxũ i Ngechuchu i Yúche nane? Rü yixema rü tüxũ tacuèx ya nanatü rü naë. ¿Rü ñuxãcü i nüma i “Daxüwa ne naxũxũ”, ñaxũ? —ñanagürügü. ⁴³ Rü Ngechuchu ñanagürü nüxũ: —¡Nüxũ perüxoe na choxũ na pixuechaxũ! ⁴⁴ —Taxúema chauxütawa tangu ega tama choxna tüxũ namuxgu ya chaunatü ga guma núma choxũ mucü. Rü texé ya chauxütawa ngugüxe rü choma rü tá wena tüxũ chamaxëxëë i naãneãrü guxgu. ⁴⁵ —Nuxcümaügxũ ga Tupanaãrü orearü uruügxüarü poperawa naxümatü i ore i ñaxũ: “Tupana tá guxãxũ nangúexëë”, ñaxũ. Rü ngëmacèx guxãma ya texé ya Chaunatüxũ ñnuxë rü naxütawa ngúxe, rü chauxütawa taxĩ. ⁴⁶ —Taguma texé Chaunatü ya Tupanaxũ tadau. Rü chaxicatama nixĩ i nüxũ chadauxũ erü naxütawa ne chaxũ. ⁴⁷ —Aixcüma pemaã nüxũ chixu rü texé ya choxũ yaxóxë rü tüxũ nangëxma i maxũ i taguma gúxũ. ⁴⁸ —Choma nixĩ i pãü i maxëxëëruũ chíxũ. ⁴⁹ —Rü perü oxigü ga nuxcümaügxũ rü nanangõx ga yema pãü ga Tupana nüxna äxũ ga yema nachica ga ngextá taxúema íxãpataxüwa. Natürü woo nanangõxgü ga yema pãü rü nayueamatama. ⁵⁰ —Natürü ñaã pãü i pemaã nüxũ chixuxũ i daxüwa ne üxũ rü chomatama chixĩ. Rü guxãma ya texé ya choxũ yaxúxe ñoma pãü tangóxürüü rü tá tamaxëcha. ⁵¹ —Chomatama nixĩ i pãü i maxëxëëruũ i daxüwa ne chaxũxũ. Rü texé ya ñoma chomaã taxãwemüxürüü choxũ yaxóxë rü guxügutáma tamaxëcha. Erü ngëma pãü i choma tüxna chaxãxũ rü chaxunetama nixĩ. Rü ichanaxã i chaxune na namaxëxücèx i ñoma i naãnecüãx i duüxügü —ñanagürü ga Ngechuchu. ⁵² Rü yexguma ga yema Yudúgü rü

poragaãcü nügüna nacagüe, rü ñanagürügü: —¿Ñuxãcü tá i ñaã yatü i naxũne tátama tüxü nangõxẽẽxü? — ñanagürügü. ⁵³ Rü Ngechuchu ñanagürü nüxü: —Rü choma i Tupana nane na duũxũxü chiĩxü rü aixcüma pemaã nüxü chixu rü ngẽxguma pema rü tama chaxunemaã pexãwemügügu rü tama nawa pexaxegügu ya chaugü, rü tãütáma pexü nangẽxma i maxü i taguma gúxü. ⁵⁴ —Texé ya chaxunemaã awemüxẽ rü chaugüwa axexe rü tüxü nangẽxma i maxü i taguma gúxü. Erü choma rü tá tüxü chamaxẽẽ ega naãneãrü guxgu. ⁵⁵ —Erü chaxune rü õnaxüchi nixĩ rü chaugü rü axexũxüchi nixĩ. ⁵⁶ —Texé ya chaxunemaã awemüxẽ rü chaugüwa axexe rü chowa tayaxüx rü choma i tümawa. ⁵⁷ —Chaunatü ga núma choxü mucü rü naamaxü. Rü núma choxna nanaxã i maxü. Rü ngẽxgumarüü ta i choma rü tá tüxna chanaxã i maxü ya yíxema choxü yaxúxe rü choxü yaxóxẽ. ⁵⁸ —Marü pemaã nüxü chixu na choma rü pãü i daxüwa ne üxü chiĩxü. Natürü choma rü tama yema pãü ga nuxcümaũgüxü ga perü oxigü ngõxgüxü ga pãürüü chixĩ. Yerü woo ga yema pãü na nangõxgüxü ga perü oxigü rü nayueamatama. Natürü texé ya choxü yaxúxe, ñoma pãü tangóxürüü, rü choxü yaxóxẽ rü guxügutáma tamaxü — ñanagürü. ⁵⁹ Rü Ngechuchu rü duũxũgümaã nüxü nixu ga yema ore ga yexguma nangúexẽãgu ga Yudügüarü ngutaquẽxepataüwa ga ñãne ga Capernáüwa.

Ngechucharü orewa nangẽxma i maxü i taguma gúxü

⁶⁰ Rü yexguma nüxü naxĩnüẽgu ga yema nguxẽẽtae, rü muxüma ga yema duũxũgü ga nawe rüxixü rü ñanagürügü: —Rü ngẽma tamaã nüxü yaxuxü, rü naguxchaxüchi na nüxü icuáxü na ñuxü ñaxü. ¿Ñuxãcü

texé tūxū natauxcha na naga taxīnūxū? —ñanagürügü.
⁶¹ Natürü ga Ngechuchu rü nüxū nacuèxama ga yemaäcü
 nügümaã na íyadexagüxū naxcèx ga yema nguxēētae,
 rü yemacèx nüxna naca, rü ñanagürü: —¿Éxna peãēwa
 nangux i ngēma ore? ⁶² —Rü ngëxguma peãēwa nan-
 guxgu i ngēma ore i pemaã nüxū chixuxū, rü ¿tacügu chi
 perüxīnūëxū ega choxū pedèuxgu na wenaxârü daxū na
 chaxūxū, ga noxri ne chaxūxūwa na chaxūxū i choma i
 Tupana Nane na duūxūxū chiixū? ⁶³ —Tupanaãe i Üünexū
 nixī i inaxāxū i maxū i taguma gúxū. Rü tama pexene nixī
 i pexū maxëxëxū. Rü ngēma ore i pemaã nüxū chixuxū
 rü peãécèx nixī, rü nawa nangëxma i maxū i taguma
 gúxū. ⁶⁴ —Natürü tangëxma i petanüwa ya ñuxre ya tama
 yaxögüxe —ñanagürü. Rü yema ñanagürü ga Ngechuchu
 yerü noxriarü ügügumama marü nüxū nacuèx ga texé tá
 nüxū na yaxögüxū, rü texé tá cúäcü ínaxuaxūxū. ⁶⁵ Rü
 ñanagürü ta: —Rü ngëmacèx marü pemaã nüxū chixu rü
 taxuacüma texé chauxütawa tangu ega tama Chaunatü
 chauxütawa tūxū gaxgu —ñanagürü. ⁶⁶ Rü yexguma
 inanaxügüe ga nüxna na yaxīgüxū ga muxūma ga yema
 duūxügü ga noxri nawe rüxīchiréxū. Rü marü tama nawe
 ínaxīxū. ⁶⁷ Rü yexguma ga Ngechuchu rü norü 12 ga
 ngúexügüna naca, rü ñanagürü nüxū: —¿Éxna pema rü
 ta choxna pixīgachitanüchañ? —ñanagürü. ⁶⁸ Natürü
 Chimáü ga Pedru rü nanangāxū, rü ñanagürü: —Pa Corix,
 ¿Texéxütawa chi taxīxū ega cuxna tixīgachitanügu? Erü
 cuma rü cuxū nangëxma i ore i nawa nangëxmaxū i
 maxū i taguma gúxū. ⁶⁹ —Toma rü marü cuxū tayaxögü,
 rü nüxū tacuèx na cuma quiixū ya Cristu ya Üünecü

ya Tupana Nane —ñanagürü. ⁷⁰ Rü Ngechuchu toxũ nangãxũ, rü ñanagürü: —¿Taux éxna choma yiixũ ga pexũ chidexechixũ ga pema ga 12? Natürü nangẽxma i wüxi i petanüwa i Chatanáärü duixũ ixixũ —ñanagürü. ⁷¹ Rü Yuda ga Icariúte ga Chimáũ nanechiga nixĩ ga yadexaxũ ga Ngechuchu. Yerü Yuda tá nixĩ ga cúãcü ínaxuaxũxũ rü woo ga nüma rü wüxi ga totanüxüchiréx na yiixũ.

7

*Ngechuchuene*ẽgü rü tama nüxũ nayaxõgü

¹ Rü yemawena ga Ngechuchu rü Gariréaanewa yexmagüne ga iãnegügu nixüãgüchigü. Rü tama Yudéaanewa nayexmachaũ yerü yémacũãx ga Yudíugüarü ãẽxgacügü rü naxcèx nadaugü ga na yamèxgüchaũãxücèx. ² Natürü marü ningaica ga yema Yudíugüarü peta ga nagu norü düxenügü yaxügüxũ na yemawa nüxna nacuèxãchiexücèx ga ñuxãcü nuxcümaũgüxũ ga norü oxigü na naxügüxũ ga norü düxenügü ga naixátünaxcèx ga yexguma Moíchéwe naxixgu ga ngextá taxúema íxãpataxüwa. Rü yemacèx nixĩ ga Düxenügüarü Petagu naxãegaxũ. ³ Rü naẽneẽgü ga Ngechuchu rü ñanagürügü nüxũ: —Tama name i nuxã Gariréaarü naãnegu curüxãũx. Rü name nixĩ i petacèx Yudéawa cuxũ, na ngẽma duixũgü i cuwe rüxixũ i ngema ngẽxmagüxũ nüxũ daugüxücèx i ngẽma cuèxruũgü i mexüğü i Tupanaärü poramaã cuxüxũ. ⁴ —Erü ngẽxguma chi wüxi ya yatü rü duixũgüxũ nügü nacuèxẽchaũgu rü tama cúãcü nanaxü i tacü i naxüxũ. Rü ñuxma na cunaxüxũ i muxüma i mexüğü i Tupanaärü poramaã cuxüxũ, rü name nixĩ i guxũ i duixũgüpéxewa cunaxü

—ñanagürügü. ⁵ Rü yema ñanagürügü ga naêneëgü yerü woo ga nümagü rü ta tama nüxũ nayaxögü. ⁶ Rü yexguma ga Ngechuchu rü nanangãxũ, rü ñanagürü nüxũ: —Tauta nawa nangu i ngunexũ na petawa chaxũxũ. Natürü pexcèx rü ngëxürüüxũmare i ngunexũ nixĩ i mexũ na petawa nagu pexĩxũ. ⁷ —Ngëma duũxũgü i ñoma i naãnecũãx rü tama pexchi naxaie. Natürü chauxchi naxaie erü chanangoxëë i ngëma naxügüxũ rü na nachixexũ. ⁸ —Name nixĩ i petawa pexĩ i pemax. Choma rü tauta ngëma chaxũ erü tauta nawa nangu i ngunexũ i nagu ngëma chaxũxũ —ñanagürü ga Ngechuchu. ⁹ Rü yexguma yema ñaxguwena, rü Gariréaanegu narüxãũx.

Ngechuchu rü Düxenügüarü Petawa naxũ

¹⁰ Natürü nawena ga naêneëgü ga petawa na naxĩxũ, rü Ngechuchu rü ta yéma naxũ. Natürü cúãcü yéma naxũ, rü tama porãcü duũxũgüxũ nügü nadauxëë. ¹¹ Rü yema Yudíugüarü ãëxgacügü rü naxcèx nadaugü ga yema petawa, rü ñanagürügü: —¿Ngextá nangëxma i ngëma yatü? —ñanagürügü. ¹² Rü nügütanüwa ga yema duũxũgü ga yéma yexmagüxũ, rü porãcü Ngechuchuchiga ínindex-agü. Rü ñuxre ga yema duũxũgü rü ñanagürügü: —Yima rü wüxi ya yatü ya mecü nixĩ —ñanagürügü. Natürü ga togü rü ñanagürügü: —Ngëma yatü rü tama name erü duũxũgüxũ nawomüxëë —ñanagürügü. ¹³ Natürü taxuũma ga duũxũgü rü mea togüpéxewa Ngechuchuxũ nicuèxüügüchaũ, yerü yema Yudíugüarü ãëxgacügüxũ namuũë. ¹⁴ Rü yexguma marü yema petaarü ngãxũwa nanguxgu, rü nixücu ga Ngechuchu nawa ga tupauca ga taxũne. Rü inanaxügü ga na nanguxëëtaexũ. ¹⁵ Rü yema Yudíugüarü ãëxgacügü, rü nañaxãchiãëgü namaã ga yema ore ga Ngechuchu nüxũ ixuxũ. Rü ñanagürügü:

—¿Ñuxãcü i ngẽmaãcü poraãcü nüxũ nacuáxũ, rü taguma texé nanguxẽẽ? —ñanagürügü. ¹⁶ Rü Ngechuchu nanangãxũ rü ñanagürü nüxũ: —Ñãã chorü nguxẽẽtae rü tama choxrü nixĩ, erü Chaunatü ya núma choxũ mucüarü nixĩ. ¹⁷ —Ngẽxguma texé naxüxchaũgu i Tupanaãrü ngúchaũ rü yíxema tá nüxũ tacuèx ngoxi aixcüma Tupanaxütawa chanayaxu i ngẽma chorü nguxẽẽtae rü éxna chaugüxütawatama chayaxuxũ yixĩ i ngẽma. ¹⁸ —Yíxema texé ya mexũ i tümachigaxütama ixuxe rü ngẽmaãcü tanaxü erü tanaxwèxe i duũxũgü na tüxũ icuèxüũgüxũ. Natürü texé nüxũ tixu i ore i mexũ nachiga i ngẽma tüxũ muxũ, rü aixcüma nixĩ i tümaãrü ore. Rü tama dora nixĩ i ngẽma nüxũ tixuxũ. ¹⁹ —¿Tama éxna aixcüma yĩxũ ga Moĩché pexna naxãxũ ga Tupanaãrü mugü? Natürü taxúema i pema naga pexĩnüẽ i ngẽma mugü. ¿Rü ñuxma rü tüxcüũ nixĩ i choxũ pimèxgüchaũxũ? —ñanagürü. ²⁰ Rü yema duũxũgü nanangãxũgü, rü ñanagürügü: —Cuma rü ngoxo cuwa nangẽxmamare. ¿Éxna texé cuxũ timèxgüchaũ? —ñanagürügü. ²¹ Natürü ga Ngechuchu rü ñanagürü nüxũ: —Choma rü ngüxchigaarü ngunexũgu chanamexẽẽ ga wüxi ga yatü. Rü guxãma i pema rü penuãẽgü naxcèx ga yema wüxitama ga mexũ ga ngüxchigaarü ngunexũgu chaxüxũ. ²² — Natürü pema rü ta ngüxchigaarü ngunexũgu pepuracüe na naga pexĩxũcèx ga Moĩchéarü mugü. Rü Moĩché pemaã nüxũ nixu na tüxũ ípewiechèxmüpéxechiraũxũ ya guxãma ya yatüxe ya buxe. Natürü tama Moĩché nixĩ ga inaxügücü ga yema, yerü nuxcümaũgüxũ ga perü oxigüwa nixĩ ga ne naxüxũ. Rü ñuxma i pema rü yema mugagu rü tüxũ ípewiechèxmüpéxechiraũ ya

guxãma ya buxe ya yatuxe woo ngũxchigaarũ ngunexũ yixĩgu. ²³ —Rũ ngẽmaãcü i pema rũ ngũxchigaarũ ngunexũgu buxexũ ípewiechẽxmüpéxechiraũ erũ naga pexĩnüẽchaũ i Moĩchẽarũ mugũ. ¿Rũ ñuxma rũ tũx-cũũ yĩxũ i chomaã penuẽxũ naxcèx na ngũxchigaarũ ngunexũgu chanamexẽẽxũ ga wũxi ga yatũ ga idaaweecũ? ²⁴ —Rũ ngẽmacèx tama name i ngürũmare penangugũ i ngẽma chaxũxũ. Rũ penaxwèxe i meã nagu perũxĩnüẽxira, na aixcũma meã penangugũxũcèx — ñanagürũ ga Ngechuchu.

Ngechuchu rũ Tupana Nane nixĩ

²⁵ Rũ ñuxre ga yema duũxũgũ ga Yerucharẽũgu ãchiũgũxũ rũ nüguna nacagũe, rũ ñanagürũgũ: —¿Taux éxna daa yĩxũ ya yima yatũ ya ãẽxgacũgũ naxcèx daugücũ na yamèxgũchaũãxũcèx? ²⁶ —¿Dücèx! Gua nixĩ rũ yéa guxũ i duũxũgũpéxewa nidexa rũ taxúema ñuxũ ñatarũgũ nüxũ. ¿Taux éxna i tórũ ãẽxgacũgũ i marũ nüxũ yaxõgũãxũ na aixcũma Cristu na yĩxũ i nümax? ²⁷ — Natürũ i yixema rũ nüxũ tacuèxgũ na ngextá ne naxũxũ i nümax. Natürũ ngẽxguma aixcũma Cristu núma ũxgu rũ taxúetáma nüxũ tacuèx na ngextá na ne naxũxũ — ñanagürũgũ. ²⁸ Rũ núma ga Ngechuchu rũ tupauca ga taxũnewa ínanangúexẽẽ ga duũxũgũ. Rũ yexguma nüxũ naxĩnügu ga yema ore ga Yudũgũ nüxũ ixugũexũ ga nachiga, rũ tagaãcü ñanagürũ: —Pema rũ marũ choxũ pecuèx rũ nüxũ pecuèx na ngextá na ne chaxũxũ. Natürũ tama chaugagu nixĩ i núma chaxũxũ. Choma núma chaxũ yerũ núma choxũ namu ga Tupana ya naxwèxecũ na nüxũ yaxõgũxũ natürũ i pema rũ tama nüxũ pecuáci. ²⁹ —Choma rũ nüxũ chacuèx yerũ naxũtawa ne

chaxũ, rü nüma nixĩ i núma choxũ namuxũ —ñanagürü.
³⁰ Rü yexguma ga yema ãëxgacügü rü Ngechuchuxũ niyauxgüchaũ. Natürü taxuũma nayayauxgü, yerü tauta nawa nangu ga ngunexũ ga na yayauxgüãxũ rü na yamèxgüãxücèx. ³¹ Natürü muxũma ga duũxũgü rü nüxũ nayaxögü. Rü ñanagürügü: —¿Ngëxguma ínanguxgu ya Cristu rü tacü rü cuèxruũ i taxũ tá naxü ya daa yatü tama üxũ i ñuxmax? —ñanagürügü.

Parichéugü rü Ngechuchuxũ niyauxgüchaũ

³² Rü yema Parichéugü rü duũxũgüxũ naxĩnüë ga yemaãcü Ngechuchuchiga na yadexagüxũ. Rü yemacèx ga nümagü rü paigüarü ãëxgacügü rü yéma nanamugü ga tupauca ga taxũneãrü purichíagü na Ngechuchuxũ yanayauxgüxücèx. ³³ Rü yexguma ga Ngechuchu rü ñanagürü nüxũ: —Paxaãchi tátama nixĩ i petanüwa changëxmaxũ, rü ñuxüchi tá chataegu naxütawa ya yima núma choxũ mucü. ³⁴ —Pema rü tá chauxcèx pedaugü, natürü täütáma choxũ ipeyangaugü. Erü ngëma ngextá tá íchangëxmaxüwa rü taxuacü ngema pengugü. ³⁵ Rü yexguma ga yema Yudíugüarü ãëxgacügü rü nügüna nacagüe, rü ñanagürügü: —¿Ngextá tá naxü ega taxuacütáma nüxũ iyarüngaügü? ¿Éxna ngëma Yudíugü i to i nachiüãnewa ngëxmagüxütanüwa tá naxü rü éxna ngëma tama Yudíugü ixíngüxütanüwa tá naxü na yangüexëãxücèx? ³⁶ —¿Rü tacüchiga nixĩ i ngëma na ngëma ñaxũ:

“Tá chauxcèx pedaugü natürü täütáma choxũ ipeyangaugü, erü taxuacütáma ngema pexĩ i ngëma tá íchangëxmaxüwa”, ñaxũ? —ñanagürügü.

Dexá i maxëëruũchiga nidexa ga Ngechuchu

³⁷ Rû yema nawa iyacuáxû ga petaarû ngunexû nixî ga guxû ga togû ga ngunexûârû yexera rûmemaëxû naxcèx ga Yudíugû. Rû yema ngunexûgu nixî ga inachixû ga Ngechuchu rû tagaãcü ñaxû: —Rû ngëxguma texé itawaxgu rû jnuã chauxûtawa taxû rû tayaxaxe! ³⁸ — Rû “texé ya choxû yaxóxë rû tûmaârû maxûnewa tá nibaibe i taxû i dexá i maxëëruû” ngëma Tupanaârû ore i ümatûxû nüxû ixuxûrüü —ñanagûrü. ³⁹ Rû yexguma yema ñaxgu ga Ngechuchu rû Tupanaãe i Üünexûchiga nixî ga yadexaxû. Rû nüxû nixu ga guxûma ga yema nüxû yaxögüxû rû tá na nayauxgüãxû i Naãe i Üünexû. Natürü tama yexgumatama nanayauxgü, yerü tauta wenaxârû daxüguxû ga naãnecèx nataegu ga Ngechuchu na guxûârû ãëxgacü na yiixûcèx.

Ngechuchugagu nügü nitoye ga duïxûgü

⁴⁰ Rû nümaxû ga yema duïxûgü rû yexguma nüxû naxînüëgu ga yema Ngechuchu nüxû ixuxû, rû ñanagûrügü: —Aixcüma ñaã yatü nixî i ngëma Tupanaârû orearü uruü i ínguxchaïxû —ñanagûrügü. ⁴¹ Rû togû rû ñanagûrügü: —Daa nixî ya Cristu —ñanagûrügü. Natürü togû rû ñanagûrügü: —Tama nixî, erü taxucürüwa Gariréaanecüãx nixî ya Cristu. ⁴² —Erü Tupanaârû ore i ümatûxûwa rû ñanagûrü:

“Cristu rû tá Dabítaa nixî, rû tá nangox i ñãne i Berëüwa ga ngextá Dabí íbuxüwa”,
ñanagûrügü. ⁴³ Rû yemaãcü Ngechuchugagu nügü nitoye ga duïxûgü. ⁴⁴ Rû ñuxre ga yema duïxûgü rû Ngechuchuxû niyauxgüchaï, natürü taxuüma nayayauxgü.

*Yudługüarü ãëxgacügü rü tama Ngechuchuaxü
nayahögüchaü*

⁴⁵ Rü yema tupauca ga taxüneärü purichíagü, rü Parichéugücèx rü paigüarü ãëxgacügücèx nawoegu. Rü yema ãëxgacügü rü nüxna nacagü, rü ñanagürügü: — ¿Tüxcüü tama nuã penaga? —ñanagürügü. ⁴⁶ Rü yema purichíagü rü nanangãxügü rü ñanagürügü: —Taguma texé tidexa i ñaã yatü idexaxürüü —ñanagürügü. ⁴⁷ Rü yexguma ga Parichéugü rü ñanagürügü nüxü: —¿Éxna pexü rü ta marü nawomüxëë i nümax? ⁴⁸ —Dücèx, rü taxúema i tomax i Parichéugü rü taxuüma i tórü ãëxgacügü rü nüxü nayaxögü i ngëma Ngechuchu. ⁴⁹ — Natürü ñaã duüxügü i tama Tupanaärü mugüxü cuèxgüxü rü marü nachixexügügü —ñanagürügü. ⁵⁰ Natürü Nicodému ga Parichéu ixícü ga wüxicana Ngechuchuxütagu naxüãnecü, rü ñanagürü nüxü: ⁵¹ —Ngëma tórü mugü i ümatüxüwa rü ñanagürü:

“Taxuacüma wüxi i yatüxü tapoxcu ega tama nüxü ixñüëxíragu i norü dexa na nüxü icuáxücèx na tacü na naxüxü”, ñanagürü. ⁵² Rü yexguma ga natanüxügü rü nanangãxügü, rü ñanagürügü nüxü: —¿Éxna cuma rü ta Gariréaanecüãx quixí? ¡Nawa nangux i Tupanaärü ore i ümatüxü rü ngema tá nüxü cudau rü taxuütáma i Tupanaärü orearü uruü rü Gariréaanecüãx nixí! — ñanagürügü. ⁵³ Rü yexguma ga wüxichigü rü nachüüwa naxí.

8

Nge ga ätecü ga naí ga yatümaã ngëãëxcü

¹ Rŭ Ngechuchu rŭ Orĭbunecŭgu ãegane ga m̀expĭnewa naxũ. ² Rŭ moxũãcũ ga yexguma yangunegu, rŭ wenaxãrũ tupauca ga taxũnec̀ex nataegu. Rŭ ga duũxũgũ rŭ naxc̀ex naxĩ. Rŭ nũma ga Ngechuchu rŭ ĩnarũto, rŭ inanaxũgũ ga na nangũxẽẽãxũ ga duũxũgũ. ³ Rŭ yema ngũxẽẽruũgũ ga Moĩchẽarũ mugũwa nguxẽẽtaegũxũ rŭ Parichẽugũ, rŭ Ngechuchuxũtawa ngĩxũ nagagũ ga wũxi ga nge ga ãtecũ ga ngĩxũ nadaugũcũ ga naĩ ga yatũmaã na inapexũ. Rŭ guxũma ga yema duũxũgũ ga yema yexmagũxũpẽxegu ngĩxũ nayachixẽẽgũ. ⁴ Rŭ ñanagũrũgũ Ngechuchuxũ: —Pa Ngũxẽẽruũx, ñãã nge i ãtecũ rŭ ngĩxũ itayangau na naĩ ya yatũmaã na inapexũ. ⁵ Moĩchẽarũ mugũwa tamaã nũxũ nixu na nutamaã ngĩxũ ĩmuxũchiãcũma ngĩxũ imãxũ i wũxi i nge i ngẽmaãcũ maxũcũ. ¿Nũxũ ñacuxũ i cuma i ñuxmax? —ñanagũrũgũ. ⁶ Rŭ yema ñanagũrũgũ ga nũmagũ, yerũ Ngechuchuxũ guxchaxũgu nanguxẽẽgũchaũ na nũxũ nayexmaxũc̀ex ga tacũc̀ex na ĩnaxuaxũgũãxũ. Natũrũ ga Ngechuchu rŭ inayarũmaxãchi rŭ inanaxũgũ ga naxmẽxmaã waixũmũwa na naxũmatũãxũ. ⁷ Natũrũ nũxũ nac̀exũgũama, rŭ yemac̀ex dũxwa wenaxãrũ nadaunagũ ga Ngechuchu, rŭ ñanagũrũ nũxũ: —Ngexerũxe i petanũwa ya ngearũ pecaduãxẽ rŭ tũxira nuta ngĩxũ tanaña —ñanagũrũ. ⁸ Rŭ wenaxãrũ inayarũmaxãchi ga Ngechuchu rŭ naxmẽxmaã nanaxũmatũ ga waixũmũwa. ⁹ Natũrũ yexguma nũxũ naxĩnũẽgu ga yema ore ga Parichẽugũ rŭ inanaxũgũe ga nũgũ na yawũxĩxũ ga nũgũwe na ĩnachoxũxũ. Rŭ yaguãxgũ ga Parichẽugũwa ĩnaxũgũ ga na ĩnachoxũxũ rŭ dũxwa guxũma ĩnachoxũ. Rŭ yexguma marũ guxũma ga Parichẽugũ ĩchoũxgu, rŭ Ngechuchu rŭ yema ngecũxi-

catama yéma duũxũgüpéxewa nayaxügü. ¹⁰ Rü yexguma ga Ngechuchu rü wena nadaunagü. Rü ngĩxna naca rü ñanagürü ngĩxũ: —Pa Ngecũx, ¿Ngẽxũgü nixĩ i ngẽma cuxũ ixugüexũ? ¿Rü taxuũma cuxũ imáxchaũ? — ñanagürü. ¹¹ Rü ngĩma rü ngĩgürügü nüxũ: —Taxuũma Pa Corix —ngĩgürügü. Rü yexguma ga Ngechuchu rü ñanagürü ngĩxũ: —Choma rü ta tama cuxũ chapoxcu. Ñuxma rü marü name rü íquixũ rü tama wena pecadu cuxü —ñanagürü.

Ngechuchu rü ñoma i naãneãrũ ngóonex- eëruũ nixĩ

¹² Rü wenaxãrũ duũxũgümaã nidexa ga Ngechuchu, rü ñanagürü nüxũ: —Choma nixĩ i ñoma i naãnecũãxãrũ ngóonexẽëruũ. Rü yixema chowe rüxüxẽ rü chorü ngóonexũwa tangẽxma rü tũxna chanaxã i maxũ. Rü tá nüxna ítanguxuchi i tũmaãrũ chixexũ —ñanagürü. ¹³ Rü yexguma ga Parichéugü rü ñanagürügü nüxũ: —Cuma rü cugüchigaxũtama quixu. Rü ngẽma cuchiga i nüxũ quixuxũ rü taxuwama name —ñanagürügü. ¹⁴ Rü Ngechuchu nanangãxũ rü ñanagürü nüxũ: —Rü ngẽma ore i chauchiga nüxũ chixuxũ rü aixcũma nixĩ woo chomatama yixĩgu i namaã chaugüétüwa chidexaxũ. Erü choma rü nüxũ chacuèx i ngextá ne chaxũxũ, rü ngextá tá chaxũxũ. Natürü pema rü tama nüxũ pecuèx na ngextá ne chaxũxũ rü tama nüxũ pecuèx na ngextá tá chaxũxũ. ¹⁵ Pema rü choxũ pengugü i ñoma i naãnecũãx i duũxũgü nagu rüxĩnüëxũãcũmamare. Natürü i choma rü taxúexũma changugü. ¹⁶ Natürü ngẽxguma chi texéxũ changugügu rü aixcũma meãma tũxũ changugü. Erü tama chaxicatama tũxũ changugü, natürü yima Chaunatü ga núma choxũ mucũmaã nixĩ i wüxigu tũxũ tangugüxũ.

¹⁷ Rŭ ngẽma mugŭ ga Moĩché ũmatũxũ i nagu pexĩxũ, rŭ ñanagŭrũ:

“Ngẽxguma taxre i duũxũgŭ rŭ wũxitama i orexũ yaxugũgu, rŭ ngẽmawa ãẽxgacũ nũxũ nacuèx na aixcũma yĩĩxũ i ngẽma nũxũ yaxugũexũ”, ñanagŭrũ. ¹⁸ Rŭ dũcax, choma nixĩ i wũxi i chauchigaxũ chixuxũ rŭ Chaunatu ga nũma choxũ mucũ nixĩ ya naĩ. ¿Rŭ tũxcũũ tama choxũ peyaxõgũchaũ i ñũxmax? —ñanagŭrũ. ¹⁹ Rŭ yexguma ga nũmagũ rŭ nũxna nacagũe rŭ ñanagŭrũgũ: —¿Ngexcũ ya yima Cunatu? —ñanagŭrũgũ. Rŭ Ngechuchu nanangãxũ rŭ ñanagŭrũ: —Choxũ rŭ tama pecuèx rŭ Chaunatuũ rŭ ta tama pecuèx. Rŭ ngẽxguma chi choxũ pecuèxgũgu rŭ Chaunatuũ rŭ chi ta pecuèxgũ —ñanagŭrũ. ²⁰ Rŭ yema orexũ nixu ga Ngechuchu ga yexguma nanguxẽtaegu ga tupauca ga taxũnewa naxũtawa ga yema nachica ga ngextá duũxũgũ tupaucana dĩeru ngĩxũ íxãgũxũwa. Natũrũ taxuũma Ngechuchuxũ niyauxgũ, yerũ tauta nawa nangu ga yema ngunexũ ga nagu yayauxgũãxũ.

Ngechuchu rŭ Parichẽgũmaã nũxũ nixu rŭ ngextá nũma ínaxũxũwa rŭ taxucũrũwa ngema naxĩ

²¹ Rŭ Ngechuchu rŭ wenaxãrũ namaã nũxũ nixu, rŭ ñanagŭrũ: —Choma rŭ tá pexna chixũ i nũma, rŭ pema rŭ tá chaucèx pedaugũ, natũrũ tá perũ pecadugu peyue. Rŭ ngextá íchaxũxũwa rŭ taxucũrũwama ngema pexĩ —ñanagŭrũ. ²² Rŭ yexguma ga yema Yudũgũ rŭ ñanagŭrũgũ: —¿Èxna nũgũ tátama nimèx rŭ ngẽmacèx tamaã nũxũ yaxuxũ na taxucũrũwama ngẽma ixĩxũ i ngẽma ínaxũxũwa? —ñanagŭrũgũ. ²³ Rŭ Ngechuchu ñanagŭrũ nũxũ: —Pema rŭ ñoma i naãnecũãx i duũxũgũ pixĩgũ, natũrũ i choma rŭ daxũguxũ i naãnewa ne chaxũ.

Pema rü ñoma i naãneãrũ duũxũgũ pixĩgũ natürũ i choma rü tama ñoma i naãnecũãx chixĩ. ²⁴—Rü ngẽmacèx pemaã nüxũ chixu rü tá perũ pecadugu peyue. Erũ ngẽxguma tama choxũ peyaxõgũgu na choma chiĩxũ ya Cristu, rü perũ pecadugu tá peyue —ñanagürũ. ²⁵ Rü yexguma nüxna nacagüe, rü ñanagürũgũ: —¿Natürũ texé quixĩ i cumax? —ñanagürũgũ. Rü Ngechuchu nanangãxũ, rü ñanagürũ: —Marũ noxritama pemaã nüxũ chixu na texé chiĩxũ. ²⁶ —Rü choma rü choxũ nangẽxma i muxũma i tacũ i chomatama pexũ changúexẽẽchaũxũ rü tacücèx pexna na chaçaxũ, natürũ tãütãma chanaxũ i ngẽma. Erũ yima Chaunatũ ga núma choxũ mucũ chomaã nüxũ ixuxũ i orexicatama nixĩ i ñoma i naãnecũãxgũmaã nüxũ chixuxũ. Rü guxũma i ngẽma nüxũ yaxuxũ ya Chaunatũ, rü aixcũma nixĩ —ñanagürũ. ²⁷ Natürũ nũmagũ rü tama nüxũ nacuèxgüéga ga Nanatũ ya Tupanachiga na yĩxũ na yema ñaxũ ga Ngechuchu. ²⁸ Rü yemacèx ga Ngechuchu rü ñanagürũ nüxũ: —Choma nixĩ i Tupana Nane i duũxũxũ chiĩxũ. Rü yixcũra ngẽxguma curuchawa choxũ pipotagũgu, rü tá nüxũ picuèxãchitanũ na Cristu na chiĩxũ. Rü tá nüxũ pecuèx na taxuũma chauechamatama chaxũxũ. Rü ngẽma Chaunatũ chomaã nüxũ ixuxũxĩcatama nixĩ i pemaã nüxũ chixuxũ. ²⁹ —Yima núma choxũ mucũ ya Chaunatũ rü chauxũtawa nangẽxma. Rü taguma choxna nixũgachi, erũ choma rü guxũguma chanaxũ i ngẽma norũ ngúchaũ ixĩxũ —ñanagürũ. ³⁰ Rü yexguma yema ñaxgu ga Ngechuchu rü muxũma ga duũxũgũ nüxũ nayaxõgũ.

Yíxema Tupanaxãcũgũ ixĩgũxechiga, rü yíxema pecadutũũwa ngẽxmagũxechiga

³¹ Rũ yexguma ga Ngechuchu rũ ñanagürũ nüxũ ga yema Yudũgüarũ ãëxgacügũ ga nüxũ yaxõgüxũ: — Ngëxguma pema meãma peyaxõgüechagu i ngëma pemaã nüxũ chixuxũ, rũ aixcũmaxũchi tá chorũ ngüexũgũ pixĩgũ. ³² —Rũ tá nüxũ pecuèx i ore i aixcũma ixĩxũ. Rũ ngëma ore tá pexũ ínanguxũxëë —ñanagürũ. ³³ Rũ nümagũ rũ Ngechuchuxũ nangãxũgũ, rũ ñanagürũgũ: — Toma rũ nuxcũmaũcü ga torũ oxĩ ga Abrãútaa tixĩgũ rũ taguma texéméxëwa tangëxmagũ. ¿Nuxãcü i cumax rũ tá na ítanguxũxũ, ñacuxũ? —ñanagürũgũ. ³⁴ Rũ Ngechuchu ñanagürũ nüxũ: —Aixcũma pemaã nüxũ chixu rũ guxãma ya pecaduáxë rũ pecadutũüwa tangëxmagũ. ³⁵ —Wüxi i coriarũ duũxũmare rũ tama norũ coripatacũãx nixĩ. Natürũ wüxi i cori nane rũ guxũguma nanatũ nane nixĩ. ³⁶ —Choma rũ Tupana Nane chixĩ. Rũ ngëxguma chi choma pecaduna pexũ íchanguũxëëgu, rũ aixcũma tá nüxna ípenguũ. ³⁷ —Marũ nüxũ chacuèx na Abrãútaa pixĩgüxũ i pemax. Natürũ choxũ pimèxgüchaũ erũ tama aixcũma choxũ peyaxõgũ i ngëma ore i pemaã nüxũ chixuxũ. ³⁸ —Choma rũ yema Chaunatũ choxũ wéxũ nixĩ i pemaã nüxũ chixuxũ. Natürũ pema rũ penaxũ i ngëma penatũ pemaã nüxũ ixuxũ —ñanagürũ ga Ngechuchu. ³⁹ Rũ nümagũ rũ Ngechuchuxũ nangãxũ rũ ñanagürũgũ: — Torũ oxĩ nixĩ ga Abrãũ —ñanagürũgũ. Natürũ Ngechuchu nanangãxũ rũ ñanagürũ nüxũ: —Ngëxguma chi aixcũma Abrãútaa pixĩgũgũ rũ chi Abrãũ üxürũü penaxũ. ⁴⁰ — Natürũ woo pemaã nüxũ chixu i ore i aixcũma ixĩxũ ga Chaunatũ ga Tupana choxũ nguxëëxũ, rũ pema rũ choxũ pimèxgüchaũ. Natürũ ga Abrãũ rũ taguma yemaãcü nanaxũ. ⁴¹ —Pema rũ penaxũ i penatũgücumatama —

ñanagürü. Rü yexguma ga nümagü rü ñanagürügü: — Toma rü tama tangürüwaŭgümare, rü toxŭ nangëxma ya wüxitama ya tonatü. Rü yima nixĩ ya Tupana — ñanagürügü. ⁴² Rü Ngechuchu nanangãxŭ, rü ñanagürü nüxŭ: —Ngëxguma chi aixcüma Tupana yixĩgu ya penatü rü choxŭ chi pengechaŭ, erü choma rü Tupanaxütawa nixĩ i ne chaxŭxŭ, rü ngëmacèx chanuxma. Rü tama chauechamatama núma chaxŭ, natürü núma chaxŭ yerü Chaunatü ya Tupana núma choxŭ namu. ⁴³ —¿Tŭxcüŭ tama nüxŭ pecuèxéga i ngëma pemaã nüxŭ chixuxŭ? Pexŭ naguxcha erü woetama tama iperüxĩnüèchaŭ i ngëma pemaã nüxŭ chixuxŭ i ore. ⁴⁴ —Penatü rü Chataná nixĩ rü pema rü naxãcügü pixĩgü. Rü ngëmacèx penaxü i ngëma nüma pexŭ nanaxwèxexŭ. Rü ngëma Chataná rü noxriarü ügügumama wüxi i máëtaxŭ nixĩ. Rü taguma ore i aixcümamaxŭgu narüxĩnü rü taguma ore i aixcümamaxŭ nixu. Rü ngëxguma yadeaxgu rü doraxŭxĩcatama nixu, erü nüma rü wüxi i doratèxáxŭ nixĩ. Rü guxŭma i doratèxáxŭnatü nixĩ. ⁴⁵ —Natürü i pema rü tama choxŭ peyaxögüchaŭ erü ore i aixcümamaxŭ chixu. ⁴⁶ —¿Texé ya petanüwa choxŭ dauxe na pecadu chaxŭxŭ? Rü ñuxma na nüxŭ chixuxŭ i ore i aixcüma ixixŭ, rü ¿tŭxcüŭ tama choxŭ peyaxögü? ⁴⁷ —Texé ya Tupanaärü duŭxŭ ixixë rü itarüxĩnü i Tupanaärü ore. Natürü i pema rü tama Tupanaärü duŭxŭgü pixĩgü, rü ngëmacèx nixĩ i tama iperüxĩnüèchaŭxŭ i Tupanaärü ore —ñanagürü.

Tauta nangoxgu ga Abráŭ rü Cristu rü marü nayexma

⁴⁸ Rü yexguma ga yema Yudíugüarü ãëxgacügü rü ñanagürügü nüxŭ: —Rü aixcüma nixĩ ga yema torü ore ga yexguma ñatagügügu:

“Cuma rü wüxi i Chamáriacũãx quixĩ, rü ngoxo cuwa nangẽxma”, ñatagügügu —ñanagürügü. ⁴⁹ Rü Ngechuchu nanangãxũ, rü ñanagürü nüxũ: —Chowa rü nataxuma i ngoxo. Rü ngẽma chaxũxũ nixĩ na Chaunatũxũ chicuèxũũxũ, natürü i pema rü chixri chauchiga pidexagü. ⁵⁰ —Choma rü tama naxcèx chadau na texé choxũ icuèxũũgüxũcèx. Natürü Tupana nixĩ ya naxwèxecü na duũxũgü choxũ icuèxũũgüxũ. Rü nüma tá nanapoxcue i ngẽma chauxchi aixũ. ⁵¹ —Aixcüma pemaã nüxũ chixu, rü texé ya naga ñnuxẽ i ngẽma tümamaã nüxũ chixuxũ rü guxũgutáma tamaxẽcha —ñanagürü. ⁵² Rü yexguma ga yema Yudúgüarü ãèxgacügü, rü Ngechuchuxũ nangãxũgü, rü ñanagürügü: —Ñuxma rü meãxũchima nüxũ tacuèx na cuwa nangẽxmaxũ i wüxi i ngoxo. Yerü ga Abráũ rü guxũma ga nuxcümaũgüxũ ga Tupanaãrü orearü uruũgü rü nayue. Natürü cuma rü ñuxma tomaã nüxũ quixu rü texé ya naga ñnuxẽ i ngẽma curü ore rü guxũgutáma tamaxẽcha —ñacurügü. ⁵³ —¿Éxna cuma rü tórü oxí ga Abráũãrü yexera quixĩ? Yerü nüma rü nayu rü guxũma ga nuxcümaũgüxũ ga Tupanaãrü orearü uruũgü rü ta nayue. ¿Rü cugücèx rü texé quixĩ? —ñanagürügü. ⁵⁴ Rü Ngechuchu nanangãxũ, rü ñanagürü nüxũ: —Ega chaugü chitama chicuèxũũgu rü ngẽma rü taxuwama name. Natürü yima choxũ icuèxũũcü rü Chaunatü nixĩ. Rü yima Chaunatütama nixĩ ya perü Tupana ixĩcü —ñapegücü nüxũ. ⁵⁵ —Natürü i pema rü tama aixcüma nüxũ pecuèx ya Chaunatü ya Tupana. Natürü i choma rü ngẽmáãcü nüxũ chacuèx. Rü ngẽxguma chi:

“Tama nüxũ chacuèx”, ñachaxgu, rü pexrüũ chi wüxi

i doratèxáxũ chixĩ. Natürü i choma rü aixcũmaxũchima nüxũ chacuèx ya Chaunatü ya Tupana, rü naga chaxĩnü i guxũma i norü ore i chomaã nüxũ yaxuxũ. ⁵⁶—Perü oxi ga Abráũ rü nataãe yerü aixcũma nayaxõ rü tá na íchanguxũ i ñoma i nañewa. Rü yemaxũ nacuèx rü yemacèx nataãe —ñanagürü ga Ngechuchu. ⁵⁷ Rü yexguma ga yema Yudíugiarü ãëxgacügü rü Ngechuchuxũ nangãxügü, rü ñanagürügü: —Cuma rü tauta 50 ya taunecü cuxũ nangëxma. ¿Ñuxãcü Abráũxũ cudau ga tauta cunoxgux ga yexguma? —ñanagürügü. ⁵⁸ Rü Ngechuchu nanangãxũ rü ñanagürü nüxũ: —Aixcũma pemaã nüxũ chixu rü tauta Abráũ ngoxgu rü choma rü marü chayexma —ñanagürü. ⁵⁹ Rü yexguma ga nümagü rü nutane nanayauxgü na gumamaã ínamuxũchigüãxũcèx. Natürü ga Ngechuchu rü naxchaxwa inicux. Rü yemaãcü ínaxũxũ nawa ga guma tupauca ga taxũne.

9

Ngechuchu nanamexëë ga wüxi ga yatü ga norü bucüma ngexetücü

¹ Rü yexguma namagu tomaã yaxũxgu ga Ngechuchu, rü yéma nüxũ nadau ga wüxi ga yatü ga woetama norü bucüma ngexetücü. ² Rü toma ga norü ngúexügü rü nüxna tacagü, rü ñatarügügü: —Pa Ngúexëëruũx, ¿Tüxcüũ ngexetücüma nabu ya daa yatü? ¿Éxna nanatü rü naëärü pepadugagu rü éxna norü pepadugagutama? —ñatarügügü. ³ Rü Ngechuchu toxũ nangãxũ, rü ñanagürü toxũ: —Tama norü pepadugagu rü tama i nanatü rü naëärü pepadugagu nixĩ i ngëmaãcü nabuxũ. Natürü ngëmaãcü nabu na nawa nüxũ pedauxüçèx na ñuxãcü Tupana tüxũ na rümexëëxũ. ⁴—Rü ñoma rü ta nangune

rü name nixĩ na paxama na naxũxũ i ngẽma puracü ya Chaunatü ga núma choxũ mucü tüxna äxũ. Erü paxa tá nachüta rü ngëxguma rü taxucürüwama texé tá tapuracü. ⁵—Rü ñuxma na ñoma i naãnewa changëxmaxũ rü ñoma i naãneärü ngóonexëëruũ chixĩ —ñanagürü. ⁶Rü yexguma yema ñaxguwena rü Ngechuchu waixũmüãnewa nacuaxi. Rü yema waixũmü ga iwaixũmaã nanachaxetü ga guma yatü ga ngexetücü. ⁷Rü yexguma guma ngexetücüxũ ñanagürü: —¡Dexámaã cugü yayauxetü i Chiruéarü puchuwa! —ñanagürü. Rü ngẽma naega rü “Tüxũ muxũ”, ñaxũchiga nixĩ. Rü yéma naxü ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü. ⁸Rü yexguma ga yema duũxügü ga guma ngexetücüpataarü ngaicamagu pegüxũ rü yema duũxügü ga üpaacü nüxũ daugüxũ ga na nangexetüxũ, rü ñanagürügü: —¡Taux éxna i ñaã yiĩxũ ga yema yatü ga ngexetüchiréxũ ga duũxügüxũ dïerucëx cèèxüxü? —ñanagürügü. ⁹Rü nümaxũ rü ñanagürügü: —Ngẽmáacü nüma nixĩ —ñanagürügü. Rü togü rü ñanagürügü: —Tama nixĩ i yima yiĩxũ, natürü nanangëxgumaraũxüchi —ñanagürügü. Natürü nümatama ga guma yatü ga ngexetüchirécü, rü ñanagürü: —Ngẽmáacü choma chixĩ —ñanagürü. ¹⁰Rü yexguma ga yema duũxügü rü nüxna nacagü rü ñanagürügü: —¡Rü ñuxacü nixĩ i marü quidauchixũ i ñuxmax? —ñanagürügü. ¹¹Rü nüma nanangãxũ rü ñanagürü: —Yima yatü ya Ngechuchugu äegacü rü yima waixũmüãnewa nacuaxi. Rü yema waixũmü ga iwaixũmaã choxũ nachaxetü. Rü ñanagürü choxũ:

“¡Yéa Chiruéarü puchuwa naxü rü ngema dexámaã cugü yayauxetü!” ñanagürü choxũ. Rü yéma chaxü, rü

yexguma dexámaã chaugü chayauxetügu rü chidauchi — ñanagürü ga guma yatü. ¹² Rü yexguma nüxna nacagüe, rü ñanagürügü: —¿Ngextá nangëxmaxü i ñuxma ya yima yatü ya cuxü rümexëëcü? —ñanagürügü. Rü nüma ga guma yatü ga ngexetüchirécü rü ñanagürü: —Tama nüxü chacuèx —ñanagürü.

Parichéugü rü guma ngexetücü ga Ngechuchu namexëëcina nacagüe

¹³⁻¹⁴ Natürü yema ngunexü ga Ngechuchu nagu namexëëxü ga guma ngexetücü, rü ngüxchigaarü ngunexü nixĩ. Rü yemacèx ga duüxügü rü Parichéugüxütawa nanagagü ga guma yatü ga ngexetüchirécü. ¹⁵ Rü yexguma ga yema Parichéugü rü nüxna nacagüe ga guma yatü, rü ñanagürügü: —¿Ñuxácü i marü curümexëtüxü i ñuxmax? —ñanagürügü. Rü nüma nanangãxü rü ñanagürü: —Waixümü ga naxbüxágümaã yawaixëëxümaã choxü nachaxetü ga Ngechuchu, rü ñuxüchi dexámaã chaugü chayayauxetü, rü ngëmacèx marü chidauchi —ñanagürü. ¹⁶ Rü yexguma ga ñuxre ga Parichéugü rü ñanagürügü: —Yema yatü ga cuxü rümexëëxü rü tama Tupanaärü duüxü nixĩ, erü tama nanaxaure i ngüxchigaarü ngunexü — ñanagürügü. Natürü togü ga Parichéugü rü ñanagürügü: —¿Ñuxácü nanaxü i ngëma cuèxruü i mexü i taxü ega wüxi i pecaduáxü yixixgux? —ñanagürügü. Rü yemaäcü nügü nitoye ga nagu naxĩnüxüwa ga yema Parichéugü. ¹⁷ Rü wena nüxna nacagüe ga guma yatü ga ngexetüchirécü, rü ñanagürügü: —¿Natürü cuma rü ñuxü ñacuxü nachiga i ngëma yatü ga cuxü rümexëëxü? —ñanagürügü. Rü nüma nanangãxü, rü ñanagürü:

—Chauxcèx rü wüxi i Tupanaãrü orearü uruũ nixĩ — ñanagürü. ¹⁸ Natürü ga yema Yudíugüarü ãëxgacügü rü tama nüxũ nayaxõgüchaũ ga nüma na yĩxũ ga na nangexetüchiréxũ ga noxrix, rü ñuxma rü marü na yadauchixũ. Rü yemacèx ga yema ãëxgacügü rü tümacèx nangemagü ga nanatü rü naë ga guma yatü ga rümexëtücü. ¹⁹ Rü tüxna nacagü, rü ñanagürügü: —¿Daa yĩxũ ga guma pene ga nüxũ pixucü ga woetama ngexetüãcü bucü? ¿Ñuxãcü i ñuxma i yadauchixũ? —ñanagürügü. ²⁰ Rü nanatü rü naë tanangãxügü rü ñatarügügü: —Ngẽmããcü nüxũ tacuèx rü daa nixĩ ya tone ga ngexetüãcüma buchirécü. ²¹ Natürü tama nüxũ tacuèx ga ñuxãcü na yadauchixũ i ñuxmax. Rü tama nüxũ tacuèx ga texé na namexëtüxëëxũ. ¡Ëcü nüxnatama pecagü! Erü nüma rü marü naya, rü nümatama pemaã nüxũ na yaxuxücèx —ñatarügügü. ²² Rü yema ñatarügügü ga nanatü rü naë, yerü tamuũë. Yerü ga Yudíugüarü ãëxgacügü rü marü nügümaã nanamexëëgü na tüxũ ínatèxüchigüxücèx ga ngutaquëxepataũwa ga texé ga Ngechuchuaxũ yaxóxë na Cristu yĩxũ. ²³ Rü yemacèx nixĩ ga nanatü rü naë ga ñatagügüxũ: “¡Ëcü, nüxnatama pecagü! Erü nüma rü marü naya rü nümatama pemaã nüxũ na yaxuxücèx”, ñatagügüxũ. ²⁴ Rü yexguma ga yema Yudíugüarü ãëxgacügü rü wenaxãrü naxcèx nacagü ga guma ngexetüchirécü. Rü ñanagürügü nüxũ: —Rü ñuxma tanaxwèxe i Tupanapëxewa rü aixcüma tomaã nüxũ quixu na texé cuxũ rümexëëxũ. Erü toma rü meãma nüxũ tacuèx i ngẽma Ngechuchu rü wüxi i pecaduáxũ na yĩxũ —ñanagürügü. ²⁵ Rü nüma nanangãxũ rü ñanagürü nüxũ: —Choma rü tama nüxũ chacuèx ega wüxi i pecaduáxũ

yixĩgu rü éxna tama. Rü ngẽma nüxũ chachuáxũ nixĩ ga na changexetüchiréxũ ga noxrix rü ñuxma rü na chidauchixũ —ñanagürü. ²⁶ Rü wenaxârü nüxna nacagüe, rü ñanagürügü: —¿Rü tacü nixĩ ga cumaã naxüxũ? ¿Rü ñuxácü ga naxüãxũ ga cuyũ na yadauchixetüxêêxũ? —ñanagürügü. ²⁷ Rü nanangãxũ rü ñanagürü nüxũ: —Marü pemaã nüxũ chixu, rü tama choxũ iperüxĩnüêchaũ. ¿Tüxcüũ penaxwèxe na wena pemaã nüxũ chixuxũ? ¿Éxna pema rü ta nüxũ peyaxögüchaũ? —ñanagürü. ²⁸ Rü yexguma rü guma yatümaã chixexũ nixugüe, rü ñanagürügü: —Cumaêrü nixĩ i nüxũ cuyaxõxũ i ngẽma yatü, natürü i toma rü Moïchéarü oreaxũ nixĩ i tayaxögüxũ. ²⁹ —Toma rü nüxũ tacuèx ga Tupana rü aixcüma Moïchémaã na yadexaxũ, natürü ngẽma Ngechuchu rü tama nüxũ tacuèx na ngextá na ne naxüxũ —ñanagürügü. ³⁰ Rü guma yatü nanangãxũ, rü ñanagürü nüxũ: —¿Ñuxácü nixĩ i ngẽma? Nüma rü marü choxũ narümexëtüxêê, natürü ¿ñuxácü i pema i tama nüxũ pecuáxũ na ngextá ne naxüxũ? ³¹ —Rü guxãma i yixema rü meãma nüxũ tacuèx rü Tupana tama nüxũ naxĩnü i pecaduãxgüxũãrü yumüxê. Natürü Tupana rü tüxũ nüxũ naxĩnü i tümaãrü yumüxê ya yixema nüxũ icuèxüũgüxe rü naxúxe i Tupanaãrü ngúchaũ. ³² —Taguma ñuxgu nüxũ taxĩnüchiga i wüxi i yatü na yadauchixêêãxũ i wüxi i duũxũ i norü bucüma ngexetüxũ. ³³ —Rü ngëxguma chi tama Tupana núma namüxgux ya daa yatü ya choxũ rümexêécü, rü taxuacü chima mexũ naxü —ñanagürü ga guma yatü ga ngexetüchirécü. ³⁴ Rü yexguma ga yema Yudügüarü âëxgacügü, rü ñanagürügü nüxũ: —

Cuma na pecadugu na cubuxũ, ¿rũ ñuxãcü cunaxwèxe na toxũ cungúexêêchaũxũ? —ñanagürügü. Rũ ñuxũchi ínanatèxüchigü ga ngutaquéxepataũwa.

Duĩxũgü i tama yaxõgüxũ rü ngexetüxürüü nixĩgü

³⁵ Rũ Ngechuchu rü nüxũ nacuáchiga ga na ínatèxüchigüãxũ ga guma ngexetüchirécü. Rũ yexguma nüxũ nadèuxgu, rü ñanagürü nüxũ: —¿Nüxũ cuyaxõxũ ya Tupana Nane ya duĩxũxũ ixĩcü? —ñanagürü.
³⁶ Rũ yexguma ga nüma rü Ngechuchuxũ nangãxũ rü ñanagürü: —Pa Corix, ¿chomaã nüxũ ixu na texe yĩxũ na nüxũ chayaxõxũcè! —ñanagürü. ³⁷ Rũ Ngechuchu nanangãxũ, rü ñanagürü: —Marü nüxũ cudau ya Tupana Nane. Rũ chomatama nixĩ i cumaã na íchidexaxũ chiĩxũ —ñanagürü. ³⁸ Rũ yexguma ga guma yatü ga ngexetüchirécü rü Ngechuchupéxegu nacaxápüxü, rü nüxũ nicuèxüü, rü ñanagürü nüxũ: —Ngẽmáãcü cuxũ chayaxõ, Pa Corix —ñanagürü. ³⁹ Rũ yexguma ga Ngechuchu rü ñanagürü: —Rü ñoma i naãnewa chaxũ na chayadexechixüçè i chorü duĩxũgü nüxna i ngẽma duĩxũgü i tama choxrü ixĩgüxũ. Rũ nuã chaxũ na chanameèxèxüçè i ngẽma duĩxũgü i noxri tama Tupanaxũ cuèxgüxũ. Rũ ngèxgumarüü ta núma chaxũ na duĩxũgü i tama choxũ cuèxgüchaũxũxũ chanawéxũ na duĩxũgü i ngexetüxürüü na yixĩgüxũ, erü tama choxũ nayaxõgüchaũ —ñanagürü. ⁴⁰ Rũ ñuxre ga Parichégü ga yéma Ngechuchumaã yexmagüxũ, rü yexguma yema orexũ naxĩnüègu, rü Ngechuchuna nacagü, rü ñanagürügü: —¿Éxna toma rü ta tama Tupanaxũ tacuèxgü ñacuxũ? —ñanagürügü. ⁴¹ Rũ

Ngechuchu nanangãxũ rü ñanagürü nüxũ: —Ngëxguma chi tama aixcuma Tupanaxũ pecuèxgügu rü tãu chima pegagu nixĩ na pepecaduãxgüxũ. Natürü ngëma na pegü pixuxũ na Tupanaxũ pecuáxũ rü ngëmacèx pegagutama nixĩ na pepecaduãxgüxũ i ñuxmax —ñanagürü.

10

Carnerugüarü dauruũ rü norü carnerugü

¹ Rü yexguma ga Ngechuchu rü ñanagürü: —Rü aixcuma pemaã nüxũ chixu rü ngëma yatü i tama carnerupúxũãrü ãxwa ixücuxũ rü wüxi i ngítèxáxũ nixĩ i ngëma, erü ngextámare nixücu. ² —Natürü ngëma carnerupúxũãrü ãxwa meãma ixücuxũ, rü ngëma nixĩ i norü dauruũxüchi i carnerugü. ³ —Rü ngëma yatü i carnerupúxũãrü ãxna dauxũ rü nayawãxna i ãx na yaxücuxüçèx i carnerugüarü dauruũ. Rü nüma i carnerugü rü nüxũ nacuèxgü i naga i ngëma norü dauruũ. Rü ngëma norü dauruũ rü wüxichigü i norü carneru rü naegamaã naxcèx naca na ínamuxũãxüçèx i naxpúxüwa. ⁴ —Rü ngëxguma ínamuxũãxgu i guxüma i norü carnerugü, rü nüma i norü dauruũ rü napéxegu nixüchigü. Rü nümagü i carnerugü rü nawe narüxĩ, erü nüxũ nacuèxgü i naga. ⁵ —Natürü ngëxguma wüxi i yatü i tama aixcuma norü dauruũ ixĩxũ, rü tama nawe narüxĩ i ngëma carnerugü. Rü nüxna naxígü, erü tama nüxũ nacuèxgü i naga i ngëma tama norü dauruũ ixĩxũ —ñanagürü ga Ngechuchu. ⁶ Rü Ngechuchu rü duñxügümaã nüxũ nixu ga yema ore ga cuèxruũ, natürü ga nümagü rü tama nüxũ nacuèxgüéga ga ñacüchiga na yĩxũ.

Ngechuchu rü carneruarü dauruũ ya mecü nixĩ

⁷ Rũ yexguma ga Ngechuchu rũ wenaxãrũ ñanagũrũ nũxũ: —Aixcũma pemaã nũxũ chixu rũ choma nixĩ i carnerupũxũãrũ ããx i nawa yachocuxũxũ i carnerugũ. ⁸ Guxũma ga yema chopegu nũxira núma ãxũ rũ ngítèèxgũxũ rũ máètagũxũ nixĩgũ. Natũrũ yema carnerugũ rũ tama naga naxĩnũẽ. ⁹ Choma nixĩ i ããx. Rũ texé ya chowa ixucuxe rũ tá tamaxũ. Rũ meãma tá tũxũ naxũpetũ ngèxgumarũũ i wũxi i carneru i naxpũxũgu ùcuxũ rũ íxũxũxũxũ rũ nũxũ iyangaucũ ya mecũ ya maxẽ. ¹⁰ Ngẽma ngítèxáxũ rũ núma naxũ na yangĩxũcèx rũ namáètaxũcèx rũ nachixexẽãxũcèx. Rũ ngẽmacèxicatama núma naxũ. Natũrũ i choma rũ núma chaxũ na chanamaxèxèxũcèx i duũxũgũ rũ na aixcũma nũxũ nangèxmaxũcèx i maxũ i taguma gũxũ. ¹¹ Choma nixĩ i carneruarũ dauruũ ya mecũ chiĩxũ. Erũ wũxi i carneruarũ dauruũ ya mecũ rũ norũ carnerugũxũ ínapoxũ rũ ñuxmata naxcèx nayux. ¹² Natũrũ ngẽma dũerucèxmare puracũxũ, rũ ega ngèxguma aixũ nadèuxgux rũ carnerugũna ngẽma niña. Rũ ngẽmaãcũ nanaxũ erũ tama aixcũma norũ dauruũ nixĩ i nũmax, rũ tama noxrũ nixĩ i ngẽma carnerugũ. Rũ ngẽma ai rũ carnerugũxũ ínayauxũ rũ ngèxma tũxũ naxũanexèẽmare. ¹³ Rũ ngẽma yatũ rũ niña, erũ norũ dũerucèxicatama ngẽma napuracũ. Rũ tama aixcũma carnerugũgu narũxinũ. ¹⁴⁻¹⁵ Choma nixĩ i carnerugũarũ dauruũ ya mecũ chiĩxũ. Rũ ngèxgumarũũ ya Chaunatũ na choxũ nacuáxũ rũ choma rũ Chaunatũxũ na chacuáxũ, rũ ngèxgumarũũ ta nũxũ chacuèx i chorũ carnerugũ, rũ nũmagũ rũ choxũ nacuèxgũ. Rũ choma rũ naxcèx chayũ i chorũ carnerugũ. ¹⁶ Rũ choxũ

nangẽxmagũ ta i togũ i carnerugũ i tama ñaã naxpũxũwa ngẽxmagũxũ. Rũ ngẽmagũ rũ tá ta nuã chanagagũ, rũ tá chauga naxĩnũẽ. Rũ wũxítũcumũ tátama nixĩ rũ choma tátama nixĩ i norũ dauruũ chiĩxũ. ¹⁷ Chaunatũ rũ choxũ nangechaũ, erũ chorũ carnerugũcèx chayu rũ wena táxarũ chamaxũ. ¹⁸ Taxúema choxũ tayuxẽẽ, natürũ chomatama chorũ ngúchaũmaãtama ichanaxã i chorũ maxũ. Erũ choxmẽxwa nangẽxma na ichanaxãxũcèx, rũ wena na chanayaxuxũcèx, yerũ yemaãcü choxũ namu ga Chaunatũ —ñanagürũ. ¹⁹ Rũ yexguma yema orexũ naxĩnũẽgu ga yema Yudíugüarũ ãẽxgacügũ rũ wenaxãrũ nügũ nitoye ga yema nagu naxĩnũẽxũwa. ²⁰ Rũ muxũma ga nũmagũ rũ ñanagürügũ: —¿Tũxcũũ nüxũ íperũxĩnũẽ i ñaã yatũ i ngẽãẽxũ i ngoxo nawa ngẽxmaxũ? —ñanagürügũ. ²¹ Natürũ ga togũ rũ ñanagürügũ: —Taxuũma i yatũ i ngoxo nawa ngẽxmaxũ rũ ñaãrũũ meã nidexa. ¿Ñuxãcü i wũxi i yatũ i ngoxo nawa ngẽxmaxũ rũ tũxũ narũmexètũxẽẽ ya wũxi ya ngexetũxe? —ñanagürügũ.

Yudíugüarũ ãẽxgacügũ rũ Ngechuchuxũ naxoxe

²² Rũ nawa nangu ga yema peta ga gucũ ga taunecũgu norũ tupauca ga taxũnecèx naxũgũxũ ga Yudíugũ na nüxna nacuèxãchigũxũcèx ga yema ngunexũ ga nagu yanguxũ ga guma tupauca. Rũ nagáuane ga Yerucharéũwa ga yexguma. ²³ Rũ guma tupauca ga taxũnewa nayexma ga wũxi ga chopetũchica ga Charumóũãrũ Chopetũchicagu ãegaxũ. Rũ yemagu nayarũxũxũ ga Ngechuchu. ²⁴ Rũ ga yema Yudíugüarũ ãẽxgacügũ rũ nüxũ ínachomaẽguãchi, rũ ñanagürügũ nüxũ: —¿Ñuxguratáta tomaã quixaixcũma na cugũ

quixuxũ na texé na quiĩxũ? Ega aixcũma cuma rü Cristu quixĩgu, rü jmeã noxtacũma tomaã nüxũ ixu! —ñanagürügü. ²⁵ Rü Ngechuchu nanangãxũ, rü ñanagürü nüxũ: —Marü pemaã nüxũ chixu, natürü i pema rü tama choxũ peyaxögü. Guxũma i tacü i chaxüxũ rü Chaunatüarü poramaã nixĩ i chanaxüxũ, rü ngẽmawa meãma pexũ nüxũ chadauxẽẽ na choma rü Cristu na chiĩxũ. ²⁶ —Natürü pema rü tama peyaxögü, erü tama chorü carnerugütanüxũ pixĩgü. ²⁷ —Chorü carnerugü rü nüxũ nacuèx i chauga, rü choma rü chorü carnerugüxũ chacuèx, rü nüma rü chowe narüxĩ. ²⁸ —Rü choma rü nüxna chanaxã i maxũ i taguma gúxũ. Rü nümagü rü tagutãma inayarütaxe, rü taxúetãma choxna tanapuxũ i choxméxwa. ²⁹ —Rü yíxema Chaunatü choxna tüxũ mugüxe ya chorü carnerugü, rü guxũãrü yexera tixĩ i napéxewa. Rü taxúema texé nüxna tüxũ tapuxũ. ³⁰ —Chaunatü rü choma rü wüxitama tixĩgü —ñanagürü. ³¹ Rü yexguma ga yema Yudügüarü ãëxgacügü rü wenaxãrü nutane nanayauxgü na gumamaã Ngechuchuxũ ínamuxüchigüxũcèx. ³² Natürü ga Ngechuchu rü ñanagürü nüxũ: —Pepéxewa chanaxü i muxũma i mexügü i Chaunatüarü poramaã chaxüxũ. ¿Rü ngëxürüüxũ i ngẽma mexũ i chaxüxũcèx nixĩ i choxũ nutamaã ípemuxüchigüchaũxũ? —ñanagürü. ³³ Rü yema Yudügüarü ãëxgacügü rü Ngechuchuxũ nangãxügü, rü ñanagürügü: —Tama wüxi i puracü i mexüçèx cuxũ ítamuxüchigüchaũ. Natürü cuxũ ítamuxüchigüchaũ erü Tupanamaã rü tacü quixugü. Cuma rü wüxi i duũxũmare quixĩ rü cugü Tupanaxũ quixĩxẽẽchaũ —ñanagürügü. ³⁴ Rü nüma ga Ngechuchu rü ñanagürü nüxũ: —Perü

mugüpanewa rü naxümatü i Tupanaãrü ore i ñaxü:

“Rü pematama nixĩ i tupanagü pixĩgüxũ”,

ñaxü. ³⁵ —Rü ngẽma Tupanaãrü ore i ümatüxüwa nüxü yaxuxü, rü nüxü tacuèx rü taxucürüwama texé itayanaxoxêê. Rü ngẽma orewa rü Tupana rü ñanagürü:

“Guxãma ya yíxema texé yanayauxgüxe i chorü ore rü tupanagü tixĩgü”,

ñanagürü i ngẽma orewa. ³⁶ —Rü Tupana choxü nayaxu na chanaxüxcèx i norü puracü, rü yemacèx ñoma ga naãnewa choxü namu. ¿Rü ñuxãcü i pema nagu perüxĩnüêgu rü chixexü Tupanamaã chaxüxü i ngëxguma Tupana Nane chixĩ —ñachagu pemaã? ³⁷ —Rü ngëxguma chi tama chanaxüxgu i ngẽma mexü i Chaunatü üxü, rü marü name ega woo tama choxü peyaxögügu. ³⁸ —Natürü ngëxguma chanaxüxgu i ngẽma Chaunatü üxü, rü woo tama choxü peyaxögügu, rü chanaxwexe i nüxü peyaxögü i ngẽma taxü i mexügü i Chaunatüarü poramaã chaxüxü. Erü ngëmawa tá nüxü pecuèx na Chaunatü rü chowa nangëxmaxü rü choma i nawa —ñanagürü. ³⁹ Rü we-naxãrü Ngechuchuxü niyauxgüchaũ ga yema Yudíugüarü ãëxgacügü. Natürü nüma ga Ngechuchu rü naxchaxwa niña. ⁴⁰ Rü yexguma ga Ngechuchu rü natü ga Yudáũãrü tocutücèx tomaã nataegu. Rü yema nachica ga Cuáũ duüxügüxü üpaacü nawa lbaiüxëëxügu tomaã narüxãüx. ⁴¹ Rü muxüma ga duüxügü rü Ngechuchuxü ínayadaugü, rü ñanagürügü: —Cuáũ rü taxuüma ga taxü ga mexü ga cuèxruü naxü ga Tupanaãrü poramaã. Natürü guxüma ga ore ga Cuáũ tamaã nüxü ixuxü ga ñaã yatüchiga rü aixcüma nixĩ —ñanagürügü. ⁴² Rü yema nachicawa rü muxüma ga duüxügü rü Ngechuchuaxü nayaxögü.

11

Dácharuarü yuxchiga

¹ Nayexma ga wüxi ga yatü ga idaawecü ga Dácharugu ãegacü. Rü nüma rü naëyèxgü ga María rü Marta rü ñãne ga Betániãcũãx nixïgü. ² Rü yema María iyixï ga Cori ga Ngechuchucutügu pumara bacü rü ñuxüchi ngïyaemaã ínapicutücü. Rü guma Dácharu ga idaawecü nixï ga ngïeneë. ³ Rü poraãcü nidaawe ga Dácharu. Rü yemacèx ga naëyèxgü, rü Ngechuchuxütawa imugagü, rü ngïgürügügü: “Pa Corix, cumücü ya Dácharu ya nüxü cungechaïcü rü nidaawe”, ngïgürügügü. ⁴ Rü yexguma yema orexü naxïnügu ga Ngechuchu, rü ñanagürü: — Ngëma ðaawe rü täütáma yumaã inayacuèx. Natürü nidaawe na duïxügü nüxü nadaugüxücèx na ñuxãcü naporaxü ya Tupana rü ñuxãcü choma i Nane rü ta na chaporaxü —ñanagürü. ⁵ Rü Ngechuchu poraãcü María rü Marta rü Dácharuxü nangechaü. ⁶ Natürü yexguma nüxü naxïnügu ga na yaðaawexü ga Dácharu, rü tama paxa ínayadau. Rü taxre ga ngunexüãmatama yexma narüxãüx ga yema nachica ga nawa nayexmaxüwa. ⁷ Rü yixcama ga yemawena rü toxü ñanagürü: —¡Ngïxã rü wena Yudéaanewa taxï! —ñanagürü. ⁸ Rü toma ga norü ngúexügü rü ñatarügügü nüxü: —Pa Ngúexëëruïx, yexwacatama nixï ga yémacũãx ga Yudíugüarü ãëx-gacügü yexma nutamaã cuxü ímuxüchigüchaüxü. ¿Rü tïxcüü wena ngema cuxüxchaü i ñuxmax? —ñatarügügü. ⁹ Rü Ngechuchu rü tomaã nüxü nixu ga wüxi ga ore na nüxü tacuèxgüxücèx na tauta nawa nanguxü na nayuxü ga nümax. Rü ñanagürü toxü: —¿Taux éxna i wüxi i ngunexü rü 12 i ora nawa ngëxmaxü? Ngëxguma texé ngunecü ixüxgu rü tama ðacümaã itayarüña, erü tümacèx

nangóone. ¹⁰ —Natürü ngëxguma wüxie chütacü ixüxgu rü ngëmaäcü tacümaã itayarüña, erü tümacèx naxëãne —ñanagürü. Rü yemaäcü nanangoxëë na tauta nawa nanguxü na nayuxü ga nümax. ¹¹ Rü yemawena ga Ngechuchu rü ñanagürü toxü: —Tamücü ya Dácharu rü napemare. Natürü ñuxma rü tá chayabaixächixëë —ñanagürü. ¹² Rü yexguma ga toma ga norü ngüexügü rü ñatarügügü: —Pa Corix, ega napemaregu, rü ngëmawa nüxü tacuèx na naxcèx tá yataanexü —ñatarügügü. ¹³ Natürü ga Ngechuchu rü nüxü nixuxchaüchiréx ga Dácharu ga marü na nayuxü. Natürü ga toma nüxü tacuèxgügu rü na napemarexüchigaxü yixü ga tomaã yaxuxü. ¹⁴ Rü yexguma ga Ngechuchu rü meãma tomaã nüxü nixu rü ñanagürü: —Dácharu rü marü nayu. ¹⁵ —Natürü choma rü chataãe na tama ngema changëxmaxü, erü ngëmaäcü nixi i namemaëxü i pexcèx na choxü peyaxögüxücèx. ¡Rü ngixã rü itayadaugü! —ñanagürü. ¹⁶ Rü yéma nayexma ga totanüxü ga Tumachi ga Wüxigu Buexü ga Taxreéxpúxümaã, naxugüxü. Rü nüma ga Tumachi rü ñanagürü toxü: —¡Ngixã i yixema rü ta ngema taxí na wüxigu Ngechuchumaã iyuexücèx! —ñanagürü.

Ngechuchu nixi i wena namaxëxëxü i yuexü

¹⁷ Rü yexguma Betániãwa tomaã nanguxgu ga Ngechuchu, rü marü ägümücü ga ngunexü nangupetü ga na iyatèxgüãxü ga Dácharu. ¹⁸ Rü guma Betániã rü Yerucharéüãrü ngaicamana nayexma. Rü tomaëxpüx ga kilómetru nixi ga norü yaxü. ¹⁹ Rü muxüma ga Yudíugü rü Dácharueyèx ga Marta rü Maríaxütawa naxi na ngixü yataãëxëgüxücèx, yerü nayu ga ngiëneë. ²⁰ Rü yexguma Marta nüxü cuèxgu ga marü na ínanguxü ga

Ngechuchu, rü nüxũ iyatüxãchi. Natürü ga María rü íxgutama irüxãũx. ²¹ Rü Marta rü ngĩgürügü nüxũ ga Ngechuchu: —Pa Corix, yexguma chi cuma cunumèngu rü tãũ chima nayu ga chaueneẽ. ²² —Natürü choma nüxũ chacuèx na woo i ñuxma na nayuxũ, rü Tupana tá cuxna nanaxã i guxũma i tacü i naxcèx ícuçaxũ —ngĩgürügü. ²³ Rü Ngechuchu ngĩxũ nangãxũ rü ñanagürü: —Cueneẽ rü wena tá namaxũ —ñanagürü. ²⁴ Rü Marta ngĩgürügü nüxũ: —Ngẽmããcü nüxũ chacuèx rü wena tá namaxũ i ngëxguma naguxgu i naãne rü ngëxguma wena namaxëgu i guxũma i yuexũ —ngĩgürügü. ²⁵ Rü yexguma ga Ngechuchu rü ñanagürü: —Choma nixĩ i íchanadagüxëxũ i yuexũgü, rü wena chanamaxëxëxũ. Rü yíxema choxũ yaxóxë rü woo tayuxgu rü tá wenaxãrũ tamaxũ. ²⁶ —Rü guxãma ya texé ya maxũxë rü choxũ yaxóxë, rü guxũgutãma tamaxũ. ¿Cuyaxóxũ yĩxũ i ngẽma? —ñanagürü ga Ngechuchu. ²⁷ Rü ngĩma rü ngĩgürügü nüxũ: —Ngũ, Pa Corix, choma rü chayaxõ na cuma rü Tupana Nane ya Cristu ga ítananguxëécü na quiixũ —ngĩgürügü.

Dácharu itáxũwa naxaxu ga Ngechuchu

²⁸ Rü yema ñaxguwena rü Marta rü ngĩëyèx ga Maríacè x iyaca. Rü bexma ngĩmãã nüxũ iyarüxu, rü ngĩgürügü: —Marü nuã nangu ya Ngúexëëruũ ya Ngechuchu, rü choxũ cuxcèx nayacaxëẽ —ngĩgürügü. ²⁹ Rü yexguma María nüxũ ñnügu ga marü yéma na nanguxũ ga Ngechuchu, rü paxa ichi, rü Ngechuchuxũ íyadau. ³⁰ Rü Ngechuchu rü tauta íãnewa nangu ga yexguma, rü yema nachica ga Marta nüxũ ídauxũwatama nixĩ ga nayexmaxũ. ³¹ Rü Maríapatawa nayexma ga ñuxre ga yémacũãx

ga Yudfugüarü ãëxgacügü ga ngĩxũ yéma taãëxëëgüxũ. Rü yexguma ngĩxũ nadaugügu ga paxa na inachixũ rü na ínaxũxũ, rü ngĩwe narüxĩ. Yerü nüma nüxũ nacuëxgügu rü yéma Dácharu itáxũwa ixũ na yéma yaxaxuxüçèx. ³² Rü yexguma Ngechuchuxũtawa nanguxgu ga María, rü napëxegu iyacaxápüxü, rü ngĩgürügü: —Pa Corix, yexguma chi cuma cunumëxgu rü tãu chima nayu ga chaueneë ya Dácharu —ngĩgürügü. ³³ Rü yexguma Ngechuchu ngĩxũ dëuxgu ga na naxaxuxũ rü na naxauxexũ ga yema Yudfugüarü ãëxgacügü ga ngĩwe rüxĩxũ, rü poraãcü ngechaũ nüxũ nangux. ³⁴ Rü Ngechuchu nüxna naca rü ñanagürü: —¿Ngexta nixĩ i ipenatáxũ? —ñanagürü. Rü nümagü nanangãxũ rü ñanagürügü: —Pa Corix, ¡dücax, nuã naxü, rü íyadau! —ñanagürügü. ³⁵ Rü naxaxu ga Ngechuchu. ³⁶ Rü yema Yudfugü rü ñanagürügü: —¡Düçèx ñuxãcü poraãcü Dácharuxũ nangechaũ! —ñanagürügü. ³⁷ Natürü ñuxre ga yema ãëxgacügü ga Yudfugüarü rü ñanagürügü: —Daa nixĩ ga guma yatü ga ngexetücüxũ rümexëëcü. ¿Rü tüxcüũ taxucürüwa tacü rü mexũ Dácharuçèx naxü na tama nayuxüçèx? —ñanagürügü.

Wenaxãrü namaxũ ga Dácharu

³⁸ Rü Ngechuchu poraãcü ngechaũ nüxũ nangux rü Dácharumaxüçèx nixũ. Rü wüxi ga mëxpúneãrü äxmaxũ nixĩ ga yema naxmaxũ. Rü nayexma ga wüxi ga nuta ga norü ngüxtaũruũ. ³⁹ Rü Ngechuchu rü ñanagürü: —¡Ípenangüxgachix ya yima nuta ya namaã nangüxtaũcü! —ñanagürü. Natürü ga Marta ga Dácharueyèx rü ngĩgürügü: —Pa Corix, cuxá marü nayixane nixĩ, erü marü ägümücü i ngunexũ naëtü nixĩ ga na nayuxũ

—ngĩgürügü. ⁴⁰ Natürü ga Ngechuchu rü ñanagürü ngĩxũ: ¿Taux éxna i marü cumaã nüxũ chixuchiréxũ rü ngëxguma cuyaxõxgu rü tá nüxũ cudau i wüxi i mexũ i taxũ i Tupana üxũ? —ñanagürü. ⁴¹ Rü yexguma ínanangüxgachigü ga guma nuta. Rü Ngechuchu daxügu nadawenüãcüma ñanagürü: —Pa Chaunatü Pa Tupanax, moxë cuxna chaxã erü marü choxũ cuxĩnü. ⁴² —Choma nüxũ chacuèx rü guxüguma choxũ cuxĩnü. Natürü moxë cuxna chaxã i ñuxma erü chanaxwèxe i ñaã duũxügü na yaxõgüãxũ na cuma núma choxũ cumuxũ —ñanagürü. ⁴³ Rü yexguma yema ñaxguwena, rü tagaãcü ñanagürü: —Pa Dácharux, jínaxũxũ i ngema! —ñanagürü. ⁴⁴ Rü ínaxũxũ ga Dácharu ga naxchápenüü-maã guxüwama rübuxpüxücü. Rü Ngechuchu ñanagürü nüxũ ga duũxügü: —Ípeyawëxpüxũ na íyaxüxüçè! —ñanagürü.

Ãëxgacügü naxcèx nadaugü na ñuxãcü Ngechuchuxũ yayauxgüxũ

(Mt 26.1-5; Mr 14.1-2; Lc 22.1-2)

⁴⁵ Rü yema Yudíugüarü ãëxgacügü ga Maríawe rüxĩxũ rü nüxũ nadaugü ga yema Ngechuchu üxũ, rü muxüma Ngechuchuaxũ nayaxõgü ga yexguma nüxũ nadaugügu ga ñuxãcü wena Dácharuxũ na namaxëëxũ. ⁴⁶ Natürü ñuxre ga yema ãëxgacügü rü Parichéugümaã nüxũ nayarüx-ugü ga yema Ngechuchu üxũ. ⁴⁷ Rü yexguma ga yema Parichéugü rü paigüarü ãëxgacügü rü nangutaquéxegü namaã ga guxüma ga yema ãëxgacügütücumüwa ügüxũ. Rü ñanagürügü: —¿Tãcü tá taxüe? Erü ñaã yatü i Ngechuchu rü nanaxü i muxüma i mexũ i cuèxruügü. ⁴⁸ —Ngëxguma chi tama yayauxgügu, rü guxütáma i duũxügü rü tá nüxũ nayaxõgü, rü Dumacũãxgüarü churaragü rü

núma chi naxĩ rü nagu napogüe ya tórü tupauca ya taxũne, rü düxwa tãũ chima tórxrü nixĩ i ñaã tachiũãne — ñanagürügü. ⁴⁹ Natürü guma taunecügu rü yema paigütanüwa rü Caipá nixĩ ga norü ãëxgacü. Rü núma rü ñanagürü nüxũ: —Pemagü rü taxuũma pecuèx. ⁵⁰ — ĴÉxna tama nüxũ pecuèx rü taxcèx rü na namemaëxũ na wüxitama i yatü guxũ i duũxũgücèx na yuxũ, na tama nayuexũcèx i guxũma i tachiũãnecũãx i duũxũgü? —ñanagürü. ⁵¹ Natürü ga Caipá rü tama nüëchama yema ñanagürü, yerü guma taunecügu rü núma nixĩ ga paigüarü ãëxgacü yĩxũ. Rü yemacèx rü Tupana nixĩ ga Caipáwa idexacü ga yexguma nüxũ yaxuxgu na Ngechuchu rü guxũma i Yudfugücèx tá na nayuxũ. ⁵² Rü yema orewa rü nanangoxëë na tama Yudfugücèxicatama tá na nayuxũ, natürü guxũma i Tupanaärü duũxũgü i guxũ i nañewa ngëxmagüxũcèx rü tá ta na nayuxũ, na ngëmaãcü wüxigu nangutaquéxexũcèx i guxũma i ngëma duũxũgü i Tupanaärü ixĩgüxũ. ⁵³ Rü yexgumaũcüü nixĩ ga inaxügüeãxũ ga Yudfugüarü ãëxgacügü ga nagu na naxĩnüëxũ ga ñuxãcü tá na Ngechuchuxũ yamèxgüxũ. ⁵⁴ Rü yemacèx ga Ngechuchu rü marü tama yema Yudfugü ímuxũtanügu naxã. Rü tomaã ínaxũxũ ga Yudéanewa, rü wüxi ga ñanexãcü ga Efraígu äeganewa naxũ. Rü yexma tomaã narüxãũx. Rü guma ñãne rü wüxi ga nachica ga ngextá taxúema íxãpataxũãrü ngaicamana nayexma. ⁵⁵ Rü marü ningaica ga yema Yudfugüarü peta ga Üpetüchiga. Rü yemacèx muxũma ga duũxũgü ga nái ga ñanecũãx rü Yerucharéüwa naxĩ na Tupanacèx nügü yamexëëgüxũcèx naxũpa ga yema peta. ⁵⁶ Rü Ngechuchucèx nadaugü ga duũxũgü. Rü tupauca ga taxũnewa nügüna nicagüetanü, rü ñanagürügü: —ĴÑuxũ

ñapegüxũ i pemax? ¿Ñoma i petawa tá naxũxũ rü éxna tama? —ñanagürügü. ⁵⁷ Rü yema Parichéugü rü paigüarü ãëxgacügü rü duũxügüna naxägagü, rü ñanagürügü: — Ngëxguma ngextá nüxũ pedaugügu i ngëma Ngechuchu, jrü tomaã nüxũ peyarüxu na tayayauxgüxúcè! — ñanagürügü.

12

Wüxi ga nge rü Ngechuchucutügu pumara iba
(Mt 26.6-13; Mr 14.3-9)

¹ Rü 6 ga ngunexũ naxüpa ga Üpetüchigaarü peta, rü Ngechuchu rü tomaã Betániäwa naxü. Rü guma ñäne nixĩ ga nagu naxächixũne ga Dácharu ga Ngechuchu wena namaxëëcü. ² Rü yéma Dácharuchixũwa Ngechuchucè nanaxügü ga taxũ ga õna. Rü totanüwa ga yema mechawa yexmagüxe rü Dácharu nixĩ ga Ngechuchuxütawaama chibücü. Rü Marta iyixĩ ga inaxücü ga õna. ³ Rü yexguma ga María rü yéma inange ga wüxi ga taxüraweũxũ ga pumara ga yixichixũ rü tatanüxüchixũ. Rü Ngechuchuxũ namaã iyixcutü. Rü ñuxüchi ngÿyaemaã ínapicutü. Rü guma ñ rü guxüwama nayixmachĩã namaã ga yema pumara. ⁴⁻⁵ Rü yexguma ga Yuda ga Icariüte ga wüxi ga totanüxüchiréx ixĩxũ ga yixcama bexma cúãcü Ngechuchuxũ íxuaxũxũ, rü ñanagürü: —¿Tüxcüũ tama tatanüxügu namaã itaxe i ngëma pumara na ngëma dïëru-maã nüxũ nangüxëëxúcèx i ngëma duũxügü i ngearü dïëruãxgüxũ? —ñanagürü. ⁶ Natürü ga Yuda rü tama aixcüma nagu narüxĩnü ga yema ngearü dïëruãxgüxũ. Natürü yema ñanagürü yerü nüma rü wüxi ga ngítèxáxũ nixĩ. Rü naxmëxwa nayexma ga yema choca ga dïëru ngĩxũ nagu taxügüxũ ga guxãma ga toma ga

Ngechucharü ngúexũgü. Rü Yuda rü ñuxguacü rü noxrüxütama ngĩxne nangĩxĩxũ. ⁷ Rü yexguma ga Ngechuchu rü ñanagürü nüxũ: —;Tãxú i ngĩxũ cuchixewexũ! Erü choma rü paxa tá chayu rü tá ichatèx. Rü ngẽmacèx nixĩ i ngẽma pumaramaã choxũ nachaxũ. ⁸ — Ngẽma ngearü dïeruãxgüxũ rü guxũgutáma petanüwa nangẽxmagü. Natürü i choma rü täütáma guxũgu petanüwa changẽxma —ñanagürü.

Paigüarü ãëxgacügü rü nügümaã nanamexëëgü ga ñuxãcü Dácharuxũ tá na yamèxgüxũ

⁹ Rü muxüma ga Yudíugü rü nüxũ nacuáchiga ga Betániãwa na nayexmaxũ ga Ngechuchu. Rü yéma naxĩ na nüxũ nadaugüxüçèx. Rü tama Ngechuchuxüxĩcatama nadaugüchaũ natürü nüxũ nadaugüchaũ ta ga Dácharu ga Ngechuchu wena namaxëëcü. ¹⁰ Rü yexguma ga paigüarü ãëxgacügü rü nügümaã nanamexëëgü ga Dácharuxũ rü ta na yamèxgüxüçèx. ¹¹ Yerü Dácharugagu nixĩ ga muxüma ga Yudíugü ga Ngechuchuaxú yaxögüãxũ rü yema paigüna naxĩgüxũ.

Ngechuchu rü Yerucharéügu naxücu

(Mt 21.1-11; Mr 11.1-11; Lc 19.28-40)

¹² Rü muxüma ga duũxügü rü Yerucharéüwa naxĩ naxçèx ga Üpetüchigaarü peta. Rü moxüãcü duũxügü nüxũ nacuáchigagü ga Ngechuchu rü guma ñãnewa na nanguxchaũxũ. ¹³ Rü yexguma moruátüta nadaũgü rü yemamaã Ngechuchuxũ nayatüxgütanüãchi. Rü tagaãcü ñanagürügü: —;Rü naxüüne rü namecümaxüchi ya daa Tupanaégagu núma ücü! ;Rü yixema na Iraétanüxũ ixĩgüxũ rü namecümaxüchi ya daa tóru ãéxgacü! — ñanagürügü. ¹⁴ Rü Ngechuchu nüxũ inayangau ga wüxi

ga buru, rü naetügu naxaunagü ga yema Tupanaärü ore ga ümatüxü nüxü ixuxürüü ga yexguma ñaxgu:

¹⁵ “¡Tāxú i pemuñëxü, Pa Yerucharëücüāxgü! ¡Rü iperü-daunü na ngema ne naxüxü ya perü ãëxgacü ya wüxi i buru i íraxüetügu aunagücü!”

ñaxü. ¹⁶ Rü noxri ga toma ga norü ngüexügü rü tama nüxü tacuëxgüéga ga Ngechuchuchiga na yixü ga yema ore. Natürü yixcúra marü Ngechuchu Tupanaxütawa üxgu, rü yexguma nixí ga nüxna tacuëxächixü ga guxüma ga yema Ngechuchuxü ngupetüxü, rü yema Tupanaärü ore nüxü ixuxüäcütama nüxü na nangupetüxü. ¹⁷ Rü yema duüxügü ga Ngechuchuxütawa yexmagüxü ga yexguma Dácharuxü wena namaxëëgu, rü nüxü nixugüe ga yema nüxü nadaugüxü. ¹⁸ Rü yemacèx nixí ga duüxügü ga Ngechuchuxü yatüxächitanüxü na nayauxgüāxücèx, yerü nüxü nacuáchigagü ga yema taxü ga mexü ga Tupanaärü poramaã naxüxü. ¹⁹ Natürü ga yema Parichéugü rü nügümaã ñanagürügü: —Marü nüxü pedauxü i ñuxma na taxucürüwama tacü namaã ixüxü. ¡Rü dücax, guxüma i duüxügü rü nawe narüxí! —ñanagürügü.

Griégugü rü Ngechuchuxü nadaugüchaü

²⁰ Rü muxüma ga duüxügü rü petacèx Yerucharëüwa naxí na yéma Tupanaxü na yanacuëxüügüxücèx. Rü yema duüxügütanüwa nayexma ga ñuxre ga Griégugü. ²¹ Rü yema Griégugü rü Piripicèx naxí. Rü nüma ga Piripi rü Gariréaaneärü ñäne ga Bechaídacüāx nixí. Rü nüxü nacèëxügü rü ñanagürügü: —Pa Corix, nüxü tadauxchaü ya Ngechuchu —ñanagürügü. ²² Rü Piripi rü Aüdrémaã nüxü nayarüxu. Rü yema taxre rü

wüxigu Ngechuchuxütawa naxĩ, rü namaã nüxũ nayarüxugü. ²³ Rü yexguma ga Ngechuchu rü ñanagürü nüxũ: —Rü marü nawa nangu tá na chayuxũ rü we-naxãrü Chaunatüxütawa tá na chaxũxũ i choma i Tupana Nane i duũxũxũ chíixũ. ²⁴ —Rü aixcuma pemaã nüxũ chixu rü ngëxguma chi wüxipüxü i trigu tama waixũmüãnegu toxgu rü wüxipüxüechatama nixĩ. Natürü ega waixũmügu natoxgu, rü ngema naxüxgu, rü muxüchinema ínguxuchi. [Rü ngëxgumarüũ tá ta Tupanaxütawa nangugü i muxüma i duũxügü ega chayüxgux.] ²⁵ —Rü pemaã nüxũ chixu rü texé ya yíxema tümaãrü maxũxũ ngechaũxẽ i ñoma i naãnewa rü tá itayarütaxu. Natürü texé ya yíxema tama tümaãrü maxũxũ ngechaũxẽ rü tama yuxũ muũxẽ i ñoma i naãnewa, rü tá tüxũ nangëxma i maxũ i taguma gúxũ. ²⁶ —Rü ngëxguma texé choxũ puracüchaũgu rü name nixĩ i chowe tarüxü. Rü ngema choma tá íchangëxmaxüwa rü ngema rü tá ta tangëxma i tümax. Rü ngëxguma texé choxũ puracügu rü Chaunatü ya Tupana rü tá tümamaã nataãẽ —ñanagürü.

Ngechuchu nanaxunagü ga norü yuxchiga

²⁷ —Rü Ngechuchu ñanagürü: —Rü ñuxma rü poraãcü changechaũ rü chanaxixãchiãẽ. ¿Rü tacüxũ tá Chaunatümaã chixuxũ? Taxucürüwa namaã nüxũ chixu na choxũ ínguxuchixẽxücèx na tama chayuxücèx, erü woetama ngëmacèx núma chaxü —ñanagürü. ²⁸ Rü ñanagürü: —Pa Chaunatüx, ¿Choxũ rüngüxẽẽ na duũxügüpéxewa cuxũ chataxẽxücèx! —ñanagürü. Rü yexguma ga yema duũxügü ga yema yexmagüxũ rü nüxũ naxínüẽ ga wüxi ga naga ga daxüwa inaxüxũ ga ñaxũ: —Marü cuxũ charüngüxẽẽ na choxũ cutaxẽxũ ga noxrix, rü

wena táxarü cuxũ charüngũxẽẽ na choxũ cutaxẽẽxũcèx —ñanagürü ga yema naga. ²⁹ Rü yema duũxũgü ga yéma yexmagũxũ ga nüxũ ñnüèxũ ga yema naga, rü ñanagürügü: —Wüxi i duruanexũ nixĩ —ñanagürügü. Natürü togü rü ñanagürügü: —Wüxi i Tupanaãrü orearü ngeruũ i daxũcũãx nixĩ i namaã idexaxũ —ñanagürügü. ³⁰ Rü yexguma ga Ngechuchu rü ñanagürü nüxũ: —Tama chauxcèx nixĩ i nüxũ pexĩnüèxũ i ngẽma naga. Rü pexcèxtama nixĩ i nüxũ pexĩnüèxũ. ³¹ —Rü ñuxma tá nixĩ i Tupana inaxügüãxũ na tüxũ napoxcuexũ ya duũxẽ naxcèx i tümaãrü pecadugü. Rü ñuxma tá nixĩ i Tupana ínatèxüchixũ i ngẽma ñoma i naãnewa poraxũ i Chataná. ³² —Rü ngëxguma curuchawa chipotagu rü chaugüxũtawa tá chanagagü i guxũma i duũxũgü —ñanagürü ga Ngechuchu. ³³ Rü yema orewa duũxũgümaã nüxũ nixu ga ñuxãcü tá na nayuxũ. ³⁴ Rü yema duũxũgü nanangãxũgü, rü ñanagürügü: —Torü mugü i ümatüxũwa nüxũ tadaugü na guxũgutáma namaxèchaxũ ya Cristu. ¿Rü ñuxãcü i cuma rü ñacurügü: “Rü Tupana Nane ya duũxũxũ ixĩcü rü curuchawa tá nipota”, ñacurügü? ¿Rü texé tixĩ ya yíxema Tupana Nane ya duũxũxũ ixĩxẽ? —ñanagürügü. ³⁵ Rü yexguma ga Ngechuchu rü ñanagürü nüxũ: —Ñoma rü ta petanüwa changëxma na ñoma i naãnewa pexũ changúexẽèxũcèx rü ngẽmaãcü pexũ changóonetanüxẽèxũcèx. Natürü paxaãchicèxicatama petanüwa changëxma. Rü name nixĩ i paxa choxũ peyaxögü ñoma rü ta pexcèx chanangóonexẽẽ naxũpa na naxèãnexũ. Erü yíxema èãnexũwa ngëxmaxẽ rü tama nüxũ tacuèx na ngextá taxũxũ. ³⁶ —Rü ñoma rü ta petanüwa changëxma rü name nixĩ i paxa choxũ

peyaxōgü na chorü ngóonexũwa pengẽxmagüxũcèx — ñanagürü. Rü yema ñaxguwena rü natanüwa ínaxũxũ ga Ngechuchu. Rü naxchaxwa inicux.

Tacücèx nixĩ ga Yudíugü ga tama Ngechuchuaxũ yaxōgüãxũ

³⁷ Rü woo ga Ngechuchu rü duũxũgüpéxewa nanaxü ga muxũma ga taxũ ga mexũ ga cuèxruũgü ga Tupanaãrü poramaã naxũxũ, natürü yexguma rü ta tama nüxũ nayaxōgü ga duũxũgü. ³⁸ Rü yemaãcü Tupana nayan-guxẽẽ ga yema ore ga Ichaxía ümatüxũ ga ñaxũ:

“Pa Corix, taxúema tayaxō ga yema ore ga tüxũ tangúexẽẽxũ. Rü woo nüxũ tadaugü na ñuxãcü naporaxũ ya Tupana, rü tama tayaxōgü”, ñaxũ. ³⁹⁻⁴⁰ Rü yemaãcü ga yema duũxũgü rü tama nayaxōgü yema Ichaxía ümatüxũwa nüxũ yaxuxürüũ, rü: “Yema duũxũgü rü tama nüxũ nadaugüchaũ rü tama nayaxōgüchaũ rü tama Tupanacèx nawoeguchaũ. Rü yemacèx ga Tupana rü nüxna nixü na tama nüxũ nadaugüxũcèx rü tama yaxōgüãxũcèx rü tama naxcèx nawoeguxũcèx na nüma nüxna naxããxũcèx i maxũ i ngexwacaxũxũ”,

ñaxũ. ⁴¹ Rü yema ñanagürü ga Ichaxía yerü nangoxetügu marü nüxũ nadau na ñuxãcü ãẽxgacü ya tacüxüchi na yĩxũ ya Ngechuchu ya Cristu. Rü yemaãcü nachiga nidexa. ⁴² Natürü muxũma ga yema Yudíugüarü ãẽx-gacügü rü Ngechuchuaxũ nayaxōgü, rü woo ga ñuxre ga naërügü rü ta nayaxōgü, natürü tama nügü nix-ugüchaũ ga duũxũgüpéxewa, yerü namuũẽ na Parichéugü ngutaquéxepataũwa ínawoxũxũ. ⁴³ Rü yemaãcü tama

nügü nixugüchañ, yerü norü me nixĩ ga duĩxũgü namañ nataãëgüxũ rü tama aixcuma naxcèx nadaugü na Tupana namañ taãëxũ.

Texé ya tama Ngechucharü oreaxũ yaxóxë rü tá tapoxcu

⁴⁴ Rü tagaãcü ñanagürü ga Ngechuchu: —Texé ya choxũ yaxóxë rü tama choxũxĩcatama tayaxõ. Natürü Chaunatü ya núma choxũ mucüaxũ rü ta tayaxõ. ⁴⁵ —Rü texé ya choxũ dauxe, rü Chaunatü ya núma choxũ mucüxũ rü ta tadau. ⁴⁶ —Choma na ngóonexëëruũ chiĩxũ, rü ñoma i nañnewa changu na guxãma ya texé ya choxũ yaxóxë rü tama ëãnexũwa na tangëxmagüechaxũcèx. ⁴⁷ —Natürü ngëxguma texé nüxũ ñnügü i chorü ore rü tama tayaxõxgu rü tama choma nixĩ i tüxũ chapoxcuxũ. Erü tama ñoma i nañnewa changu na chanapoxcuexũcèx i duĩxũgü, natürü núma chaxũ na chanamaxëxëxũcèx. ⁴⁸ —Yíxema texé ya tama choxũ yaxóxë rü tama chauga ñnuxë rü marü tüxũ nangëxma na tacücèx tá Tupana tüxũ poxcuxũ. Erü ngëma ore i nüxũ chixuxũgagu tátama nixĩ ya Tupana i tüxũ napoxcuxũ i nañneärü guxgu, erü tama tayaxõ i ngëma ore i nüxũ chixuxũ. ⁴⁹ —Tama chaugagutama chidexa, natürü guma Chaunatü ga núma choxũ mucü, rü guma nixĩ ga chomaã nüxũ ixucü na tacüxũ tá duĩxũgü-maã chixuxũ rü ñuxãcü tá chanangüexëxũ. ⁵⁰ —Rü nüxũ chacuèx na Chaunatüarü orewa nangëxmaxũ i maxũ i taguma gúxũ. Rü ngëmacèx i ngëma ore i nüxũ chixuxũ, rü ngëmatama ore nixĩ i Chaunatü choxũ muxũ na nüxũ chixuxũ —ñanagürü ga Ngechuchu.

13

Ngechuchu rü norü ngúexũgũxũ niyauxgücutü

¹ Rü wüxi ga ngunexũ nataxu ga nawa na nanguxũ ga yema Yudfugüarü peta ga Üpetúchiga. Rü Ngechuchu nüxũ nacuèx ga marü nawa na nanguxũ ga ñoma ga nañewa na yaxũxũ rü wenaxãrü Nanatüxütawa na naxũxũ. Rü nüma rü yexguma ñoma ga nañewa nayexmagu rü guxüguma tüxũ nangechaũ ga guxema noxrü ixĩgũxe. Rü yexgumarũũ ta ga yexguma toxna yaxũxchaũgu ga daxüguxũ ga nañewa na naxũxũ, rü yemaãcü poraãcü toxũ nangechaũ. ²⁻⁴ Natürü ga Chataná rü marü Yuda ga Chimãũ ga Icariúte nanena nangu na bexma cúãcü Ngechuchuxũ ínaxuaxũxũcèx. Rü Ngechuchu rü marü nüxũ nacuèx ga Nanatüxütawa na ne naxũxũ rü wena táxarü Nanatüçèx na nataeguxũ. Rü nüxũ nacuèx ga Nanatü rü naxmèxgu na naxüãxũ ga guxũma ga pora. Rü yemacèx ga yema chütaxũgu ga yexguma mechawa ítachibüeyane, rü inachi ga Ngechuchu. Rü ínacuçuchi ga norü gáuxüchiru, rü wüxi ga tuayamaã nügü nigoye.

⁵ Rü ñuxüchi yauxmèxüpáxũgu dexáta naba, rü toxũ niyauxgücutü. Rü guma tuaya ga namaã yagoyecümaã toxũ ínapiçücutü. ⁶ Rü yexguma Chimãũ ga Pedruxũ nayauxcutüchaũgu rü ñanagürü ga Pedru: —Pa Corix, ¿ñuxãcü tá i cuma i choxũ cuyauxcutüxũ? —ñanagürü.

⁷ Rü Ngechuchu nanangãxũ rü ñanagürü: —Ñuxma rü tama nüxũ cucuèx i tũxcüũ na chanaxüxü i ñaã, natürü yixcama rü tá nüxũ cucuèx —ñanagürü. ⁸ Natürü ga Pedru rü ñanagürü: —Choma rü tãütáma chanaxwèxe na choxũ cuyauxcutüxũ —ñanagürü. Rü Ngechuchu nanangãxũ rü ñanagürü nüxũ: —Ngèxguma tama cuxũ chayauxcutügu,

rü tãütáma choxrü quixĩ —ñanagürü. ⁹ Rü yexguma ga Chimáũ ga Pedru rü ñanagürü nüxũ: —Pa Corix, ¡Tama choxũ cuyauxcutüxicatama! Natürü chanaxwèxe i choxũ cuyauxméx rü choxũ cuyauxeru ta —ñanagürü. ¹⁰ Natürü Ngechuchu nanangãxũ rü ñanagürü nüxũ: —Texé ya ngexwacèx aiyaxe rü tanaxwèxe i tümacutüxicatama tayaxu, erü guxũwama tangemata. Rü pema rü marü pingematagü, natürü tama guxãma aixcüma tingemata —ñanagürü. ¹¹ Rü Ngechuchu nüxũ nacuèx na texé tá bexma cúãcü ínaxuaxũxũ, rü yemacèx ñanagürü nüxũ: —Natürü tama guxãma aixcüma tingemata —ñaxũ. ¹² Rü yexguma toxũ yayauxgücutüguwena, rü Ngechuchu wena nicuxcuchi ga norü gáuxũchiru. Rü wenaxãrü mechawa narüto. Rü ñanagürü toxũ: —¿Nüxũ pecuáxũ yĩxũ i ngẽma chaxüxũ? ¹³ —Pema rü: “Pa Ngúexẽeruũ” rü “Pa Corix”, ñaperügü choxũ. Rü marü name i ngẽma ñaperügü, erü aixcümaxũchi ngẽma chixĩ. ¹⁴ —Rü ñuxma i choma na ngúexẽeruũ chixĩxũ rü pemaã na ichacuáxũ, rü pexũ chiyauxgücutü. Rü ngexgumarüxũ ta i pema rü name i wüxichigü i pemücüxũ piyauxgücutü. ¹⁵ —Choma rü pexũ nüxũ chadauxẽẽ na ñuxãcü tá penaxüxũ na pema rü ngema pemaã chaxüxũãcü penaxüxücèx. ¹⁶ —Rü aixcüma pemaã nüxũ chixu rü taxuũma i wüxi i coriarü duũxũ rü norü coriétüwa nügü nangexmaxẽẽ. Rü taxuxũma i ãẽxgacüarü orearü ngeruxũ i norü ãẽxgacü i namuxũétüwa nügü nangexmaxẽẽ. ¹⁷ —Rü ngẽxguma nüxũ pecuèxgu i chorü ore rü penaxüxgu i ngẽma pemaã nüxũ chixuxũ, rü aixcüma tá petaãẽgü. ¹⁸ —Rü tama guxãma i pechiga nixĩ i chidexaxũ. Erü choma rü tüxũ chacuèx rü texégü tixĩ ya yíxema tüxũ chidexechíxe.

Natürü Tupana nayanguxẽẽchaũ i norü ore i ümatüxũ i ñaxũ:

“Texé ya chomaã chibüxe rü chomaã tarüxuwani”, ñaxũ. Rü ngẽmaãcü tá nangupetü na yanguxücèx i ngema Tupanaarü ore. ¹⁹ —Natürü naxüpa na nangupetüxũ i ngẽma, rü pemaã nüxũ chixu na choxũ peyaxögüxücèx i ngëxguma nangupetüxgu. ²⁰ —Aixcüma pemaã nüxũ chixu rü texé ya tüxũ yaxúxe ya yíxema choma ngema tüxũ chamuxẽ, rü choxũ nixĩ i tayaxuxũ. Rü texé ya choxũ yaxúxe, rü Chaunatü ga núma choxũ mucüxũ nixĩ i tayaxuxũ —ñanagürü ga Ngechuchu.

Ngechuchu nüxũ nixu ga Yuda rü tá bexma cúácü na ínaxuaxũãxũ

(Mt 26.20-25; Mr 14.17-21; Lc 22.21-23)

²¹ Rü yexguma yema ñaxguwena ga Ngechuchu rü poraãcü ngechaũ nüxũ nangux, rü meãma tomaã nanan-goxẽẽ, rü ñanagürü toxũ: —Aixcüma pemaã nüxũ chixu rü wüxie i petanüwa tá nixĩ i bexma cúácü choxũ ítax-uaxũxũ —ñanagürü. ²² Rü yexguma ga toma ga norü ngüexügü rü wüxichigü togü tadawenü, rü tama nüxũ tacuèxgü ga texéchiga na yema ñaxũ. ²³ Rü choma ga norü ngüexũ ga poraãcü choxũ nangechaũxẽ rü nacüwawa charüto ga Ngechuchu ga mechawa. ²⁴ Rü Chimáũ ga Pedru rü bexma choxũ naxuneta ga na Ngechuchuna chaçaxücèx ga texéchiga na yíxũ ga yema. ²⁵ Rü yexguma ga choma rü yexeraãcü Ngechuchuna chimaxcuchi rü nüxna chaca, rü ñacharügü: —Pa Corix, ¿texé tá tixĩ ya yíxema? —ñacharügü. ²⁶ Rü Ngechuchu choxũ nangãxũ, rü ñanagürü: —Wüxi i pãũärü bücuxũ tá íchacúe, rü yíxema tüxna chanaxãxẽ, rü yíxema tixĩ —ñanagürü. Rü

yexguma ínanacúe ga wüxi ga pãũãrũ bücuxũ rü Yuda ga Icaríute ga Chimáú nanena nanaxã. ²⁷ Rü yexgumatama Yuda nayauxgu ga yema pãũãrũ bücuxũ rü ngoxo ga Chataná rü Yudagu naxücu. Rü yexguma ga Ngechuchu rü ñanagürü nüxũ: —Rü ngẽma cuxüxchaũxũ, jrü paxa naxü! —ñanagürü. ²⁸ Natürü taxúema ga toma ga mechawa chibüexe nüxũ tacuèxgü ga tacüchiga na yĩxũ ga yema ñaxũ ga Ngechuchu. ²⁹ Rü nüma ga Yuda rü dïeruchiũãrũ dauruũ nixĩ. Rü yemacèx ñuxre ga toma nüxũ tacuèxgügu rü Ngechuchu taxewa nanamu, na tacücèx yataxexüçèx naxcèx ga peta, rü éxna duũxügu ga ngearü dïeruáxüna ngĩxũ na naxãxüçèx ga dïeru. ³⁰ Rü yexguma Yuda nayauxgu ga yema pãũ, rü ínaxüxü ga yema ucapuwa. Rü marü nachüta ga yexgumax.

Ngechuchu norü ngúexüğümaã nüxũ nixu ga yexwacaxüxü ga norü mu

³¹ Rü yexguma Yuda íxüxguwena, rü Ngechuchu rü ñanagürü: —Rü ñuxma rü tá aixcüma nangox na ñuxäcü naporaxũ ya Tupana Nane ya duũxüxü ixïcü. Rü yimawa tá nixĩ i nangoxëãxũ ya Tupana i norü pora. ³² —Rü ngëxguma yima Tupana Nane nangoxëãxgu i Tupanaãrũ pora, rü ngëxgumarüũ tá ta ya Tupana rü nanangoxëã i Naneãrũ pora. Rü paxa tá nixĩ i ngẽma. ³³ —Pa Chauxcüãxgüx, täütáma muxũ i ngunexũ petanüwa changëxma. Rü pema rü tá chauxcèx pedaugü, natürü ngẽma choma íchaxüxüwa rü taxucürüwama ngema pexĩ. Rü ñaãtama ore nixĩ ga marü Yudügüãrũ äëxgacügümaã nüxũ chixuxũ, rü ñuxma rü pemaã rü ta nüxũ chixuxũ. ³⁴ —Rü pemaã nüxũ chixu i wüxi i ngexwacaxüxü i mu. Rü ngẽma pexũ chamuxũ nixĩ i pemücügüxü na pengechaũxü i wüxichigü. Rü ngẽma na choma pexũ

changechaũxũrũũ, rü chanaxwèxe i wüxichigü i pema rü pemücügüxũ pengechaũgü. ³⁵ —Rü ngëxguma wüxichigü pemücügüxũ pengechaũgu, rü guxũma i duũxũgü tá nüxũ nicuèxächitanü na chorü ngúexũgü pixĩgüxũ —ñanagürü.

Ngechuchu nüxũ nixu rü Pedru rü tãxũtãma nügü nixu na norü ngúexũ yixĩxũ

(Mt 26.31-35; Mr 14.27-31; Lc 22.31-34)

³⁶ Rũ Chimáũ ga Pedru rü Ngechuchuna naca, rü ñanagürü: —Pa Corix ¿ngextá tá cuxũ? —ñanagürü. Rũ Ngechuchu nanangãxũ, rü ñanagürü: —Ngema íchaxũxũwa rü taxucürüwa chowe curüxũ i ñuxmax. Natürü yixcama rü ngëmáãcü tá chowe curüxũ —ñanagürü. ³⁷ Rũ yexguma ga Pedru rü ñanagürü: —Pa Corix, ¿tũxcũũ taxucürüwa cuwe charüxũ i ñuxmax? Erü marü íchamemare na cuxcèx na chayuxũ —ñanagürü. ³⁸ Rũ Ngechuchu nanangãxũ, rü ñanagürü: —¿Aixcũma yĩxũ i marü ícumemarexũ na chauxcèx cuyuxũ? Aixcũma cumaã nüxũ chixu rü tãũtãtama yacaxgu ya otá, rü tomaẽpũxcũna tá nüxũ quixu na tama choxũ cucuáxũ —ñanagürü ga Ngechuchu.

14

Ngechuchu rü nama i Nanatũxũtawa nadaxũ nixĩ

¹ —¡Tãxũ i penaxĩxãchiãẽgüxũ i pemax! ¡Tupanaãxũ peyaxõgü rü choxũ rü ta peyaxõgü! ² —Chaunatũxũtawa nangëxma i muxũchixũma i nachicagü. Ngëxguma chi natauxguma, rü tãũ chima pemaã nüxũ chixu na pexcèx chayamexẽxũcèx i pechicagü. ³ —Rü ngëxguma marü ngema chaxũxgu rü wüxi i pechica chamexẽxgu, rü wena táxarü núma chaxũ. Rũ pexũ tá chayagü na

ngẽma nachica i chomatátama nawa changẽxmaxũwa na pengẽxmagũxũcèx i pemax. ⁴—Rü pema rü nüxũ pecuèx na ngextá tá na chaxũxũ, rü marü nüxũ pecuèx i nama i ngẽma nadaxũ —ñanagürü ga Ngechuchu. ⁵ Rü Tumachi rü ñanagürü: —Pa Corix, tama nüxũ tacuèx na ngextá na cuxũxũ. ¿Rü ñuxãcü tá i nüxũ tacuáxũ i ngẽma nama? —ñanagürü. ⁶ Rü Ngechuchu nanangãxũ, rü ñanagürü: —Choma nixĩ i ngẽma nama i Chaunatũxũtawa nadaxũ chiixũ. Rü aixcüma nixĩ i ngẽma ore i nüxũ chixuxũ. Rü choma nixĩ i duũxũgũxũ chamaxẽxẽxũ. Rü chaugaguxicatama nixĩ i Chaunatũxũtawa nangugũxũ i duũxũgũ. ⁷ —Rü ngẽxguma chi pema rü aixcüma meã choxũ pecuèxgũgu, rü Chaunatũxũ rü chi ta pecuèxgũ. Rü ñuxmaũcüü nixĩ i Chaunatũxũ pecuáxũ, erü marü nüxũ pedaugüecha —ñanagürü. ⁸ Rü yexguma ga Piripi rü ñanagürü: —Pa Corix, ¿Toxũ nüxũ nadauxẽẽ ya Cunatü! Rü ngẽxĩcatama i tanaxwèxegũxũ —ñanagürü. ⁹ Rü Ngechuchu nanangãxũ, rü ñanagürü: —Pa Piripix, ¿ñuxre ya taunecü marü petanüwa changẽxma rü ñuxma rü ta tama choxũ cucuèxégaxũ? Yíxema choxũ dauxe rü Chaunatũxũ rü ta tadau. ¿Rü tüxcüü i ngẽxguma rü ta cunaxwèxexũ i pexũ nüxũ na chadauxẽẽxũ ya Chaunatü? ¹⁰ —¿Tama éxna cuyaxõ na choma rü Chaunatümaã rü wüxitama tixĩgũxũ? Rü guxũma i ore i pemaã nüxũ chixuxũ rü tama chauechama nüxũ chixu. Erü yima Chaunatü ya wüxiwa chomaã ngẽxmacü, rü yima nixĩ ya naxücü i guxũma i noxrütama puracü. ¹¹ —Chanaxwèxe i choxũ peyaxõgü na choma rü Chaunatümaã wüxitama tixĩgũxũ. Natürü woo tama ngẽma pixõgügu rü chanaxwèxe na choxũ peyaxõgũxũ naxcèx i ngẽma mexũgü i taxũ i

Tupanaãrũ poramaã chaxũxũ. ¹² —Aixcũma pemaã nũxũ chixu rũ yĩxema choxũ yaxóxẽ rũ tá tanaxũ i guxũma i choma chaxũxũ. Rũ ngẽma chaxũxũãrũ yexera tá taxũ, erũ choma rũ tá Chaunatũxũtawa chaxũ. ¹³ —Rũ guxũma i tacũ i chauégagu Tupanaxũtawa naxcèx ípecaxũ rũ tá pexna chanaxã. Rũ ngẽmaãcũ tá chanaxũ na chaugagu nangóxũcèx i Chaunatũarũ pora. ¹⁴ —Rũ choma tá chanaxũ i guxũma i tacũ i chauégagu choxna naxcèx pecaxũ.

Ngechuchu rũ norũ ngúexũgũmaã inaxuneta na naxcèx tá núma namuãxũ i Naãẽ i Üünexũ

¹⁵ —Rũ ngẽxguma aixcũma choxũ pengechaũgu, rũ naga tá pexĩnüẽ i chorũ mugũ. ¹⁶ —Rũ choma tá Chaunatũna naxcèx chaca na núma peccèx namuãxũcèx i to i perũ ngũxẽẽruũ i Naãẽ i Üünexũ, na guxũgutãma petanũwa nangẽxmaxũcèx. Rũ núma tá nixĩ i peccèx nangoxẽẽãxũ i ore i aixcũma ixĩxũ. ¹⁷ —Rũ ñoma i naãnecũãx i duũxũgũ rũ taxucürũwama nanayauxgũ, erũ tama nũxũ nadaugũ rũ tama nũxũ nacuèxgũ. Natürũ i pema rũ marũ nũxũ pecuèx, erũ núma rũ petanũwa nangẽxma. Rũ guxũgutãma pemaã inarũxãũx. ¹⁸ —Rũ tãütãma núma pexũ chawogũmare i chomax, erũ wena táxarũ peccèx chataegu, na petanũwa changẽxmaxũcèx. ¹⁹ —Rũ paxa tá nixĩ na tãütãma choxũ nadaugũxũ i ñoma i naãnecũãx i duũxũgũ. Natürũ i pema rũ tá choxũ pedaugũ. Rũ tá pemaxẽ, erũ choma rũ chamaxũ. ²⁰ —Rũ ngẽxguma yuwa ícharũdaxgu rũ wena chamaũxgu, rũ ngẽxguma tá nũxũ picuèxãchitanũ na choma rũ Chaunatũwa chamaxũxũ rũ pema i chowa rũ choma i pewa. ²¹ —Yĩxema texé ya nũxũ cuáxe rũ naga ñnũxẽ i chorũ mugũ, rũ tanangoxẽẽ

na aixcūma choxũ tangechaũxũ. Rũ Chaunatu tá tũxũ nangechaũ ya yíxema choxũ ngechaũxẽ, rũ choma rũ tá ta tũxũ changechaũ. Rũ tũxũ tá chaugũ chawéx —ñanagürü ga Ngechuchu. ²² Rũ nayexma ga to ga Ngechucharü ngúexũ ga Yudagu aëgaxũ ta. Rũ yema rũ ñanagürü: —Pa Corix, ¿tũxcũũ toxũ cugũ cuwéx, rũ tama ñoma i naãnecũãx i duũxũgũxũ cugũ cuwéx? —ñanagürü. ²³ Rũ Ngechuchu nanangãxũ, rũ ñanagürü: —Yíxema choxũ ngechaũxẽ rũ naga taxĩnü i ngẽma ore i tũmamaã nüxũ chixuxũ. Rũ Chaunatu tá tũxũ nangechaũ. Rũ choma rũ Chaunatũmaã wũxigu tũmaxũtawa tá tangẽxmagũ. ²⁴ —Yíxema tama choxũ ngechaũxẽ rũ tama naga taxĩnü i ngẽma chorü ore. Rũ ngẽma ore i chauxũtawa nüxũ pexĩnüexũ rũ tama chorü ore nixĩ, natürü guma Chaunatu ga núma choxũ mucüarü ore nixĩ. ²⁵ —Ñoma rũ ta petanüwa changẽxma rũ pemaã nüxũ chixu i guxũma i ngẽma ore i pexcèx choxũ ngẽxmaxũ. ²⁶ —Natürü Chaunatu rũ tá chauégagu núma nanamu i Naãẽ i Üünexũ na pexũ nangũxẽxũcèx. Rũ nüma i Naãẽ i Üünexũ tá pexũ nangúexẽẽ i guxũma, rũ tá nüxna pexũ nacuèxãchixẽẽ i guxũma i ore ga pemaã nüxũ chixuxũ. ²⁷ —Rũ ñuxma na pexna íchixũxũ, rũ pexna chanaxã i taãẽ. Natürü ngẽma taãẽ i pexna chaxãxũ, rũ tama ñoma i naãnecũãx pexna ãxũ i taãẽrũũ nixĩ. Rũ tama chanaxwèxe i penaxixãchiãëgũ rũ pemuũẽ. ²⁸ —Marü pemaã nüxũ chixu na pexna tá íchixũxũ rũ wena táxarü pexcèx chataeguxũ na pemaã changẽxmaxũcèx. Rũ choxũ pexĩnüẽ ga yexguma yema ñachaxgu. Rũ ngẽxguma aixcūma choxũ pengechaũgu rũ tá petaãëgũ ega nüxũ pecuèxgu na Chaunatücèx chataeguxũ, erü

Chaunatü rü chorü yexera nixĩ. ²⁹ —Rü naxũpa na nangupetüxũ i ngẽma, rü pemaã nüxũ chixu na choxũ peyaxõgüxücèx i ngẽxguma nangupetügu. ³⁰ —Marü täütáma poraãcü pemaã chidexa, erü marü ínangu i Chataná i ñoma i naãneãrũ ãẽxgacü ixĩxũ. Natürü nüma rü taxuwama choxũ narüyexera. ³¹ —Natürü ngẽma tá choxũ ngupetüxũ, rü ngẽmaãcü tá nixĩ na guxũma i ñoma i naãnecũãx i duũxügü nüxũ nacuáxücèx na choma rü Chaunatüxũ na changechaũxũ, rü chanaxüxũ i ngẽma nüma choxũ namuxũ. ¡Rü ipechigü, rü ngĩxã ítixĩ! —ñanagürü ga Ngechuchu.

15

Ubanegu nügü nangu ga Ngechuchu

¹ Rü ñanagürü ga Ngechuchu: —Choma nixĩ i ñoma wüxi i ubanerüũ chíxũ rü Chaunatü nixĩ ya norü yora ixĩcü i ngẽma uba. ² —Rü chorü duũxügü rü ngẽma ubachacüügürüũ nixĩgü. Rü ngẽma ubachacüü i tama oxũ, rü norü yora rü nayadae. Natürü ngẽma nachacüü i oxũ, rü meã nanamexêetanü na yexeraãcü poraãcü naxoxücèx. ³ —Pema rü marü pime, yerü naga pexĩnüë ga yema ore ga pexũ changúexêxũ. ⁴ —Rü name nixĩ i guxüguma chowa peyaxüxgü, ngẽma na choma rü pewa chayaxúxürüũ. Erü wüxi i ubachacüü rü tama nüxĩca naxo, ega tama nanewa yaxüxgux. Rü ngẽxgumarüũ ta i pema rü taxuacüma chauxcèx pemaxê, ega tama chowa peyaxüxgüechagu. ⁵ —Choma nixĩ i ubane, rü pema i nachacüügü. Rü yíxema chowa yaxúechaxe rü choma i tümawa, rü aixcüma tá chauxcèx tamaxũ. Rü ngẽmaãcü wüxi i ubachacüü i oxürüũ tá tixĩ. Natürü ngẽxguma tama chowa peyaxüxgüechagu,

rü taxucürüwama tacü pexüe. ⁶ —Rü texé ya tama chowa yaxúêchaxe rü tá ítatèxüchi. Rü wüxi i ubachacüü i daexü rü ipaxü rü iguxürüü tá tixĩ, rü ngëxma tá tayarüxo. ⁷ —Rü ngëxguma chowa peyaxüxgüechagu rü taguma nüxü ipeyarüngümaëgu i ngëma ore i pexü changúexêëxü, rü marü name i naxcèx ípeca i tacü i penaxwèxexü, rü choma rü tá pexna chanaxã. ⁸ —Rü ngëxguma aixcüma meã chauxcèx pemaxëgu, rü Chaunatüxü tá nicuèxüüügü i duüxüügü. Rü ngëmaäcü aixcüma chorü ngúexügü tá pixĩgü. ⁹ —Choma rü pexü changechaü ngëma na Chaunatü choxü ngechaüxürüü. Rü chanaxwèxe i aixcüma meã chauga pexĩnüêëcha, erü choma rü guxüguma pexü changechaü. ¹⁰ —Choma rü naga chaxĩnü i Chaunatüarü mugü rü nüma rü guxüguma choxü nangechaü. Rü ngëxgumarüü tá ta nixĩ ega naga pexĩnüëgu i chorü mugü, rü guxügutáma pexü changechaüêëcha. ¹¹ —Choma rü ngëmaäcü pemaã nüxü chixu na wüxigu chomaã petaãëgüxücèx. Rü ngëmaäcü tá aixcüma petaãëgü. ¹² —Rü choma pexü chamu na pemücügüxü pengechaüügüxücèx, ngëma choma na pexü changechaüxürüü. ¹³ —Rü ngëxguma wüxie aixcüma tümamücüxü ngechaügu, rü nüxü tangechaüãma rü nüetama ega woo tümamücücèx tayuxgu. Rü nataxuma i to i ngechaü i ngëmaärü yexera. ¹⁴ —Pema rü chomücügü pixĩgü i ngëxguma chauga pexĩnüëgu. ¹⁵ —Choma rü marü tama chorü duüxügümareäcü pexü chaxu. Erü wüxi i coriarü duüxümare rü tama nüxü nacuèx i ngëma norü cori üxü. Natürü ñuxma rü chomücügümaã pexü chaxu, erü pexü nüxü chacuèxêë i guxüma i ore ga Chaunatü chomaã nüxü ixuxü. ¹⁶ —Pema rü tama pexira chauxcèx pedaugü, natürü chaxira nixĩ ga pexcèx chadauxü

rü pexũ chamuxũ na aixcüma chauxcèx pemaxèxũcèx
 rü chauxũtawa penagagũxũcèx i muxũma i duũxũgü na
 guxũguma choxũ yaxõgũãxũcèx. Rü Chaunatü ya Tupana
 tá pexna nanaxã i guxũma i tacü i chauégagu nüxna
 naxcèx pecaxũ. ¹⁷—Rü ngẽma nixĩ i pexũ chamuxũ na
 pemücügüxũ pengechaũgüxũcèx.

*Ñoma i naãnecũãx i duũxũgü rü Ngechuchuchi rü norü
 ngúexũgüchi naxaie*

¹⁸—Ngẽxguma ñoma i naãnecũãx i duũxũgü pexchi
 aiegu, rü ;nüxna pecuèxãchie ga chaxira chauxchi na
 naxaie! ¹⁹—Rü ngẽxguma chi ñoma i naãnecũãx i
 duũxũgürüü pixĩgügu, rü ñoma i naãnecũãx i duũxũgü
 rü chi pexũ nangechaũgü ngẽma natanũxũgüxũ na
 nangechaũgüxürüü. Natürü choma nixĩ ga pexcèx
 chadauxũ natanüwa ga ñoma ga naãnecũãx ga duũxũgü.
 Rü ngẽmacèx nixĩ i pexchi naxaie, erü marü tama
 naxrüü pixĩgü. ²⁰—;Nüxna pecuèxãchie ga pemaã ñach-
 agu:

“Taxuxũma i wüxi i coriarü duũxũ rü norü coriétüwa
 nügü nangexmaxẽ”, ñachagu! Rü yema na chauxchi
 na naxaie, rü pexchi rü tá ta naxaie. Rü yexguma
 chi chauga naxĩnüëgu rü ñuxma rü chi ta pega naxĩnüë.
²¹—Rü ngẽmaãcü ta chaugagu pexchi naxaie i ñoma
 i naãnecũãx i duũxũgü erü tama nüxũ nacuèxgü ya
 Chaunatü ga núma choxũ mucü. ²²—Rü ngẽxguma chi
 choma tama namaã chanangoxẽëgu na ñuxãcü chixri
 na namaxèxũ, rü tãü chima nüxũ nacuèxgü ga pecadu
 na naxügüxũ. Natürü ñuxma namaã nüxũ na chixuxũ
 na ñuxãcü chixri namaxèxũ, rü ngẽmacèx i ñuxma rü
 taxuacüma nüxũ nixugü na yangearü pecaduãxũ. ²³—Rü

guxũma i duũxũgũ i chauxchi aiexũ rü Chaunatũchi rü ta naxaie. ²⁴ —Rü ngẽma duũxũgũpẽxewa rü Tupanaãrũ poramaã chanaxũ i mexũgũ i taxũ i taguma texé ya togue ùxũ. Rü ngẽxguma chi tama napẽxewa chanaxũxgu i ngẽma mexũgũ rü tãũ chima Tupana namaã nanaxuegu na nagagutama yapedaduãxgũxũ. Natürũ na woo marũ nüxũ nadaugũxũ i ngẽma mexũgũ i taxũ i Tupanaãrũ poramaã chaxũxũ, rü ngẽxguma rü ta chauxchi naxaieama rü Chaunatũchi rü ta naxaie. ²⁵ —Natürũ ngẽmaãcü nangupetũ erũ Tupana nayanguxẽẽchaũ i norũ ore i ùmatũxũ i ñaxũ:

“Chauxchi naxaie woo taxuũma i chixexũ chaxũxgu”, ñaxũ. ²⁶ —Natürũ choma rü tá Chaunatuégagu pexcèx núma chanamu i perũ ngũxẽẽruũ i Tupanaãe i Üünexũ i tá pexũ nüxũ cuèxẽẽxũ i ore i aixcüma ixĩxũ. Rü nüma tá nixĩ i meãma pemaã nüxũ yaxuxũ i chauchiga. ²⁷ —Rü pema rü tá ta chauchigaxũ pixugüe, yerũ noxri ichanaxũgũga ga duũxũgũmaã nüxũ na chixuxũ ga chorũ ore, rü woetama marũ chauxũtawa peyexmagũ —ñanagürũ ga Ngechuchu.

16

¹ Rü Ngechuchu rü ñanagürũ nüxũ: —Rü pemaã nüxũ chixu i ñaã ore na tama nüxũ na perũxoexũcèx na choxũ peyaxõgũxũ. ² —Rü ngutaquẽxepataũgũwa tá pexũ ína-woxũ. Rü aixcüma tá nawa nangu na texé pexũ dèixũ rü tá nagu tarũxĩnũxũ na ngẽmaãcü mexũ Tupanacèx taxũxũ. ³ —Rü ngẽmaãcü tá pemaã namaxẽ i duũxũgũ, erũ taguma nüxũ nacuèxgũ ya Chaunatũ, rü choxũ rü ta tama nacuèxgũ. ⁴ —Rü pemaã nüxũ chixu i ñaã ore i ñuxmax, na

nüxna pecuèxãchiexũcèx i ngëxguma yixcüra ngëmaãcü pexũ nangupetügu.

Tupanaãë i Üünexũãrũ puracüchiga

—Noxri rü tama pemaã nüxũ chixu i ñãã ore, yerü petanügu charüxãũx. ⁵ —Natürü i ñuxma rü tá pexna íchixũ na Chaunatü ga núma choxũ mucüxütawa na changëxmaxüçèx. Rü pema rü taxúema choxna peca na ngextá tá na chaxũxũ. ⁶ —Natürü poraãcü pengechaũgüama erü pemaã nüxũ chixu i ngëma ore. ⁷ —Natürü aixcüma pemaã nüxũ chixu rü pexcèx narümemaë nixĩ na Chaunatücèx chataeguxũ. Rü ngëxguma chi tama Chaunatüxütawa chaxüxgu rü tãũ chima núma naxü i Naãë i Üünexũ i pexũ rüngüxëëxũ. Natürü ngëxguma ngëma chaxüxgu rü choma tá núma chanamu i Naãë i Üünexũ. ⁸ —Rü ngëxguma Naãë i Üünexũ núma üxgu rü tá guxũ i duũxũgüxũ nüxũ nacuèxëë na yapecaduãxgüxũ. Rü tá nanangoxëë i ñuxãcü na yĩxũ i ngëma maxũ i Tupanapëxewa aixcüma mexũ. Rü tá duũxũgüxũ nüxũ nacuèxëë na Tupana tá napoxcuexũ i duũxũgü naxcèx i norü pecadugü. ⁹ —Rü nüma i Naãë i Üünexũ tá duũxũgüxũ nüxũ nacuèxëë na pecaduãxgüxũ yĩxũ erü tama choxũ^ú nayaxögü. ¹⁰ —Rü tá nanangüexëë i ñuxãcü na yĩxũ i ngëma maxũ i Tupanapëxewa aixcüma mexũ, erü choma rü tá Chaunatüxütawa chaxü, rü pema rü tãütáma marü choxũ pedaugü. ¹¹ —Rü Naãë i Üünexũ tá duũxũgüxũ nüxũ nacuèxëë na Tupana tá napoxcuexũ i duũxũgü i chixexũ ügüxũ, erü Tupana rü namaã nanaxuegu na marü napoxcuãxũ i Chataná i ñoma i naãnemaã icuáxũ. ¹² —Choma rü choxũ^ú nangëxma i muxũma i to i ore i pemaã nüxũ chixuxchaũchiréxũ.

Natürü ega ñuxma chi pemaã nüxũ chixuxgu rü tãũ chima nüxũ pecuèxgü. ¹³ —Rü Tupanaãe i Üünexũ rü nüxũ nixu i ore i aixcüma ixĩxũĩcatama. Rü ngëxguma núma naxũxgu rü núma tá pexũ nangúexëe i guxũma i ore i aixcüma ixĩxũ. Erü núma rü tama nüëchama tá nidexa, natürü ngëma ore i Chaunatüxũtawa rü chauxũtawa nüxũ naxĩnüxũxũxũca tátama nixu. Rü tá pexũ nüxũ nacuèxëe i guxũma i tacü i yixcüra tá ngupetüxũ. ¹⁴ —Rü núma rü tá choxũ nataxëe, erü chauxũtawa tá nanayaxu i norü nguxëëtae, rü ñuxũchi tá pexũ nangúexëe namaã i ngëma nguxëëtae. ¹⁵ —Guxũma i Chaunatüaxũ ngëxmaxũ rü choxrü ta nixĩ. Ngëmacèx pemaã nüxũ chixu rü Naãe i Üünexũ rü chauxũtawa tá nanayaxu i norü nguxëëtae, rü ñuxũchi pexũ tá namaã nangúexëe. ¹⁶ —Rü paxa tãütama choxũ pedau. Natürü ngëmawena rü wena táxarü choxũ pedau erü Chaunatüxũtawa tá chaxũ —ñanagürü ga Ngechuchu.

Ngema guxchaxũgü rü yixcüama rü tá taãëxũ nananguxuchi

¹⁷ Rü yexguma ñuxre ga toma ga Ngechuchuarü ngúexũgü rü togüna tacagü, rü ñatarügügü: —¿Tacüchiga nixĩ na ngëma ñaxũ:

“Rü paxa tãütama choxũ pedaugü. Natürü ngëmawena rü wena táxarü choxũ pedaugü”, ñaxũ? ¿Rü tacüchiga ta nixĩ na ñaxũ:

“Choma rü Chaunatüxũtawa tá chaxũ”, ñaxũ? ¹⁸ —¿Rü tacüchiga ta nixĩ na ñaxũ:

“Rü paxa tãütama choxũ pedaugü”, ñaxũ? Rü yixema rü tama nüxũ tacuèxgüega na tacüchigaxũ tamaã yaxuxũ —ñatarügügü. ¹⁹ Rü Ngechuchu rü nüxũ nacuèxama

ga nüxna na tacagüchaüxü ga tomax. Rü yemacèx ñanagürü toxü: —Choma rü marü pemaã nüxü chixu rü paxa täütáma choxü pedau, natürü ngēmawena rü wena táxarü choxü pedau. ¿Rü ngēma dexacèxtama i pegüna pecagüxü? ²⁰ —Rü aixcüma pemaã nüxü chixu rü pema rü tá pexauxe, rü tá pengechaügü. Natürü ñoma i nañecüãx i duüxügü rü tá nataãégü. Natürü woo pema tá pengechaügü, rü ngēma perü ngechaü rü tá taãxü nananguxuchi. ²¹ —Ngëxguma wüxi i nge íraxacüchaügu rü inaxixächiaë, erü inguxneca. Natürü ngëxguma marü tabuxgu ya ngürü õxchana, rü nüxü iyarüngüma na ñuxäcü poraäcü ngixü na nanguxchiréxü i noxrix, erü tümamaã itaãe ya ngürü õxchana. ²² —Rü ngëxgumarüü tá ta pexü nangupetü i pemax, erü ñuxma rü penaxixächiaëgü. Natürü wena táxarü chataegu rü pexü íchayadau. Rü ngëxguma rü tá pexü nangëxma i wüxi i taãe i taxucürüwama texé pexna yaxuxü. ²³ —Rü ngëxguma ínanguxgu tá i ngēma ngunexü na yanguxü i ñaã pemaã nüxü chixuxü, rü taxucèxtáma tacücèx choxna pecagü erü aixcüma Chaunatü tá nixí ya pexna naxäcü i guxüma i tacü i chauégagu nüxna naxcèx pecaxü. ²⁴ —Ñuxmarüta i pema rü taxuücèxma chauégagu ípecagü. ¡Naxcèx ípeca rü tá penayaxu i ngēma naxcèx ípecaxü! Rü ngēmaäcü rü tá aixcüma petaãégü.

Ngechuchu rü marü nüxü narüyexera i guxüma i tacü i ñoma i nañewa ngëxmaxü

²⁵ —Ñuxma rü cuèxruügügu chayaxuäcüma pemaã nüxü chixu i ore. Natürü nawa tá nangu i ngunexü i marü täütáma ngēmaäcü pemaã nüxü chixu. Rü ngëxguma rü tá noxtacüma meã pemaã chanangoxëë i Chaunatüchiga.

26-27 —Rü ngẽma ngunexũgu i pema rü Chaunatũxũtawata tá chauégagu naxcèx ípeca i tacü i penaxwèxexũ. Rü taxucèxma tũxcüũ choma tá Chaunatũxũtawata pexũ naxcèx íchaca, erü nümatama ya Chaunatü rü woetama pexũ nangechaũ, erü pema rü choxũ pengechaũ rü peyaxõgü na naxũtawata ne chaxũxũ. ²⁸—Chaunatũxũtawata ne chaxũ na ñoma ga naãnewa chaxũxũcèx. Rü ñuxma rü tá nüxna chataegu i ñoma i naãne na wenaxãrũ Chaunatũxũtawata chaxũxũcèx —ñanagürü. ²⁹ Rü yexguma ga toma ga norü ngúexũgü rü ñatarügügü: —Ñuxma waxi nixĩ i meãxũchima tomaã cunangõxèxũ i curü ore i tomaã nüxũ quixuxũ. Rü tama tacügu ixuxũácüma tomaã nüxũ quixu. ³⁰ —Rü ñuxma rü nüxũ tacuèx na aixcüma guxũxũma na cucuáxũ. Rü taxuacüma texé ñuxũ ñatagürü cuxũ. Rü ngẽmacèx nixĩ i tayaxõgüxũ na aixcüma Tupanaxũtawata na ne cuxũxũ —ñatarügügü. ³¹ Rü Ngechuchu toxũ nangãxũ rü ñanagürü: —¿Aixcüma peyaxõgüxũ i ñuxmax? ³² —Rü nawa tá nangu i ngunexũ rü ñuxmatátama nixĩ i na pegü pewoonexũ. Rü wüxichigü i pema rü tá pepatawa pexĩ, rü chaxica tá nuã choxũ petèx. Natürü tama chaxica tá icharũxãũx, erü Chaunatü rü chauxũtawata nangẽxma. ³³ —Rü guxũma i ñaã ore rü pemaã nüxũ chixu na chaugagu petaãẽgüxũcèx. Rü ñoma i naãnewa rü tá ngúxũ pingé. Natürü ¡peporae! erü choma rü marü nüxũ charüyexera i guxũma i tacü i ñoma i naãnewa ngẽxmaxũ —ñanagürü.

17

Ngechuchu rü norü ngúexũgücèx nayumüxẽ

¹ Rü yema ñaxguwena rü Ngechuchu daxügu nadawenü, rü ñanagürü: —Pa Chaunatüx, marü nawa

nangu i ngunexũ na chayuxũ. Rũ chanaxwèxe na duũxũgũxũ nüxũ cucuèxèxũ na aixcũma choma rũ cune chiĩxũ. Rũ ngẽmaãcü i choma rũ tá nüxũ nüxũ chacuèxèẽ na cuma rũ aixcũma Tupana na quiĩxũ. ²—Erũ marũ guxũ i duũxũgũarũ ãẽxgacũxũ choxũ quixĩxèẽ, na chanamaxèxèxũcèx i guxũma i duũxũgũ i choxna cumugũxũ. ³—Rũ ngẽma duũxũgũ tá nüxũ nangẽxma i maxũ i taguma gũxũ ega cuxũ nacuèxgũgu na cuxicatama Tupana na quiĩxũ, rũ choxũ nacuèxgũgu na choma rũ Cristu ga núma choxũ cumucũ na chiĩxũ. ⁴—Choma rũ marũ cuxũ chataxèẽ i ñoma i naãnewa rũ chayanguxèẽ i guxũma i puracũ ga nawa choxũ cumuxũ. ⁵—Rũ ñuxma Pa Chaunatũx, rũ chanaxwèxe i cugũxũtawa choxũ cungẽxmaxèẽ na choxũ nangẽxmaxũcèx ga yematama pora ga cumaã choxũ yexmaxũ ga noxri tauta naãne ùxgu. ⁶—Rũ guxema duũxègũ ya tũxũ quidexeche xe ga ñoma ga naãnewa na choxna tũxũ cumugũxũcèx, rũ marũ tũxũ nüxũ chacuèxèẽ i texé na quiĩxũ i cumax. Rũ woetama cuxrũgũ tixĩgũ rũ cuma nixĩ ga choxna tũxũ cumugũxũ. Rũ tũmagũ rũ marũ naga taxĩnũẽ i curũ ore. ⁷—Rũ ñuxma rũ marũ nüxũ tacuèx rũ guxũma i ngẽma choxna cuxãxũ, rũ aixcũma cuxũtawa ne naxũ. ⁸—Rũ choma rũ marũ tũmamaã nüxũ chixu ga curũ ore ga chomaã nüxũ quixuxũ. Rũ tũmagũ rũ marũ tayaxõgũ i ngẽma ore. Rũ nüxũ tikuèxãchitanũ na aixcũma cuxũtawa na ne chaxũxũ i chomax. Rũ tayaxõgũ ga cuma núma choxũ na cumuxũ. ⁹—Rũ ngẽmacèx cuxna chaca na tũxũ na curũngũxèxũcèx. Rũ tama cuxna chaca na nüxũ curũngũxèxũcèx i ñoma i naãnecũãx i duũxũgũ, natũrũ cuxna chaca na tũxũ curũngũxèxũcèx ya guxema

choxna tũxũ cumugũxe, erũ curũ duũxũgũ tixĩgũ. ¹⁰ Rũ guxãma ya yĩxema choxrũgũ ixĩgũxe rũ cuxrũgũ tixĩgũ. Rũ guxãma ya cuxrũgũ ixĩgũxe rũ choxrũgũ tixĩgũ. Rũ tũmagagu rũ duũxũgũ choxũ nicuèxũũgũ. ¹¹ —Choma rũ marũ tãũtãma ñoma i naãnewa changẽxmaẽcha, natũrũ i tũmagũ rũ ngẽmããcũ ñoma i naãnewa tá tangẽxmagũ ngẽxguma cuxũtawã chaxũyane. Pa Chaunatũ ya Üü necũx, rũ chanaxwẽxe na curũ porã ga choxna cuxãxũmaã tũxna cudadũxũ ya yĩxema choxna tũxũ cumugũxe, na ngẽmaãcũ guxãma wũxigu rũxĩnũxũcèx, ngẽma cuma rũ choma na wũxigu rũxĩnũxũrũũ. ¹² — Rũ yexguma guxema choxna tũxũ cumugũxetanũwa chayexmagu ga ñoma ga naãnewa, rũ curũ porã ga choxna cuxãxũmaã tũxna chadau rũ tũxũ íchapoxũ. Rũ taxũema ga guxema choxna tũxũ cumugũxe rũ itayarũtauxe. Rũ Yuda ga woetama iyarũtaxuxũxĩcatama inayarũtaxu na yanguxũcèx i curũ ore i ũmatũxũ. ¹³ —Rũ ñũxma rũ cuxũtawã tá chaxũ. Natũrũ ñomarũta ñoma i naãnewa changẽxma-yane rũ nũxũ chixu i ñãã curũ ore na tũmagũ rũ ta tũxũ nangẽxmaxũcèx i ngẽma taãẽ i aixcũma ixĩxũ i choma choxũ ngẽxmaxũ. ¹⁴ —Choma rũ marũ tũmamaã nũxũ chixu i curũ ore. Natũrũ ñoma i naãnecũãx i duũxũgũ rũ tũmachi naxaie, erũ tũma rũ tama naxrũũ tixĩgũ, ngẽxgumarũũ i choma rũ tama ñoma i naãnecũãxrũũ chixĩ. ¹⁵ —Tama cuxna tũmacèx chaca na tũxũ na quigagũxũcèx i ñoma i naãnewa. Natũrũ cuxna chaca na tũxũ na ícupoxũxũcèx nũxna i ngoxo i Chataná. ¹⁶ —Choma rũ tama ñoma i naãnecũãx chixĩ. Rũ tũmagũ rũ ta tama ñoma i naãnecũãx tixĩgũ, erũ cuxrũgũ tixĩgũ i ñũxmax. ¹⁷ —Curũ ore rũ aixcũma nixĩ. Rũ chanaxwẽxe i tũxũ cungũxẽẽ i curũ ore, na

aixcūma cupéxewa tixüünexũcèx ya yíxema choxna tũxũ cumugũxe. ¹⁸—Rü yexgumarũũ ga ñoma ga naãnecũãx ga duũxũgütanüwa choxũ na cumuxũrüũ, rü ngëxgumarũũ i choma rü ta ñoma i naãnecũãx i duũxũgü-tanüwa tũxũ chamugü. ¹⁹—Rü tũmagagu chaugü ichaxã na tũxũ changúexëẽxũcèx i curü ore i aixcūma ixĩxũ, na cupéxewa tixüünexũcèx ya yíxema choxna tũxũ cumugũxe. ²⁰—Natürü tama yíxema ñuxma yaxõgüxecèxicatama cuxna chaca. Natürü cuxna chaca ta tũmacèx ya yíxema yixcūra tá yaxõgũxe nagagu i tũmaãrũ ore ya yíxema ñuxma yaxõgũxe. ²¹—Rü guxãma ya yíxemacèx cuxna chaca na aixcūma wüxitama tixĩgũxũcèx. Rü ngẽma cuma rü choma na wüxitama ixĩgũxũrüũ, Pa Chaunatũx, rü chanaxwèxe i guxãma i tũma rü ta wüxitama tixĩgü. Rü ngẽmaãcü i ñoma i naãnecũãx i duũxũgü, rü tá nayaxõgü na cuma núma choxũ cumuxũ. ²²—Rü choma rü marũ tũxna chanaxã i ngẽmatama pora i cuma choxna cuxãxũ na ngẽmaãcü wüxitama tixĩgũxũcèx ngẽma cuma rü choma na wüxitama ixĩgũxũrüũ. ²³—Rü chanaxwèxe na tũmawa changëxmaxũ rü cuma i chowa na cungëxmaxũ na ngẽmaãcü aixcūma wüxi-tama ixĩgũxũ i guxãma i yixema. Rü ngẽmaãcü i ñoma i naãnecũãx i duũxũgü rü tá nüxũ nicuèxãchitanü na cuma núma choxũ cumuxũ, rü tá nüxũ nicuèxãchitanü na tũxũ cungechaũxũ ya yíxema choxna tũxũ cumugũxe ngẽma na choxũ cungechaũxũrüũ. ²⁴—Pa Chaunatũx, cuma choxna tũxũ cumugü. Rü chanaxwèxe i chauxütawa tangëxmagü i ngema tá íchangëxmaxũwa, na nüxũ tadaugũxũcèx i chorü pora ga choxna cuxãxũ. Yerü choxũ cungechaũ ga yexguma tauta naãne ixügügumama. ²⁵—Pa Chaunatü ya Mecüx, ñoma i naãnecũãx i duũxũgü rü tama cuxũ

nacuèxgü. Natürü choma rü cuxũ chacuèx. Rü yíxema choxna tüxũ cumugüxe rü ta marü nüxũ tacuèxgü na cuma núma choxũ cumuxũ. ²⁶ —Rü marü tüxũ nüxũ chacuèxêê na texé quiixũ. Rü guxũgutáma tüxũ nüxũ chicuèxêêãmachigü na cuma choxũ cungechaũxürüü tügü tangechaũgüxũcèx rü choma rü tümaxũtawa na changèxmaxũcèx —ñanagürü ga Ngechuchu.

18

Ngechuchuxũ niyauxgü

(Mt 26.47-56; Mr 14.43-50; Lc 22.47-53)

¹ Rü yema ñaxguwena ga Ngechuchu rü tomaã inaxũachi, na Cheduruarü ngatexũãrü tocutüwa taxixũcèx. Rü yéma nayexma ga wüxi ga nanetü necü. Rü yemawa naxü ga Ngechuchu tomaã. ² Rü Yuda ga yema bexma cúacü Ngechuchuxũ íyaxuaxũxũ rü nüxũ nacuèx ga yema nachica, yerü Ngechuchu rü muèxpüxcüna yéma tomaã nangutaquèxexũ. ³ Rü yéma nangu ga Yuda namaã ga ñuxre ga churaragü rü ñuxre ga tupauca ga taxũneãrü purichíagü ga yéma namugüxũ ga paigüarü aèxgacügü rü parichéugü. Rü meãma nixãxne, rü yéma nanangegü ga omügü. ⁴ Natürü ga Ngechuchu rü marü nüxũ nacuèx ga guxũma ga tacü tá nüxũ na ngupetüxũ. Rü yemacèx naxcèx nixũ, rü nüxna naca, rü ñanagürü: —¿Texécèx nixĩ i pedaugüxũ? —ñanagürü. ⁵ Rü nümagü rü Ngechuchuxũ nangãxügü, rü ñanagürügü: —Nacharétucũãx i Ngechuchucèx nixĩ i tadaugüxũ —ñanagürügü. Rü Ngechuchu nanangãxũ, rü ñanagürü: —Choma chixĩ —ñanagürü. Rü Yuda ga bexma cúacü ínaxuaxũxũ rü yema churaragütanüwa nayexma. ⁶ Rü yexguma yema ñaxgu ga Ngechuchu: “Choma chixĩ”,

ñaxgu, rü nüğüweama nacaixũtanü ga yema churaragü, rü yexma nayayi. ⁷ Rü yexguma ga Ngechuchu rü wena nüxna naca, rü ñanagürü: —¿Texécèx nixĩ i pedaugũxũ? —ñanagürü. Rü nümagü rü nanangãxũgü rü ñanagürügü: —Nacharétucũãx i Ngechuchucèx nixĩ i tadaugũxũ — ñanagürügü. ⁸ Rü Ngechuchu rü wenaxãrü ñanagürü nüxũ: —Marü pemaã nüxũ chixu rü choma chixĩ. Rü ngëxguma chauxcèx pedaugügu rü ¡peyaxĩxëẽ i ñaã chorü ngúexũgü! —ñanagürü. ⁹ Rü yemaãcü nangupetü na yanguxúcèx ga norü ore ga nümatama ga Ngechuchu nüxũ yaxuxũ ga ñaxgu:

“Yíxema Chaunatü choxna tüxũ mugüxe rü taxúetáma itayarütauxe”, ñaxgu. ¹⁰ Rü Chimáũ ga Pedru rü nüxũ iyexma ga wüxi ga cüxchi. Rü ngĩxũ nayaxu ga norü cüxchi rü yemamaã ínanadaechinü ga paigüarü ãëx-gacüarü duũxũ ga Macugu ãegaxũ. Rü norü tügünechinü ínaðae. ¹¹ Natürü ga Ngechuchu rü Pedruxũ ñanagürü: —¡Ngĩxchixũgu ngĩxũ ixücuchi i curü cüxchi! ¿Tama éxna nüxũ cucuèx na choma rü tá ngúxũ chingexũ ngëma Chaunatü chomaã naxueguxũrüü? —ñanagürü.

*Anápatawa Ngechuchuxũ nagagü
(Mt 26.57-58; Mr 14.53-54; Lc 22.54)*

¹² Rü yexguma ga churaragüarü ãëxgacü, namaã ga norü churaragü rü tupaucaarü purichíagü, rü Ngechuchuxũ niyauxgü. Rü nayanëixchacüügü. ¹³ Rü noxri rü ãëxgacü ga Anápatawa nanagagü. Rü Aná rü Caipánèxtü nixĩ. Rü guma taunecügu ga Caipá rü paigüeru nixĩ. ¹⁴ Rü yema Caipá nixĩ ga üpaacü yema Yudfugüarü ãëxgacügümaã nüxũ ixuxũ ga na

namemaẽxũ ga wüxitama ga yatü guxũma ga Yudfugücèx na yuxũ.

Pedru rü Ngechuchuxũ nixã

(Mt 26.69-70; Mr 14.66-68; Lc 22.55-57)

¹⁵ Rü choma rü Chimáũ ga Pedru rü wüxigu Ngechuchuwe tarüxĩ. Rü yema paigüarü ãẽxgacü rü choxũ nacuèx. Rü yemacèx ga choma rü wüxigu Ngechuchumaã tichocu ga ãẽxgacüpataèxtüwa. ¹⁶ Natürü ga Pedru rü ããxãrü düxétügutama narüxãũx. Rü yemacèx íchaxũxũ ga choma, rü yema ããxãrü dauruũ ga ngecúmaã chayarüdexa rü yexguma Pedruxũ iyamucuchi. ¹⁷ Rü yexguma ga yema ngecü ga ããxãrü dauruũ, rü Pedruna ica, rü ngígürügü: —¿Tama éxna cuma rü ta wüxi i norü ngúexũ quiĩxũ i ngẽma yatü i yayauxgüxũ? —ngígürügü. Rü Pedru ngĩxũ nangãxũ, rü ñanagürü: —Tama nixĩ — ñanagürü. ¹⁸ Rü yéma ããxtüwa rü ãẽxgacüarü duũxũgü rü purichíagü rü nanaxügü ga wüxi ga üxü, yerü nagáuane. Rü guma üxüxetüarü ngaicamagu nachigü, rü yéma nügü ninaĩxũgü. Rü Pedru rü ta yéma nügü nanaĩxũ naxëtüwa ga guma üxü.

Paigüarü ãẽxgacü rü Ngechuchuna naca

(Mt 26.59-66; Mr 14.55-64; Lc 22.66-71)

¹⁹ Rü yema paigüarü ãẽxgacü rü inanaxügü ga Ngechuchuna na naçaxũ, rü ñanagürü: —¿Tãcü nixĩ ga duũxũgüxũ namaã cungúexẽxũ? ¿Rü texégü tixĩ ya yíxema curü ngúexũgü? —ñanagürü. ²⁰ Rü Ngechuchu ñanagürü nüxũ: —Choma rü guxũ ga duũxũgüpéxewa nüxũ chixu ga chorü ore. Rü ngutaquéxepataũgüwa rü tupauca ya taxünewa i ngextá guxũma i Yudfugü íngutaquéxegüxũwa chanangúexẽ ga duũxũgü. Rü

yemaãcü taxuũma ichicux ga chorü ore. ²¹ —¿Rü tũxcüũ i choxna cuçaxũ i ñuxmax? Êcü, ¡nũxna naca i ngẽma duũxũgũ ga nüxũ ñnüẽxũ ga chorü ore! Rü nümagü tá cumaã nüxũ nixugũe ga ÷acũchigaxũ namaã na chixuxũ. Erü nümagü rü nüxũ nacuẽxgũ i guxũma ga ÷acũ ga namaã nüxũ chixuxũ —ñanagürü. ²² Rü yexguma Ngechuchu yema ñaxgu, rü wũxi ga tupauca ga taxũneãrũ purichía ga naxũtagu chixũ, rü Ngechuchuchiwegu nidagũ. Rü ñanagürü Ngechuchuxũ: —¿Tũxcüũ ngẽmaãcü cunangãxũ ya daa paigüarũ ãẽxgacũ? —ñanagürü. ²³ Rü Ngechuchu nanangãxũ rü ñanagürü: —Rü ngẽxguma ÷acũ rü chixexũxũ chixuxgu, ¡rü nüxũ ixu na ñuxãcü chixri na chidexaxũ! Natürü ega chorü ore rü aixcũma yixĩgu, rü ¿tũxcüũ i choxũ quidagũxũ i ñuxmax? —ñanagürü. ²⁴ Rü yexguma ga Aná rü Ngechuchuxũ yanáĩãcũma paigüarũ ãẽxgacũ ga Caipáxũtawa nanamu.

*Pedru rü wenaxãrũ tama Ngechuchuxũ nacuẽxneta
(Mt 26.71-75; Mr 14.69-72; Lc 22.58-62)*

²⁵ Rü yoxni ga Pedru rü üxüarũ ngaicamagu nachiecha, rü yéma nügũ nanaĩxũãma. Rü yema yéma yexmagũxũ rü nüxna nacagũe, rü ñanagürügũ: —¿Tama éxna cuma rü ta norü ngũexũ quiĩxũ i ngẽma yatü i yayauxgũxũ? —ñanagürügũ. Natürü ga Pedru rü tama nügũ nixu, rü ñanagürü: —Tama nixĩ —ñanagürü. ²⁶ Rü yéma nayexma ga wũxi ga paigüarũ ãẽxgacüarũ duũxũ. Rü yema rü Pedru ídaechinũxũtanũxũ nixĩ. Rü Pedruna naca, rü ñanagürü: —¿Tama éxna cuma yĩxũ ga nanetü necüwa Ngechuchumaã cuxũ chadauxũ? —ñanagürü. ²⁷ Rü Pedru rü wena tama nügũ nixu. Rü yexgumatama nica ga otá.

Ngechuchu rü Piratu- p'êxewa nayexma
(Mt 27.1-2, 11-14; Mr 15.1-5; Lc 23.1-5)

²⁸ Rü yexguma Ngechuchumaã nüxũ nachauegu ga nüxna na nacagüxũ, rü Caipápatawa ínanagaxüchigü rü Yudéaaneärü ãêxgacü ga Dumacũãxpatawa nanagagü. Natürü marü ningóonechaũ ga yexguma rü yemacèx ga yema Yudíugü rü tama guma ãêxgacüpatagu nachocu, yerü norü mugü nüxũ nixu rü taxũ ga pecadu nixí na wüxi ga Dumacũãxpatagu na nachocuxũ ga yema ngunexũgu. Rü yemaãcü tama Tupanap'êxewa nügü nixüxaarü maxũãxêëgüchaũ, yerü yexguma nügü yaxüx-aarü maxũãxêëgügu, rü taxucürüwa nanangõxgü ga õna ga Üpetüchigaarü petacèx namexêëxũ. ²⁹ Rü yemacèx ga guma ãêxgacü ga Dumacũãx ga Piratu rü napatawa ínaxüxü ga duüxügümaã na yadexaxüçèx. Rü ñanagürü nüxũ: —¿Tacüçèx ípenaxuaxũ ya daa yatü? —ñanagürü. ³⁰ Rü nümagü rü Piratuxũ nangãxügü, rü ñanagürügü: —Ngêxguma chi tama wüxi i taxũ i chixexũ naxüxgu, rü tãü chima cuxütawa tanaga —ñanagürügü. ³¹ Rü yexguma ga Piratu rü ñanagürü nüxũ: —¿Ëcü perü ãêx-gacügüxütawa penaga, rü perü mugü pemaã nüxũ ix-uxüãcüma penapoxcux! —ñanagürü. Natürü ga yema Yudíugü rü Piratuxũ nangãxügü, rü ñanagürügü: — Natürü pema i Dumacũãxgü rü marü toxna penachuxu na texéxü timèxgüxũ tümaärü chixexüçèx —ñanagürügü. ³² Rü yemaãcü ningu ga yema ore ga Ngechuchu üpaacü nüxũ ixuxũ ga ñuxãcü tá na nayuxũ. ³³ Rü Piratu rü wenaxärü napatagu naxücu, rü Ngechuchucèx nangema. Rü nüxna naca, rü ñanagürü: —¿Cuma yíixũ i Yudíugüarü ãêxgacü quiixũ? —ñanagürü. ³⁴ Rü Ngechuchu ñanagürü

nüxũ: —¿Cuechamatama i nagu curüxĩnüxũ na ngẽmaãcü choxna cuçaxũ, rü éxna togü marü cumaã nüxũ nixu na ngẽmaãcü choxna cuçaxũcèx? —ñanagürü. ³⁵ Rũ Piratu Ngechuchuxũ nangãxũ, rü ñanagürü: —¿Éxna cuma nagu curüxĩnügu rü Yudú chiĩxũ? Rũ ngẽma cuchiũñanecũãxgü rü paigüarü ãëxgacügütama nixĩ i chauxütawa cuxũ gagüxũ. ¿Éxna tacü rü chixexũ cuxü? —ñanagürü. ³⁶ Rũ yexguma ga Ngechuchu rü nanangãxũ, rü ñanagürü: —Choma rü tama ñoma i naãnewa ãëxgacü chixĩ. Rũ ngëxguma ñoma i naãnewa ãëxgacü chixĩgu, rü chorü duũxũgü rü chi Yudúguarü ãëxgacügümaã nügü nadai rü tãü chima choxũ niyauxgü i ngëxguma. Natürü tama ñoma i naãnewa ãëxgacü chixĩ —ñanagürü. ³⁷ Rũ yexguma ga Piratu rü ñanagürü nüxũ: —¿Éxna to i nachiũñaneärü ãëxgacü quixĩ i cumax? —ñanagürü. Rũ Ngechuchu nanangãxũ rü ñanagürü: —Cumatama marü nüxũ quixu na ãëxgacü chiĩxũ. Rũ yemacèx ga choma rü chabu rü ñoma ga naãnewa chaxũ na duũxũgümaã nüxũ chayarüxuxũcèx i ore i aixcüma ixĩxũ. Rũ guxãma ya texé ya nüxũ cuáxchaũxë i ngẽma ore i aixcüma ixĩxũ, rü choxũ itarüxĩnüë i ngẽma ore i nüxũ chixuxũ —ñanagürü. ³⁸ Rũ Piratu rü ñanagürü nüxũ: —¿Tacü nixĩ i ngẽma ore i aixcüma ixĩxũ? —ñanagürü.

Ngechuchumaã nanaxuegu na yamëxgüãxũ
(Mt 27.15-31; Mr 15.6-20; Lc 23.13-25)

Rũ yemaãcü Ngechuchuna nacaxguwena ga Piratu, rü wenaxãrü Yudúgümaã nayarüdexa. Rũ ñanagürü nüxũ: —Taxuũma i chixexũxũ nawa chadau i ñãã yatü. ¿Rũ tũxcüũ chi inapoxcuxũ? ³⁹ —Natürü guxüguma ega Üpetüchigaarü petawa nanguxgu, rü pecüma nixĩ na

choxna naxcèx na pecaxũ na íchananguxuchixẽẽxũcèx i wüxi i duũxũ i poxcuxũ. ¿Rü penaxwèxexũ na pexcèx íchananguxuchixẽẽxũ i ñaã perü ãẽxgacü, Pa Yudíugüx? —ñanagürü. ⁴⁰ Rü yexguma ga guxũma ga yema duũxũgü, rü tagaãcü aita naxüe, rü ñanagürügü: —Tama tanaxwèxe na cuya-ngéxũ i ngẽma yatü. Rü Barabá waxi nixĩ i tanaxwèxexũ na cuyangéxũ —ñanagürügü. Rü yema Barabá rü wüxi ga máẽtaxũ nixĩ.

19

¹ Rü yexguma ga Piratu rü churaragüxũ namu na Ngechuchuxũ nacuaixgüxũcèx. ² Rü yema churaragü rü chuchuxũwa nanaxügü ga wüxi ga boxũ, rü ñuxũchi naẽruwa nayangèxcuchigü. Rü wüxi ga máxũ ga naxchiru ga daucharaxũgu nayacuxẽẽgü. ³ Rü ñuxũchi naxcèx naxĩ, rü nüxũ nacugüeãcüma ñanagürügü nüxũ: —¡Namaxũ, Pa Yudíugüarü ãẽxgacüx! —ñanagürügü. Rü nanapechiwegü. ⁴ Rü Piratu rü wenaxãrü düxétüwa naxũ, rü Yudíugüxũ ñanagürü: —¡Dücèx! ñuxma tá nuã pepéxewa chanaga na nüxũ pecuáxũcèx na taxuũma i chixexũxũ nawa chadauxũ —ñanagürü. ⁵ Rü düxétüwa naxũ ga Ngechuchu. Rü namaã nangèxcueru ga yema boxũ ga chuchuxũwa naxügüxũ. Rü nagu nicux ga yema máxũ ga naxchiru ga daucharaxũ. Rü yex-guma ga Piratu rü Yudíugüxũ ñanagürü: —Daa nixĩ ya yima yatü —ñanagürü. ⁶ Natürü yexguma Ngechuchuxũ nadaugügu ga paigüarü ãẽxgacügü rü purichíagü, rü inanaxügüe ga aita na naxüexũ. Rü ñanagürügü: —¡Curuchawa yapota! ¡Curuchawa yapota! —ñanagürügü. Rü Piratu rü ñanagürü nüxũ: —¡Ëcü, peyaga rü pematama

curuchawa peyapota! Erü choma rü taxuũma i chixexũxũ nawa chadau —ñanagürü ga Piratu. ⁷ Natürü ga yema Yudíugü rü Piratuxũ nangãxũgü, rü ñanagürügü: —Toma toxũ nangẽxma i wüxi i torü mu. Rü ngẽma torü mu toxũ nüxũ nacuèxẽẽ na namexũ na nayuxũ i ñaã yatü, yerü nüma rü nüxũ nixu ga Tupana Nane na yiixũ —ñanagürügü. ⁸ Rü yexguma yemaxũ naxĩnügu ga Piratu, rü yexeraãcü namuũ. ⁹ Rü wena Ngechuchumaã napatagu naxücu. Rü yéma Ngechuchuna nayaca, rü ñanagürü: —¿Ngextácũãx quixĩ i cumax? — ñanagürü. Natürü ga Ngechuchu rü tama nanangãxũ. ¹⁰ Rü yexguma ga Piratu rü Ngechuchuxũ ñanagürü: — ¿Éxna ngẽma täütáma choxũ cungãxũ? ¿Tau éxna i nüxũ cucuáxũ na choxméxwa cungẽxmaxũ na curuchawa cuxũ chipotaxũ rü éxna cuxũ na íchanguxuchixẽẽxüçèx? — ñanagürü. ¹¹ Rü Ngechuchu nanangãxũ, rü ñanagürü: —Tãũ chima cuxméxwa changẽxma, ega tama Tupana naxwèxegu. Rü ngẽmacèx nixĩ i ngẽma duũxũgü i cuxna choxũ mugüxũ rü curü yexera poraãcü napecaduãxgü — ñanagürü. ¹² Rü yemawena rü Piratu nagu narüxĩnú ga ñuxãcü Ngechuchuxũ na ínanguxuchixẽẽegaxũ. Natürü yema Yudíugü rü poraãcü aita naxüe, rü ñanagürügü: — Ngẽxguma tá ícunanguxuchixẽẽxgu rü tama curü ãẽxgacü ya tacü ya Dumacũãx ya Chécharuxũ cungechaũ. Erü ngexerüxe ya ãẽxgacü ya tacüxũ tügü ingucuchixẽẽxẽ, rü Dumacũãx ya ãẽxgacü ya tacü ya Chécharuarü uwanü tixĩ —ñanagürügü. ¹³ Rü yexguma yemaxũ naxĩnügu ga Piratu, rü churaragüxũ namu ga Ngechuchuxũ düxétüwa na nagagüxüçèx. Rü nawa nayarüto ga wüxi ga tochicaũ ga taxũ ga nutagünaxçèx ga togawa rü Gabatagu ãegaxũ.

Rü yema nachicawa nixĩ ga poxcuexũ ga duũxũgũna naçaxũ ga ãëxgacü. ¹⁴ Rü wüxi ga ngunexũ nataxu ga Üpetüchigaarü petawa na nanguxũ ga yexguma, rü marü tocuchiwa nangu. Rü Piratu rü Yudíugüxũ ñanagürü: — ¡Daa nixĩ ya yima perü ãëxgacü! ñanagürü. ¹⁵ Natürü ga nümagü rü aita naxüe, rü ñanagürügü: —Tanaxwèxe na nayuxũ. Rü ¡curuchawa yapota! —ñanagürügü. Rü Piratu nüxna naca rü ñanagürü nüxũ: —¡Ñuxãcü i choma rü ichanamu na curuchawa yapotagüãxücèx ya perü ãëxgacü? —ñanagürü. Natürü ga paigüarü ãëxgacügü rü Piratuxũ nangãxũgü, rü ñanagürügü: —Yima ãëxgacü ya tacü ya Chécharu ya Dumawa ngëxmacü rü yima nixĩ ya torü ãëxgacü, rü nataxuma i to —ñanagürügü. ¹⁶ Rü yexguma ga Piratu rü yema Yudíugũna Ngechuchuxũ namu na curuchawa yapotagüãxücèx. Rü nümagü rü nayagagü.

*Curuchawa Ngechuchuxũ nipotagü
(Mt 27.45-56; Mr 15.33-41; Lc 23.44-49)*

¹⁷ Rü ínaxũxũ ga Ngechuchu, rü norü curucha ngĩxũ ininge. Rü yéma nanagagü nawa ga wüxi ga nachica ga “Duũxëeruchinèxãgu” ãëgaxũ. Rü yema rü Górguta nixĩ ga naega ga togawa. ¹⁸ Rü yéma curuchawa Ngechuchuxũ nayarüpotagü. Rü Ngechuchurüũ curuchawa nayapotagü ga taxre ga to ga yatügü, rü wüxi ga norü tügü necüwawa rü to ga norü toxwecüwawa. ¹⁹ Rü Piratu rü churragüxũ namu na Ngechuchuarü curuchatapéxewa na yapocuchigüãxücèx ga wüxi ga mürapewaxacü ga ãëgat-achinüxũ ga ñaxũ:

“Ngechuchu ya Nacharétucüãx ya Yudíugüarü ãëxgacü”, ñaxũ. ²⁰ Rü muxũma ga yema Yudíugü nüxũ nadaumatü ga yema namatü ga mürapewaxacügu

üxũ. Yerü yema nachica ga Ngechuchuxũ curuchawa íyanapotagüxũwa, rü ãñeärü ngaicamana nixĩ. Rü tomaẽxpüx ga nagawa naxümatü ga yema naega ga yema mürapewawa. Rü togawa rü Griégugügawa rü Dumacũãxgügawa naxümatü. ²¹ Rü yemacèx ga yema Yudíugüarü paigüarü ãẽxgacügü rü Piratuxũ ñanagürügü: —Toma rü tama tanaxwèxe i cunaxümatü i “Yudíugüarü Æxgacü”, ñaxũ. Rü narümemaẽ nixĩ i cunaxümatü rü ñacurügü:

“Nügü ixücü na Yudíugüarü Æxgacü yíixũ”, ñacurügü. ²² Natürü Piratu nanangãxũ rü ñanagürü: —Ngẽma chaxümatüxũ rü marü ngëxma naxümatü —ñanagürü. ²³ Rü curuchawa marü Ngechuchuxũ yapotagüguwena ga churaragü, rü nanade ga Ngechuchuchiru. Rü yema ägümücü ga churaragü rü nügümaã nayatoye ga naxchiru. Rü nanayauxgü ta ga norü gáuxũchiru ga máxũ. Natürü taxuwama narüngèixte, yerü woetama yemaãcü naxü. ²⁴ Rü yemacèx ga yema churaragü rü nügümaã ñanagürügü: —¡Tãütáma nagu tagaugüe! Rü narümemaẽ nixĩ i naxcèx tá naxĩnücèxwéxegü rü ngĩxũ tañanagügü i wüxi i diëru na ngẽmawa nüxũ icuèxgüxũcèx na texéarü tá na yíixũ —ñanagürügü. Rü yemaãcü ningu ga Tupanaärü ore ga ümatüxũ ga ñaxũ:

“Nügümaã nayatoye i chauxchiru, rü naxcèx ngĩxũ tanañanagügü i wüxi i diëru”, ñaxũ. Rü aixcüma yemaãcü nixĩ ga naxügüãxũ ga churaragü. ²⁵ Rü Ngechuchuarü curuchapünewa iyexma ga naẽ ga María, rü ngíeyèx, rü María ga Creopá naxmèx, rü María ga Magadácũãx. ²⁶ Rü yexguma Ngechuchu naẽxũ dèuxgu ga yexma chauxütagu na nachixũ, rü ñanagürü ngĩxũ: —Pa Mamax, yima nixĩ ya cune, —ñanagürü.

²⁷ Rũ yemawena, rũ ñanagürũ choxũ: —Ngẽma iyixĩ i cue —ñanagürũ. Rũ yexgumamama rũ chopatawa ngĩxũ chayaxu. Rũ chauxũtawaweyexmaẽcha.

Nayu ga Ngechuchu

²⁸ Rũ Ngechuchu nũxũ nacux ga marũ na yanguxũ ga guxũma ga norũ puracũ ga ñoma ga nañnewa. Rũ yema Tupanaärũ ore ga ũmatũxũ na yanguxẽẽxũcèx, rũ ñanagürũ: —Chitawaweyexma —ñanagürũ. ²⁹ Rũ yema iyexma ga wũxi ga tũxũxãcũ ga binu ga marũ ũxchiũcũmaã aãcuxcũ. Rũ wũxi ga tũèxmũ guma binumaã niwaixẽẽgũ, rũ wũxi ga dexnemenèxãwaweyanèix. Rũ yemamaã naãxgu nanawéxgũ. ³⁰ Rũ Ngechuchu nayaxaxũ ga guma binu ga ũxchiũcũ rũ ñanagürũ: —Marũ ningu i guxũma i chorũ puracũ —ñanagürũ. Rũ ñuxũchi inayarũmaxãchieru, rũ nayu.

Wũxi ga churara rũ wocaxemaã Ngechuchuxũ nacana-pacũtũxũ

³¹ Natürũ ga yema Yudũgũarũ aẽxgacũgũ rũ tama nanaxwèxegũ ga curuchagũwaweyayexmagũxũ ga yema naxũnegũ. Yerũ moxũãcũ rũ ngũxchigaarũ ngunexũ nixĩ. Rũ yema Yudũgũcèx rũ yema nixĩ ga guxũ ga ngũxchigaarũ ngunexũärũ yexera ga ũunexũ, yerũ norũ peta ga ũpetũchigaarũ ũgũ nixĩ. Rũ yemacèx Piratuna naxcèx nacagũ na churaragũ yema namugũxũcèx na yapoyeparagũãxũcèx na paxa nayuexũcèx ga yema curuchawaweyipotagũxũ, rũ paxa na nadeãxũcèx ga curuchawaweyanaxũpa ga ngũxchigaarũ ngunexũ. ³² Rũ yema naxĩ ga churaragũ rũ inanapoeparagũ ga yema taxre ga yatũgũ ga Ngechuchumaã yema curuchawaweyipotagũxũ. ³³ Rũ Ngechuchucèx naxĩ ga churaragũ, natürũ nũxũ nadaugũ

ga marü na nayuxũ. Rü yemacèx tama nayapoyeparagü.
³⁴ Natürü wüxi ga churara rü Ngechuchuxũ nacana-
 pacütüxü. Rü yexgumatama ínayèxüchi ga nagü rü dexá.
³⁵ Rü choma i CuáŨ rü nüxũ chadau i guxũma ga ñãã
 pemaã nüxũ chixuxũ. Rü aixcüma nixĩ i ñãã chorü ore. Rü
 chomatama nüxũ chacuèx i aixcüma na yĩxũ, rü pemaã
 nüxũ chixu na pema rü ta peyaxõgüxücèx. ³⁶ Rü yema
 nangupetü na yanguxücèx i Tupanaãrü ore i úmatüxü i
 ñaxũ:
 “Rü taxúnetáma ya naxchinèxã nipoyegü”,
 ñaxũ. ³⁷ Rü toxnamana i Tupanaãrü ore i úmatüxüwa rü
 ñanagürü:
 “Tá nüxũ narüdaunü ya yima nacanapacütüxügüãcü”,
 ñanagürü.

Ngechuchuxũ inatèxgü

(Mt 27.57-61; Mr 15.42-47; Lc 23.50-56)

³⁸ Rü nayexma ga wüxi ga yatü ga Arimatéacũãx ga
 Yúhegu ãegacü. Rü nüma rü ta Ngechuchuaxũ nayaxõ,
 natürü cúãcü nayaxõ yerü natanüxũ ga Yudíugüarü
 ãëxgacügüxü namuũ. Rü guma nixĩ ga Piratuna yaçacü
 na nayauxãxücèx ga Ngechuchuxüne. Rü Piratu rü: —
 Ngũ, —ñanagürü. Rü yexguma ga Yúche rü yéma naxü
 ga curuchawa íyapotaxüwa, rü curuchawa nayayaxu ga
 naxüne ga Ngechuchu. ³⁹ Rü yéma nangu ga Nicodému
 ga ũpaacü chütacü Ngechuchuxütagu naxüãnecü.
 Rü yéma nanange ga 30 kilo naguxũ ga pumara ga
 yixichixũ na Ngechuchuxũ namaã nachaxünegüxücèx.
⁴⁰ Rü yemaãcü ga Yúche rü Nicodému rü curuchawa
 nanayauxgü ga naxüne ga Ngechuchu. Rü naxchiru ga
 marü pumaracharaxümaã nayanáxpüxügü. Yerü yema
 nixĩ ga tocüma ga toma ga Yudíugü ga yexguma wüxi ga

yueta tüxũ itatèxgügu. ⁴¹ Rü yema nachica ga Ngechuchu curuchawa ípotaxũwa nayexma ga wüxi ga nanetüncü. Rü yema nanetüncüwa nayexma ga wüxi ga naxmaxũ ga yexwacaxũũ ga taguma texéxũ nagu natèxgüxũ. ⁴² Rü yema naxmaxũgu nayaxücuchigü ga Ngechuchuxũne yerü nangaicama, rü paxa tá ningune ga ngüxchigaarü ngunexũcèx.

20

Ínarüda ga Ngechuchu

(Mt 28.1-10; Mr 16.1-8; Lc 24.1-12)

¹ Rü yüxüarü pèxmamaxũchi ga tauta meã yangóonegu, rü María ga Magadácũãx rü Ngechuchuxũ íyaxücuchigüxũwa ixũ. Rü nüxũ idau ga guma nuta ga Ngechuchumaxũ namaã rüngüxtaũcü, rü marü na ínaxügachixũ. ² Rü yexgumatama iinaãchi, rü yema choma rü Chimáũ ga Pedrumaã ítayexmagüxũwa ina. Rü ngígürügü toxũ: —Rü marü nanayauxgü ya Cori ya Ngechuchu i naxmaxũwa. Rü tama nüxũ tacuèx na ngexta na naxügüãxũ —ngígürügü. ³ Rü yexguma ga choma rü Pedru rü Ngechuchuxũ íyaxücuchigüxũwa taxĩ. ⁴ Rü wüxigu itaxũãchi ga tomax, natürü ga choma rü poraãcü Pedruarü yexera ichañaãchi. Rü chaxira Ngechuchuxũ íyaxücuchixũwa changu. ⁵ Rü ichayarümaxãchi na nagu chidaucuchixũcèx. Rü nüxũ chadau ga naxchiru ga namaã yanáxpüxũgüãxũ ga yexma na naxüxũ. Natürü tama aixepegu chaxücu. ⁶ Rü choweama ínangu ga Chimáũ ga Pedru. Rü nüma rü yema naxmaxũgu naxücu. Rü nüma rü ta nüxũ nadau ga yema naxchiru ga namaã yanáxpüxũchiréxũ. ⁷ Rü nüxũ nadau ta ga naxchiru ga namaã yanèixèrugüãxũ ga meãma dixcumüxũ ga

nüxrüguma üxũ. Rü tama wüxigu namaã nanu ga yema naxchiru ga namaã yanáïxpüxũgüãxũ. ⁸ Rü yexguma ga choma ga chaxiraxüchi yéma na changuxũ, rü choma rü ta chixücu. Rü nüxũ chadau ga guxũma, rü chayaxõ ga Ngechuchu rü marü wena na namaxũxũ. ⁹ Yerü noxri rü tama nüxũ tacuèxgüéga ga yema Tupanaãrü ore ga ümatüxũ ga ñaxũ:

“Cristu rü tá wena namaxũ”,
ñaxũ. ¹⁰ Rü yexguma ga toma rü tochiüçèx tawoegu.

*Ngechuchu rü ngïxcèx nangox ga María ga Magadácüãx
(Mt 16.9-11)*

¹¹ Natürü ga María rü yexma irüxãüx naxütägu ga Ngechuchumaxũ. Rü yéma ixaxu. Rü naxauxãcüma iyarümaxãchi, rü nagu iyadaucuchi ga naxmaxũ. ¹² Rü nüxũ idau ga taxre ga daxüçüãx ga Tupanaãrü orearü ngeruügü ga icómüchiruxũ. Rü Ngechuchuxüne ixüchiréxüwa narütogü, rü wüxi ga Ngechuchueru ixüxüwaama rü to ga nacütawaama. ¹³ Rü yema daxüçüãx ga duüxügü rü ngïxna nacagüe, rü ñanagürügü: —Pa Ngecüx, ¿tacüçèx cuxaxu? —ñanagürügü. Rü ngïma rü inangãxũ, rü ngïgürügü: —Chaxaxu erü nayangegü i naxüne ya chorü Cori, rü tama nüxũ chacuèx na ngexta naxügüãxũ —ngïgürügü. ¹⁴ Rü yexgumatama yema ngïxgu, rü ngïgüweama idau. Rü nüxũ idau ga Ngechuchu ga ngïxütawa na nayexmaxũ. Natürü tama nüxũ icuèx ga Ngechuchu na yïxũ ga guma. ¹⁵ Rü yexguma ga Ngechuchu rü ngïxna naca, rü ñanagürü: —Pa Ngecüx, ¿tacüçèx cuxaxu? ¿Rü texécèx nixĩ i cudadaxũ? —ñanagürü. Rü ngïma nüxũ nacuèxgu rü yema nixĩ ga yema nanetüncüarü dauruũ. Rü yemacèx

ngĩgürügü nüxũ: —Pa Corix, ega cuma cuyangexgu i naxũne ya Ngechuchu, rü ꞑchomaã nüxũ ixu na ngexta na cunaxũxũ na choma chayayaxuxũcè! —ngĩgürügü. ¹⁶ Rü yexguma ga Ngechuchu rü ñanagürü ngĩxũ: —Pa Maríax —ñanagürü. Rü ngĩma rü naxcèx idaueguãchi, rü togawa ngĩgürügü nüxũ: —Pa Rabunix —ngĩgürügü. Rü ngẽma rü “Pa Ngúexẽẽruũx”, ñaxũchiga nixĩ. ¹⁷ Rü Ngechuchu rü ñanagürü ngĩxũ: —ꞑTãxũ i choxũ quingõgũxũ, erü tauta Chaunatũxũtawa chaxũ! ꞑNaturü ngema chaueneẽgũtanũwa naxũ rü namaã nüxũ yarũxu na choma rü tá Chaunatũ ya chorũ Tupana ya Penatũ ya perũ Tupanaxũtawa chaxũxũ! —ñanagürü. ¹⁸ Rü yexguma ga María ga Magadácũãx rü tomaã nüxũ iyarũxu ga marũ nüxũ na nadauxũ ga Cori ga Ngechu-chu. Rü ñuxũchi tomaã nüxũ iyaxu ga yema ore ga Ngechuchu ngĩmaã nüxũ ixuxũ.

Norü ngúexũgücèx nangox ga Ngechuchu

(Mt 28.16-20; Mr 16.14-18; Lc 24.36-49)

¹⁹ Rü yema yũxũarũ ngunexũãrũ chũtacũ, rü tangutaquẽxegũ ga toma ga Ngechuchuarũ ngúexũgũ. Rü togũ tarũwãtaũgũ, yerũ yema Yudũfugũarũ ãẽxgacũgũxũ tamuũẽ. Rü Ngechuchu rü ngürũãchi yẽma nangox, rü torũ ngãxũtanũgu nachi. Rü toxũ narũmoxẽ, rü ñanagürü: —ꞑPetaãẽgũ! —ñanagürü. ²⁰ Rü yema ñaxguwena rü toxũ nügũ nawéméx, rü nügũ inawépacũtũxũ. Rü tomagũ ga norũ ngúexũgũ rü tataãẽgũ, yerũ nüxũ tadaugũ ga guma torũ Cori. ²¹ Rü yexguma rü wenaxãrũ ñanagürü toxũ: —ꞑPetaãẽgũ! Rü yema Chaunatũ núma choxũ na muxũrũũ tãtama nixĩ i pexũ chamuxũ i chomax —ñanagürü. ²² Rü yexguma

rü toétü “cue” ñanagürü ga Ngechuchu. Rü ñuxüchi ñanagürü toxü: —¡Penayauxgü i Tupanaãe i Üünexü!
²³ Rü ngëxguma duüxügü nüxü rüxoegu i norü pecadugü, rü pema rü pexü nangëxma i pora na namaã nüxü pixuxü na Tupana marü nüxü nüxü rüngümaxü i norü pecadugü. Natürü ngëxguma duüxügü tama nüxü rüxoegu i norü pecadugü, rü pema rü pexü nangëxma i pora na namaã nüxü pixuxü na marü ngëma norü pecadugüwatama nangëxmagüxü —ñanagürü ga Ngechuchu.

Tumachi nüxü nadau ga Cori ga wena maxücü

²⁴ Natürü totanüxü ga Tumachi ga Wüxigu Buexü-maã taxugüxü, rü tama totanüwa nayexma ga yexguma Ngechuchu toxçèx ngoxgu. ²⁵ Rü yixcama ga toma rü Tumachimaã nüxü tixugüe, rü ñatarügügü: —Marü nüxü tadau ya törü Cori ya Ngechuchu —ñatarügügü. Natürü ga Tumachi rü toxü nangãxü rü ñanagürü: —Ngëxguma tama nüxü chadèuxgu i norü itapuamaxü i naxmëxwa rü tama nüxü chingögügu i ngëma itapua-maxü rü ngëma norü cana-pacütüxü, rü täütáma chayaxõ i ngëma ore i chomaã nüxü pixuxü —ñanagürü. ²⁶ Rü 8 ga ngunexüguwena rü wenaxärü tangutaquëxegü ga toma ga wüxi ga ipatawa. Rü totanüwa nayexma ga Tumachi ga yexguma. Rü woo ga na nawãtaxü ga ñãx, rü ngürüãchi yéma nangox ga Ngechuchu, rü torü ngãxütanügu nachi. Rü toxü narümoxë, rü ñanagürü: —¡Petaãëgü! —ñanagürü. ²⁷ Rü yexguma Tumachixü ñanagürü ga Ngechuchu: —¡Nüxü ingögü i ñaã chorü itapuamaxü i choxmëxwa ngëxmaxü, rü nüxü nadau ya daa choxmëx! ¡Rü nuxa chorü canapacütüxügu ingögü!

¡Rü nüxũ rüxo na tama cuyaxõxũ! ¡Rü meãma yaxõ i ñuxmax! —ñanagürü. ²⁸ Rü yexguma ga Tumachi rü Ngechuchuxũ nangãxũ, rü ñanagürü: —Pa Chorü Corix, cuma nixĩ i chorü Tupana quiixũ —ñanagürü. ²⁹ Rü Ngechuchu rü ñanagürü nüxũ: —Pa Tumachix, cuma cuyaxõ i ñuxma erü choxũ cudau. Natürü tataãëgü ya yíxema tama choxũ daugüãcüma yaxõgüxe —ñanagürü.

Tacüçèx naxümatü i ñaã popera

³⁰ Rü Ngechuchu rü topéxewa nanaxü ga muxüma ga to ga mexüügü ga cuèxruügü i tama ñaã poperagu ümatüxũ. ³¹ Natürü guxüma i ñaã poperagu ümatüxũ, rü naxümatü na peyaxõgüxüçèx na Ngechuchu rü Cristu ya Tupana Nane na yíxũ. Rü ngëxguma nüxü peyaxõgügu rü tá pexü nangëxma i maxü i taguma gúxũ.

21

Ngechuchu rü 7 ga norü ngüexüçèx nangox

¹ Rü yemawena ga Ngechuchu rü wenaxärü toxçèx nangox naxtaxa ga Gariréaanacüwa. Rü Tibéria nixĩ ga to ga naega. Rü ñaãcü nixĩ ga toxçèx nangóxũ. ² Rü wüxiwa tayexmagü ga choma rü Chaütiágu ga Zebedeu nanegü rü Chimáũ ga Pedru, rü Tumachi ga Wüxigu Buexümaã taxugüxũ, rü Natanae ga Gariréaanegune ga ñãne ga Canácüãx, rü to ga taxre ga tomücügü ga Ngechucharü ngüexüçèx. ³ Rü Chimáũ ga Pedru rü ñanagürü toxü: — Tá chayapüchae —ñanagürü. Rü yexguma ga toma rü tanangãxüçèx, rü ñatarügügü nüxũ: —Toma rü tá ta cuwe tarüxĩ —ñatarügügü. Rü yéma taxĩ, rü wüxi ga ngegu tichoũ. Natürü yema chütaxügu rü taxuüma ga choxni tiyauxgü. ⁴ Rü yexguma noxri yangóonegu rü Ngechuchu toxçèx nangox ga naxtaxaanacüwa. Natürü ga toma

rü tama nüxũ tacuèxgü ga Ngechuchu na yĩxũ. ⁵ Rü yexguma ga Ngechuchu rü toxna naca, rü ñanagürü toxũ: —Pa Ngextüxcügüx, ¿éxna taxuũma i choxni piyauxgü? —ñanagürü. Rü toma rü tanangãxũgü rü ñatarügügü: —Taxuũma —ñatarügügü. ⁶ Rü yexguma ga Ngechuchu rü ñanagürü toxũ: —¡Peweũãrü tügü necüwawaama penatáe i perü pücha! rü tá ípenayauxũ i choxni —ñanagürü. Rü yémaãma tanatáegü ga torü pücha, rü taxucürüwa ítanatúächigü, yerü muxüchixũ ga choxni tiyauxgü. ⁷ Rü yexguma ga choma rü Pedruxũ ñacharügü: —Yima nixĩ ya Cori ya Ngechuchu —ñacharügü. Rü yexguma yemaxũ naxĩnügu ga Pedru ga guma na yĩxũ ga Cori, rü nicuxcuchi ga naxchiru yerü noxri rü ínacuxuchichiréx. Rü natüchiüwa nayuxu, rü naxãnacüwa naxcèx nawëxë. ⁸ Rü toma ga natanüxũ rü nguemaãtama naxãnacüwa taxãgü. Rü yéma tanatügü ga yema pücha ga choxnimaã äãcuxũ yerü 100 metruxicatama nataxu ga na naxãnacüwa na tangugüxũ. ⁹ Rü yexguma nguewa ítachoũgu rü yéma nüxũ tadau ga wüxi ga üxü, rü naxëtügu naxü ga wüxi ga choxni. Rü yéma nayexma ta ga wüxi ga pãü. ¹⁰ Rü Ngechuchu rü ñanagürü toxũ: —¡Nuãta penge i ñuxre i ngẽma choxni i ípeyauxũxũ! —ñanagürü. ¹¹ Rü Chimãü ga Pedru rü nguegu nixüe. Rü yema püchamaã naxnücügu ínanatúächiwetaũ ga choxni ga ínayauxũxũ. Rü 153 ga choxni ga itaxũ nayexma nawa ga yema pücha. Rü woo ga na namuxüchixũ, rü tama narügáu ga pücha. ¹² Rü yexguma ga Ngechuchu rü ñanagürü toxũ: —¡Nuã pexĩ rü peyachibüe! —ñanagürü. Rü taxúema ga toma rü nüxna tacaxchaũ na texé yĩxũ ga nümax, yerü marü nüxũ tacuèxgü ga guma na yĩxũ ga Cori ga Ngechuchu. ¹³ Rü yexguma ga Ngechuchu rü yéma toxütawa naxü.

Rü nanayaxu ga pãũ rü wüxichigü toxna nanaxã. Rü yexgumarüũ ta ga choxni rü toxna nanaxã. ¹⁴ Rü yema nixĩ ga norü tomaẽxpüxcüna ga toxcèx na nangóxũ ga Ngechuchu ga yuwa ínadxguwena.

Ngechuchu rü Pedrumã nidexa

¹⁵ Rü yexguma chibüewa tingugüguwena rü Ngechuchu rü Chimáũ ga Pedruna naca, rü ñanagürü: —Pa Chimáũ Pa Cuáũ Nanex, ¿aixcüma choxũ cungechaũxũ i ñãã cumücügüxũ na cungechaũxũärü yexera? —ñanagürü. Rü Pedru nanangãxũ, rü ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rü Ngechuchu rü ñanagürü nüxũ: —¡Nachibüexẽẽ i chorü duũxũgü! —ñanagürü. ¹⁶ Rü wenaxãrü Pedruna naca, rü ñanagürü: —Pa Chimáũ Pa Yoná Nanex, ¿aixcüma i choxũ cungechaũxũ? —ñanagürü. Rü Pedru nanangãxũ, rü ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rü Ngechuchu rü ñanagürü nüxũ: —Ëcü, ¡nüxna nadau i chorü duũxũgü! —ñanagürü. ¹⁷ Rü norü tomaẽxpüxcüna wenama Pedruna naca, rü ñanagürü: —Pa Chimáũ Pa Yoná Nanex, ¿aixcümaxũchi yĩxũ i choxũ cungechaũxũ? —ñanagürü. Rü yexguma ga Pedru rü düxwa nangechaũ, yerü norü tomaẽxpüxcüna Ngechuchu nüxna naca ngoxi aixcüma nüxũ nangechaũ. Rü ñanagürü ga Pedru: —Pa Corix, cuma nüxũ cucuèx i guxũma. Rü cuma nüxũ cucuèx na aixcümaxũchi cuxũ changechaũxũ —ñanagürü. Rü Ngechuchu ñanagürü nüxũ: —Ëcü ¡nachibüexẽẽ i chorü duũxũgü! ¹⁸ —Rü aixcüma cumaã nüxũ chixu rü yexguma cungextüxügu rü cugü quicüxcuchi ga na ngextá cuma ícunaxwèxexüwa cuxũxücèx. Natürü ngèxguma yaguãx quixĩgu rü tá

quixuuchichacüü na togue cuxũ icuxcuchixũcèx. Rü ngẽma tama cuma ícunaxwèxexũwa tá cuxũ nagagü — ñanagürü. ¹⁹ Rü Ngechuchu rü yema ñanagürü na nüxũ nüxũ nacuèxèẽxũcèx ga ñuxãcü tá na nayuxũ ga Pedru na yemaãcü Tupanaxũ nataxèẽxũcèx. Rü yemawena ga Ngechuchu rü ñanagürü nüxũ: —¡Chowe rüxũ! — ñanagürü.

Yema ngúexũ ga Ngechuchu poraãcü nüxũ ngechaũxũchiga

²⁰ Rü yexguma nügüweama nadèuxgu ga Pedru rü choxũ nadau ga naweama na ne chaxũxũ. Rü chomachiréx nixĩ ga chibüwa Ngechuchucüwawa charütoxũ rü nüxna chaçaxũ rü ñachaxũ:

“Pa Corix, ¿texé tá tixĩ ya yíxema bexma cuechita cuxũ íxuaxũxè?” ñachaxũ. ²¹ Rü yexguma Pedru choxũ dèuxgu rü Ngechuchuna naca, rü ñanagürü: —Pa Corix, ¿ñaã Cuáũ rü tacü tá nüxũ üpetüxũ? —ñanagürü. ²² Rü Ngechuchu nanangãxũ, rü ñanagürü nüxũ: —Ngèxguma choma chanaxwèxegu rü chanamaxèẽ ñuxmatáta wena núma chaxũ. ¿Rü tüxcüxũ i nagu curüxĩnũxũ i ngema? Rü cuma ¡rü chowe rüxũ! —ñanagürü. ²³ Rü yexguma yema chomücügü nüxũ ñnüègu ga yema chauchiga, rü nagu narüxĩnüe na taxütáma chayuxũ. Natürü Ngechuchu rü tama nüxũ nixu ga tãxütáma na chayuxũ. Natürü ñanagürümare:

“Ngèxguma choma chanaxwèxegu rü chanamaxèẽ ñuxmatáta wena núma chaxũ. ¿Rü tüxcüxũ i nagu curüxĩnũxũ i ngẽma?”, ñanagürümare. ²⁴ Rü chomatama nixĩ ga nüxũ chadauxũ i guxũma i ñaã pemaã nüxũ chixuxũ, rü chomatama nixĩ i pexcèx chanaxümatüxũ i ñaã ore. Rü guxãma i toma rü nüxũ tacuèx na aixcüma na yĩxũ i ñaã pemaã nüxũ chixuxũ. ²⁵ Rü nayexma ga to ga

mux̃chix̃ma ga ƚacü ga Ngechuchu üx̃. Rü ngëxguma
chi nax̃matügu i gux̃ma ga yema nax̃x̃chiga, rü nagu
char̃x̃ñügu rü tãü chima ñoma i naãnegu name i ngëma
poperağü i nachiga ümatüx̃.

Tupanaarü Ore i Tóriu Cori ya Ngechuchu ya Cristuchiga
New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-30

PDF generated using Haiola and XeLaTeX on 14 Jun 2022 from source files dated 28 May 2022

9d5dc22a-30be-5d26-85a9-76047f4c89e6